

萬 有 文 庫

第一集一千種

王 雲 五 主 編

四 庫 全 書 總 目 提 要

(六十)

永 瑤 等 撰

商 務 印 書 館 發 行



四庫全書總目提要

(六十)

永瑢等撰

國學基本叢書

# 四庫全書總目提要

卷七十八

史部三十四

地理類存目七

【古今游名山記十七卷】安徽巡撫採進本。明何鏜撰。鏜有括蒼彙紀。已著錄。是書採史志文集所載游覽之文。以類編輯。首爲總錄三篇。曰勝記。曰名言。曰類考。次記兩京各省山川。及古今游人序記。

【天下名山諸勝一覽記十六卷】兩江總督採進本。明慎蒙撰。蒙字山泉。歸安人。嘉靖癸丑進士官至監察御史。是書以何鏜所作古今游名山記重複太甚。因刪汰繁冗。而增入通志及別集所載記文。凡十之四。視鏜書頗爲簡明。然文有加減。而事不增損。仍無資於考據。其記文之末。各加評語。亦不出坊刻積習自序稱其書名天下名山諸勝一覽記。而第一卷首又題作游名山一覽記。第二卷以後。則題作名山巖洞泉石古蹟。殊不畫一。蓋明代文士。往往急行其書。陸續付梓。至書成後。始有定名。而已刊者。遂不復追改。故名目往往錯互。不獨此書爲然也。

【名山游記一卷】兩淮鹽政採進本。明王世懋撰。世懋有却金傳。已著錄。是編一曰京口游山記。分上下二篇。一曰游匡廬山記。一曰東游記。一曰游二泉記。一曰游鼓山記。一曰游石竹山記。一曰游九鯉湖記。而附以游溧陽彭氏園記。末有世懋跋一篇。蓋爲鼓山以下三記作。後合刻諸記。仍以綴於末也。

【名山注】無卷數 內府藏本

明潘之恆撰。之恆有黃海已著錄。是編首江上山志。次蜀山志。次淮上雜志。次新安山水志。次越中山水志。次三吳雜志。或載前人行紀志傳題詠。或自爲序紀。其他名勝漏略尙多。疑就其所游歷者述之。其書不分卷帙。前後亦無序跋。而名山注三字。僅題於簽。似非完本也。

【五岳游草十二卷】兩江總督探進本

明王士性撰。士性字恆叔。臨海人。萬歷丁丑進士。官至南京鴻臚寺卿。事蹟附見明史。王宗沐傳。錢希言猶園又稱臨海王中丞。士性未之詳也。士性初令確山。游嵩岳。擢禮科給事中。游岱嶽華嶽恆嶽。及參粵藩。游衡嶽。此外游名山以十數。經歷者十州。游必有圖。有詩。爲圖若記七卷。詩三卷。不盡於記與詩者。爲雜志二卷。亦名廣游記。統題曰五岳游草。蓋舉其大以該其餘也。猶園稱峨嵋山有老僧。性好游。自恨一生不得徧探名岳。年又駸駸向暮。乃誓於來生。了此夙願。臨化謂其徒曰。吾今往台州臨海縣王氏託生爲男。計老僧化去之年月日時。卽士性之甲子云云。殆因有此書而附會之。然亦緣士性癖嗜山水。故有是言矣。

【廣志釋五卷雜志一卷】編修汪如藻家藏本

明王士性撰。此書又於五岳游草廣游記以外。追釋舊聞。以補未及者也。首爲方輿崖略。次兩都。次諸省。附以雜志。其四夷輯一種。列目於雜志之前。然有錄無書。注曰考訂嗣出。蓋未刊也。凡山川險易。民風物產之類。巨細兼載。亦閒附以論斷。蓋隨手記錄。以資談助。故其體全類說部。未可盡據爲考證也。

【黔志一卷】編修程晉芳家藏本

明王士性撰。曹溶收入學海類編中。核其所載。卽士性游記中之一篇。書賈摘出。別立此名。以售欺者也。

【豫志一卷】編修程晉芳家藏本 明王士性撰亦其五岳游草之一篇曹溶摘入學海類編者也。

【日畿訪勝錄二卷】編修程晉芳家藏本 明姚士粦撰士粦所輯陸氏易解已著錄此錄乃萬歷甲午士粦游京師時尋訪都城內外諸勝因彙輯成編然所載古蹟實皆鈔撮孫國救燕都游覽志蔣一葵長安客話諸書別無異聞不足資證據也。

【天目游記一卷】兩江總督探進本 明黃汝亨撰汝亨有古奏議已著錄是記乃汝亨與佛慧寺僧同遊天目山而作序是山景物頗詳然記中敍月敍日而不敍爲何年亦行文之偶疎也。

【紀游橐一卷】兩淮鹽政探進本 明王衡撰衡字緜山太倉人萬歷辛丑進士官翰林院編修事蹟附見明史王錫爵傳是編乃所作游記凡泰山一首香山三首盤山一首馬鞍潭柘一首雜記三首蓋隨時撫拾付梓者前有陳繼儒序詞亦佻巧。

【循滄集二卷】兩江總督探進本 明姚希孟撰希孟字孟長長洲人萬歷己未進士官至詹事府詹事事蹟具明史本傳是編乃所作游記以循滄名篇蓋用宋袁粲語也上卷十三篇皆游太湖洞庭所作下卷十五篇則平生所作南北游記皆在焉末爲跋王文恪洞庭游記二篇及跋徐宏祖鹿門鴻寶册一篇宏祖亦好游故以類附游記後焉其文體全沿公安竟陵之習務以纖佻爲工甚至游廣陵記於全篇散語之中忽作儷偶一聯云洞天深處別開翡翠之巢笑語微聞更掣鴛鴦之鎖自古以來有如是之文格乎。

【山行雜記一卷】浙江鮑士恭家藏本 明宋彥撰彥華亭人與趙宦光同時嘗至京師歷遊玉泉香山。

因紀其園亭刹寺巖壑之勝。蓋亦學游城南記諸書而作。然考據多疎。如中稱玉泉道上有壯節祠碑。稱崇安侯譚公而無其名。疑爲靖難武臣戰死者。案崇安侯譚淵。從成祖起兵。於夾河戰沒。子孫得世襲侯爵。當時如鄭曉。王世貞所著書內。皆詳載其事。而彥不能知。亦殊昧於典故矣。

【名山記四十八卷圖一卷附錄一卷】浙江巡撫採進本。不著撰人名氏。蓋因何鏜之書而增葺之。凡北直隸二卷。南直隸十卷。浙江十卷。江西四卷。湖廣四卷。河南三卷。山東二卷。山西一卷。陝西一卷。福建二卷。廣東二卷。廣西一卷。四川二卷。雲南一卷。貴州一卷。前爲圖一卷。略繪名勝之蹟。末爲附錄一卷。則荒怪之說。神異經十洲記之類也。所錄古人游記十之三。明人游記十之七。採摭頗富。而龐雜特甚。如鄺道元水經注。徐兢高麗圖經。張敦頤六朝事蹟之類。皆割裂釘釘。改易名目。至於孔稚圭北山移文。駱賓王冒雨尋菊序。宗懷荆楚歲時記。周密武林舊事。楊銜之洛陽伽藍記。王觀揚州芍藥譜。張鉉梅品。王世貞題洛中九老圖之類。闌入者不可殫述。不知其與名山何與。其圖首有篆字題識。曰崇禎六年春月。墨繪齋新摹。則出自坊賈之手可知。胡維霖墨池浪語。乃云名山記乃何濱巖所集。近復補入。景必窮幽。語必造奇。仁智者豈能足跡徧天下。得此可以臥遊。所謂補入。蓋卽此本。殆維霖未細閱其書歟。

【廣州游覽小志一卷】山東巡撫採進本。

國朝王士禎撰。士禎有古懽錄。已著錄。士禎以康熙甲子十

一月。祭告南海。以乙丑二月八日至四月一日歸。計留廣州五十一日。因而游覽古蹟。作爲此志。凡光孝寺。六榕寺。五羊觀。海幢寺。海珠寺。越秀山。蒲澗寺。長壽寺。南園三忠祠。九處。皆會城內外地也。

【天下名山記鈔】無卷數。內府藏本。國朝吳秋士編。秋士字西涓。歙縣人。其書取何鏜游名山記。及

王世貞之廣編。刪而錄之。無一字之考訂。

【泰山紀勝一卷】山東巡撫探進本。國朝孔貞瑄撰。貞瑄有大成樂律。已著錄。是編乃其初官泰安教

諭時。紀所游歷而作也。大略仿岱史之舊。自萬仙樓以下共五十餘則。每景各敘其勝。其餘諸山脈絡。與岱宗相屬者。如尼山。防山。龜蒙。鳧釋之類。亦咸入紀載。其捨身崖。社首。蒿里。封禪數條。持論頗不詭於正。然於封禪舊典。引據未能詳洽。大抵議論多而考據少。其文格亦尙沿竟陵末派云。

【匡廬紀游一卷】大學士英廉購進本。國朝吳闡思撰。闡思字道賢。武進人。所記廬山名蹟。凡五十八條。詞頗簡潔。然大抵以摹寫景物爲長。

【滇黔紀游二卷】大學士英廉購進本。國朝陳鼎撰。鼎有東林列傳。已著錄。是編爲其客游滇黔時所紀。上卷紀黔。下卷紀滇。於山川佳勝。敘述頗爲有致。而不免偶出鄙語。如紀貴州諸苗曰。男子之麗者。卽古之潘安。宋朝有不及焉。女子之麗者。漢之飛燕。唐之太真。亦無能出其上矣。此種女子。欲購之者。牛馬常以千計。男子皆不樂爲龍陽君。有犯之者。輒自殺。又記楚雄姚安開化三郡曰。余徧游三郡。別時各有遺贈。土儀之盛。餽贖之豐。有多至百金者云云。其言殊陋。又如記三塔寺黃華老人石刻一事。黃華老人。卽金王庭筠所作。四詩刻石在山西汾州。故有人道高歡避暑宮句。後李中陽始摹刻於點蒼山。王士禛居易錄載之甚詳。鼎乃以爲仙人之筆。則考證之疎。亦可概見矣。

【玉山遺響六卷】江西巡撫探進本。國朝張貞生撰。貞生號簞山。廬陵人。順治戊戌進士。官至翰林院侍讀學士。玉山在泰和仁善鄉。初名義山。又改匡山。土人稱子瑤山。貞生嘗游息其中。是編首載所作詩。

次載所題對聯。次載所作記。次爲茅屋隨劄。則山中之日記。次爲他人所作詩賦傳記。前有羅麗序。謂貞生所著文集。尙未刊行。此其家居一載之內。流連山水。隨筆記之。以示其意之所寓者。所錄雖皆詩文。而其體例在游記地志之間。故附之地理類焉。

【蒼洱小記一卷】兵部侍郎紀昀家藏本。國朝畢曰滂撰。曰滂有滇游記。已著錄。是編亦曰滂父忠告。官雲南布政司參議時。曰滂省覲至大理。紀其山川名勝。而作相傳靈鷲山。卽今點蒼山。爲釋伽佛修道處。賓川之鷄足山。卽伽葉道場。故曰滂是書多引佛經爲證據。

右地理類游記之屬。二十一部。一百二十三卷。內二部無卷數。皆附存目。

【南中志一卷】浙江范懋柱家天一閣藏本。舊本題曰晉常璩撰。前有顧應祥序。云此書附在華陽國志。近世無傳。升菴楊太史。謫居於滇。以其舊所藏本。手錄見示。云云。考隋以來經籍藝文諸志。皆無此書。宋李至校正華陽國志。原序具存。亦不云附有此卷。且漢王恢攻南越。在建元六年。張騫使大夏。在元狩元年。此云騫以白帝東越攻南越。大行王恢救之。年月之先後既殊。事蹟亦不知何據。又晉泰始七年。分益州置寧州。而此云六年。牂柯郡下元鼎六年。亦誤作元鼎二年。牴牾不一。楊慎好撰僞書。此書當亦漢雜事祕辛之類也。

【高麗記】無卷數。浙江范懋柱家天一閣藏本。舊本題宋徐兢撰。案兢別有高麗圖經四十卷。已著於錄。此本所載。卽從圖經中摘鈔而成。非兩書也。

【記古滇說一卷】浙江巡撫探進本。舊本題宋張道宗撰。前有嘉靖己酉沐朝弼序。則稱道宗爲元人。



卷末題咸淳元年春正月八日滇民張道宗錄。而書中又載元統二年立段信苗實爲大理宣慰使司事。顛倒牴牾。猝不可詰。其書大抵陰剽諸史西南夷傳。而小變其文。惟所記金馬碧鷄事。稱阿育王有三子。爭逐一金馬。季子名至德。逐至滇池東山獲之。卽名其山曰金馬。長子名福邦。續至滇池之西山。忽見碧鳳。卽名其山曰碧鷄。所謂金馬碧鷄之神。卽是二子。其說荒誕。與史傳尤異。文句亦多不雅馴。殆出贗託。況書中明言宋興以北有大敵。不暇遠略。使傳往來。不通中國。何以度宗式微之時。轉奉其正朔。然則非惟道宗時代恍惚難憑。卽其人之有無。且不可遽信矣。卷首有楊慎點校字。其卽慎所依託。而故謬其文。以疑後人歟。

【異域志一卷】浙江范懋柱家天一閣藏本。不著撰人名氏。篇首胡惟庸序。曰羸蟲錄者。予自吳元年丁未。出鎮江陵。有處士周致中者。前元之知院也。持是錄獻於軍門。則此書初名羸蟲錄。爲周致中所作。又開濟跋曰。是書吾兄得之於青宮。乃國初之故物。今吾兄重編。更其名曰異域志。則此書名異域志。乃開濟之兄所更定。然考明太祖於元至正二十四年甲辰建國。號曰吳。丁未當稱吳三年。不得稱元年。又濟跋題壬午長至。爲惠帝建文四年。其時濟被誅已久。不應作跋。疑皆出於依託也。其書中雜論諸國風俗物產土地。語甚簡略。頗與金銑所刻異域圖志相似。無足採錄。

【異域圖志一卷】浙江范懋柱家天一閣藏本。不著撰人名氏。後有明廣信府知府金銑序。謂宋亦有應天府。疑是宋書。然書中載明初封元梁王子於耽羅。則爲明人所作無疑。其書摭拾諸史及諸小說而成。頗多疎舛。如占城役屬於安南。乃云安南爲占城役屬。殊不足據。其他敘述亦太寥寥。

【百夷傳一卷】浙江范懋柱家天一閣藏本 明錢古訓撰。古訓餘姚人。洪武甲戌進士。官至湖廣布政司參政。百夷卽麓川平緬宣慰司。案百夷卽今擺夷。譯語對音。故無定字。洪武二十九年。其酋思侖發。訴與緬人構兵。古訓時爲行人。與其同官桂陽李思聰。奉詔往諭。命發等聽命而還。因述其山川人物風俗。道路爲書。以進。古訓旋以勞擢湖廣參政。請澤州楊砥序之。黃虞稷千頃堂書目。以此書爲李思聰作。今據砥序及夏原吉後序。則實古訓所作。虞稷偶失考也。

【南夷書一卷】浙江范懋柱家天一閣藏本 明張洪撰。洪字宗海。常熟人。洪熙初。召入翰林。官修撰。是編乃永樂四年。緬甸宣慰使那羅塔。刦殺孟養宣慰使刁查及思樂發。而據其地。洪時爲行人。齎敕往諭。因探摭見聞。記其梗概。所載洪武初至永樂四年。平定雲南各土司事。皆略而不詳。其於雲南郡建置始末。亦未能明晰。如南詔爲蒙氏改鄯闡府。歷鄭趙楊三姓。始至大理段氏。孟養麓川。各有土司。書中皆遺之。唯載梁王拒守。及楊苴乘隙竊發諸事。稍足與史參考耳。書中瀾滄江作蘭滄江。思樂發作思鸞發。與史互異。蓋亦譯語對音之故也。

【西洋番國志】無卷數 浙江巡撫採進本 明鞏珍撰。珍應天人。其仕履始末未詳。永樂中。敕遣太監鄭和等。出使西洋。宣宗嗣位。復命和及王景宏等。往海外徧諭諸番。時珍從事總制之幕。往還三年。所歷諸番。曰占城。曰瓜哇。曰暹羅。曰舊港。曰啞嚕。曰滿刺加。曰蘇門答刺。曰那姑兒。曰黎代。曰喃勃里。曰溜山。曰榜葛刺。曰錫蘭山。曰小葛蘭。曰阿枝。曰古里。曰祖法兒。曰忽魯謨斯。曰阿丹。曰天方。凡二十國。於其風土人物。詢諸通事。轉譯漢語。覩縷畢記。至宣德九年編成。所記與明史外國傳大概相同。疑史採用此書。

也。

【瀛涯勝覽一卷】兩江總督探進本。明馬觀撰。觀不知何許人。書中多記鄭和出使時事。則作於永樂以後也。所記海外諸番曰占城曰瓜哇曰舊港國曰暹羅曰滿刺加曰啞魯國曰蘇門答刺曰那孤兒曰黎代曰喃勃里曰錫蘭曰小葛蘭曰阿枝曰古俚曰溜山曰祖法兒曰阿丹國曰楠葛刺國曰忽魯謨廟國。凡十九國。而爲篇十八。其那孤兒國附見蘇門答刺後。以其微也。各載其疆域道里風俗物產。亦略及沿革。大抵與史傳相出入。

【朝鮮雜誌一卷】浙江范懋柱家天一閣藏本。舊本題明董越撰。越有朝鮮賦。已著錄。是書繁碎無體例。以越所撰朝鮮賦校之。皆賦中越所自註。蓋好事者鈔出別行。僞立名目。非越又有此書也。

【海槎餘錄一卷】江蘇周厚培家藏本。明顧訥撰。訥字匯堂。吳縣人。官至南安府知府。是編乃其官儋州時所著。凡風土物產。悉隨筆記之。共四十餘則。皆地志所已具。惟處置叛黎一節。敘述頗詳。爲蠻司各志所未及云。

【日本考略一卷】浙江范懋柱家天一閣藏本。明薛俊撰。俊定海人。嘉靖二年。日本國使宗設來貢。抵寧波。未幾宋素卿等亦至。互爭真僞。自相殘殺。所過州縣。大肆焚掠。浙江瀕海之地。人民苦之。俊因纂輯是書。大略言防禦之事爲多。而國土風俗。亦類入焉。然見聞未廣。所輯沿革疆域二略。約舉梗概。挂漏頗多。屬國中兼及新羅百濟等國。不知新羅百濟。在宋時已爲朝鮮所併。其時竝無是國矣。又序世系。但及宋雍熙以前。而不載元以後國王名號。亦疎漏也。

【日本圖纂一卷】浙江范懋柱家天一閣藏本 明鄭若曾撰。若曾有鄭開陽雜著。已著錄。此書乃其在胡宗憲幕府所作。以坊行日本考略一書。舛譌難據。因從奉化人購得南畝倭商祕圖。持以詢諸使臣。降倭通事火長之屬。彙訂成編。前爲圖三幅。附以論說。後載州郡土貢道路形勢。語言什器寇術。而儀制詩表。別爲附錄。視若曾萬里海防編內所載。較爲詳密。其針經圖說。止載入貢故道。而閒道便利。皆隱而不言。蓋恐海濱姦宄。得通倭之路。有深意存焉。惟其言明太祖洪武二年。命趙秩往諭其國。明史載在洪武三年。又言太宗十九年。寇遼東。總兵劉江殲之於望海埭。明史載在永樂十七年。乃總督劉榮。非總兵劉江。均不相合。然明史據明實錄及國史。不得有誤。殆是書傳聞未實也。

【朝鮮圖說一卷】浙江范懋柱家天一閣藏本 明鄭若曾撰。先圖後考。次詳其世紀都邑山川風俗土產道里貢式。而以宋鄭興裔奏議一篇附焉。蓋是時朝鮮亦被倭患。故因日本而及之。

【琉球圖說一卷】浙江范懋柱家天一閣藏本 明鄭若曾撰。體例與朝鮮圖說相同。地里則但標其針路。未附宋鄭藻紀事一篇。琉球奉明正朔。從無寇掠。殆以其國外偏於倭。內密邇於福建。而爲預防之計歟。

【安南圖說一卷】浙江范懋柱家天一閣藏本 明鄭若曾撰。體例亦與朝鮮圖說同。但增疆域僞制二門。疆域寥寥數語。其僞制則紀黎莫二姓事也。未附宋鄭竦紀略一篇。若曾時距莫登庸事未遠。故籌畫邊防。併及安南。然相距既遙。所傳聞者略矣。

【西洋朝貢典錄二卷】江蘇巡撫採進本 明黃省曾撰。省曾字勉之。吳縣人。嘉靖辛卯舉人。明史文苑

傳。附見文徵明傳中。是編紀西洋諸國朝貢之事。自占城以迄天方。爲國二十有三。國各一篇。篇各有論。凡道里遠近。風俗美惡。物產器用之殊。言語衣服之異。靡不詳載。考明史外國傳。其時通職貢者。尙不盡於此錄。省曾止就內侍鄭和所歷之國。編次成書。餘固未暇及也。末有二跋。一爲東川居士孫允伽。一爲清常道人趙開美。允伽稱此書初未付梓。得其手藁錄之。開美謂其章法句法。頗學山海經。信爲奇書。錢曾讀書敏求記亦載之。然其精華。已採入正史。餘亦無他異聞也。

【夷俗記一卷】浙江鮑士恭家藏本

明蕭大亨撰。大亨號岳峯。泰安人。嘉靖壬戌進士。官至兵部尙書。

是書專紀韃靼風俗。分匹配生育分家治姦治盜聽訟葬埋崇佛待賓尊師耕獵食用帽衣敬上禁忌牧養習尙教戰戰陣貢市二十類。蓋大亨嘗爲宣大總督。故錄其所聞如此。然殊多失實。不足徵信。惟順義王互市之地。明史載大同於左衛北威遠堡邊外。宣府於萬全右衛張家口邊外。山西於水泉營。而此書載大同互市有三堡。一曰守口堡。二曰得勝堡。三曰新平堡。則大亨所親見。較史爲詳云。

【朝鮮國志一卷】浙江范懋柱家天一閣藏本

不著撰人名氏。所存惟京都風俗山川古都古蹟五門。

中稱我康獻王。知爲朝鮮人作。引明一統志稱大明。知爲作於明時。又多稱王氏諸王爲高麗王。知爲明之中葉。李氏有國。改稱朝鮮之後也。

【東南夷圖說二卷嶺海異聞一卷續聞一卷】浙江吳玉墀家藏本

明蔡汝賢撰。汝賢字思齊。華亭人。

隆慶戊辰進士。是編成於萬曆丙戌。所紀皆東南海中諸國。殊多傳聞失實。如謂琉球國人。眇目深鼻。男去髭鬚。輯烏羽爲冠。裝以珠玉赤毛。今琉球貢使旅來。目所共睹。殊不如其所說。海西諸國。統稱西洋。汝

賢乃以西洋爲國名。則更謬矣。至於異聞續聞。尤多荒誕不經。其圖像悉以意杜撰。亦毫無所據。

【四川土夷考四卷】浙江汪汝琛家藏本。明譚希思撰。希思有明大政纂要。已著錄。是書乃希思在蜀時。命布政使官屬。取全蜀土司土府。繪圖立說。裒爲一編。刻於萬歷二十六年。首全圖。次各土司土府分圖。圖各有說。凡七十八篇。其中所列。多沿邊城堡守禦名目。而於土司境壤山川形勢。概未之及。蓋專爲防守之策而設。雖名爲土夷考。其實乃險隘圖也。所附之說。僅據州縣申册。簡略頗甚。亦不足以備考核。

【日本考五卷】

浙江鮑士恭家藏本

明李言恭都杰同撰。言恭字惟寅。岐陽武靖王文忠之裔。以萬歷

二年襲封臨淮侯。杰字彥輔。蔚州人。嘉靖丙辰進士官至南京兵部尚書。方言恭督京營戎政時。杰爲右都御史。會倭患方劇。乃共摺所聞。爲此書記其山川地理。及世次土風。而於字書譯語。臚載尤詳。後倭陷朝鮮。封貢議起。杰以力爭不合。徙南京。而言恭子宗城。卒爲石星所薦。充正使往封。至釜山而倭情中變。易服逃歸。被劾論戍。蓋徒恃紙上空言。宜其不能悉知情僞也。

【咸賓錄八卷】

浙江鮑士恭家藏本

明羅曰駮撰。曰駮字尙之。江西人。是編刊於萬歷中。分列諸國之事。以東西南北爲分。欲誇明代聲教之遠。故曰咸賓。其實多非朝貢之國。又敘事古今糅雜。標題人地混

淆。亦頗無體例。

【別本坤輿外紀一卷】

大學士英廉購進本

舊本題國朝南懷仁撰。載吳震方說鈴前集中。案懷仁

坤輿外紀。別有全本。已著於錄。此本摘錄其文。併刪其圖說。乃叢書之節本。猶明季坊刻竄亂古書之陋習也。

【西方要紀一卷】編修程晉芳家藏本。國朝西洋人利類思安文思南懷仁等撰。利類思安文思皆以明末入中國。南懷仁以順治十六年至京師。此書則康熙初年所述。凡二十條。專記西洋國土風俗人物土產及海程遠近。大抵意在夸大其教。故語多粉飾失實。

【洱海叢談一卷】浙江巡撫採進本。國朝釋同揆撰。同揆字輪菴。雲南大理府文殊寺僧也。是書紀滇南未入版圖之初。引隋書西海阿育國王仲子封蒼洱之間。爲南詔之始祖。其後世滅而復興者。有段氏蒙氏高氏相承。至明初始皆內附。所載觀音大士結茅郡中。及唐永徽後現身七化之語。皆近荒誕。以緇徒爲地志。自張其教。固所不免耳。

【八紘譯史四卷紀餘四卷】江蘇巡撫採進本。國朝陸次雲撰。次雲有湖壩雜記。已著錄。是書專錄荒外諸國古事。皆採摭史傳。復見不鮮。近事多據瀛涯勝覽。職方外紀諸書。亦多傳聞失實。所記西域山川物產。其地自天威耆定。俱入版圖。如謂高昌盛暑。人皆穴處。鳥飛或爲日氣所燦而墮。謂火焰山烟焰燭天。謂火蠶綿絮衣一襲。止用一兩。稍多。熱不可耐。謂白疊子其實成繭。中有細絲。謂哈密四味木。其實如棗。以竹刀取之則甘。鐵刀取之則苦。木刀取之則酸。蘆刀取之則辛。謂龜茲有山出泉。行數里入地。狀如醞釀。甚臭。人服之。齒落更生。今由嘉峪關南路。至喀什噶爾。卽經三國故地。安得有此事哉。卽其他可知矣。後附譯史紀餘四卷。一爲東海西海及異物。二爲高麗日本占城安南琉球之詩。三爲外國錢文。四爲西番百譯。緬甸暹羅四國之書。亦皆耳剽之談。不爲確據。如人面魚食目一條。此書作前朝使臣至日本事。峒谿織志。又以爲苗人進於初官是土者。一人之書。而自相矛盾。是尙可爲信史哉。

【八紘荒史一卷】江蘇巡撫探進本 國朝陸次雲撰。次雲既撰八紘譯史，記其曾通中國者，因復摭小說稗官所載荒渺之說爲此書，皆無稽之談也。書首題卷之一，則當不止此卷，而次雲所刻雜著前列總目，此書實止一卷，豈欲續輯而未成歟。

【峒谿織志三卷志餘一卷】大學士英廉家藏本 國朝陸次雲撰。所記皆諸苗蠻種落風俗，前有題詞稱諸書所載同異攸殊，余徵諸見聞詳爲考正，措詞雖簡，徵事彌該。上卷爲峒谿羣言考正，中卷爲蠻獠志，下卷爲滇中峒谿所產志，餘一卷則皆蠻中歌謠，自吳淇粵風續所採出者也。

【安南紀游一卷】大學士英廉家藏本 國朝潘鼎珪撰。鼎珪字子登，晉江人，是編成於康熙二十七年，乃鼎珪游廣東時，偶附海舶遇風，飄至其國，因紀其山川風土之大略，與諸書所記不甚相遠，無他異聞。【海外紀事六卷】浙江巡撫探進本 國朝釋大汕撰。大汕廣東長壽寺僧，康熙乙亥春，大越國王阮福週聘往說法，越歲而歸，因記其國之風土，以及大洋往來所見聞，大越國者，其先世乃安南贅婿，分藩割據，遂稱大越，卷前有阮福週序，題丙子蒲月，蓋康熙三十五年也。

【連陽八排風土記八卷】浙江巡撫探進本 國朝李來章撰。來章號禮山，本名灼然，以字行，襄城人，康熙乙卯舉人，官連山縣知縣，是書卽其康熙戊子在連山時所作，八排者，獠獠所居，以竹木爲柵，謂之排也，凡分圖繪形勢風俗言語，剿撫建置約束，向化八門，門爲一卷，其目尙有第九卷，題曰雜述，上下然有錄無書，豈爲之而未成歟。中多自敘政績，其向化一門，紀所判斷之案，各爲標目，殆似傳奇，尤非體例。【中山傳信錄六卷】兩淮馬裕家藏本 國朝徐葆光撰。葆光字澄齋，吳江人，康熙壬辰進士，官翰林院



編修康熙五十七年冊封琉球國世子尙貞爲國王。以葆光爲副使。歸時奏上是書。繪圖列說。紀述頗詳。【楚南苗志六卷】湖北巡撫採進本。國朝段汝霖撰。汝霖字時齋。號梅亭。漢陽人。由舉人歷官建寧府知府。是書乃汝霖爲湖南永綏同知時所作。前五卷皆載苗人種類風俗物產言語衣服。及歷朝控禦撫治之法。末一卷附載獠人土人及粵西六寨蠻。而六寨蠻尤爲簡略。以非楚所治故也。體例冗雜。敘述亦不甚雅馴。而得諸見聞。事皆質實。惟首載星野。與苗蠻土人皆無所涉。未免沿地志之陋格耳。右地理類外紀之屬。三十四部。八十三卷。內二部無卷數。皆附存目。

## 卷七十九

### 史部三十五

#### 職官類

前代官制。史多著錄。然其書恆不傳。南唐書徐鍇傳。稱後主得齊職制。其書罕覩。惟鍇知之。今亦無舉其名者。世所稱述。周官外。惟唐六典最古耳。蓋建官爲百度之綱。其名品職掌。史志必撮舉大凡。足備參考。故本書繁重。反爲人所倦觀。且惟議政廟堂。乃稽舊典。其閒如元豐變法。事不數逢。故著述之家。或通是學。而無所用。習者少。則傳者亦稀焉。今所採錄。大抵唐宋以來。一曹一司之舊事。與儆戒訓誥之詞。今釐爲官制官箴二子目。亦足以稽考掌故。激勸官方。明人所著。率類州縣志書。則等之自郇矣。【唐六典三十卷】浙江汪汝璣家藏本。唐元宗明皇帝御撰。李林甫奉敕註。其書以三師三公三省九

寺五監十二衛。列其職司官佐。敍其品秩。以擬周禮。書錄解題。引韋述集賢記。註曰。開元十年。起居舍人陸堅。被旨修是書。帝手寫白麻紙六條。曰。理教禮政刑事。令以類相從。撰錄以進。張說以其事委徐堅。思之經歲。莫能定。又委母舅徐欽韋述。始以令式入六司。其沿革竝入註中。後張九齡又委苑咸。二十六年。奏草上。迄今在直院。亦不行用。程大昌雍錄。則曰。唐世制度。凡最皆在六典。或曰。書成未嘗頒用。今案會要。則牛僧孺奏升諫議爲三品。用六典也。貞元二年。定著朝班次序。每班以尙書省官爲首。用六典也。又其年竇參論祠祭。當以監察洩之。亦援六典也。此類殆不勝述。草制之官。每入院必首索六典。則時制盡在故也。二說截然不同。考呂溫集。有代陳相公請刪定施行六典開元禮狀一篇。稱宣示中外。星紀六周。未有明詔施行。遂使喪祭冠昏家。猶疑禮之等威名分。國靡成規。請於常參官內。選舉藝優敏者三五人。就集賢院。各盡異同。量加刪定。然後特降德音。明下有司云云。與韋述之言相合。唐人所說。當無譌誤。大昌所引諸事。疑當時討論典章。亦相引據。而公私科律。則未嘗事事遵用。如明代之會典云爾。范祖禹唐鑑。論其既有太尉司徒司空。又有尙書省。是政出於二也。既有尙書省。又有九寺。是政出於三也。蓋自唐虞至周。有六官而無寺監。自秦迄陳。有寺監而無六官。獨此書兼之。故官多重複。今考是書。如林甫註中。以諸州祥瑞。預立條格。以待奏報之類。誠爲可嗤。然一代典章。釐然具備。祖禹之所論。或以元豐官制全祖是書。有所激而云然歟。又唐會要載開元二十三年。九齡等撰是書。而唐書載九齡以開元二十四年。罷知政事。則書成時。九齡猶在位。後至二十七年。林甫乃註成。獨上之。宋陳騭館閣錄。載書局有經修經進。經修不經進。經進不經修。三格說與九齡皆所謂經修不經進者。卷首獨著林甫。蓋卽此例。今亦姑仍。

舊本書之不復追改焉。

【翰林志一卷】兩江總督採進本。唐李肇撰。案肇所作國史補。結銜題尚書左司郎中。此書結銜。則題

翰林學士左補闕王定保。摭言。又稱肇爲元和中中書舍人。新唐書藝文志。亦云肇爲翰林學士。坐薦柏耆。自中書舍人左遷。將作少監。以唐官制考之。蓋自左司改補闕。入翰林。後爲中書舍人。坐事左遷。國史補。及此書。各題其作書時官也。唐時翰林院。在銀臺門內麟德殿西重廊之後。爲待詔之所。新唐書百官志。謂乘輿所在。必有文詞經學之士。下至卜醫伎術之流。皆直於別院。以備燕見者是也。韋執誼翰林院故事。亦謂其地乃天下以藝能伎術見召者之所處。蓋其始本以延引雜流。原非爲文學侍從而設。至明皇置翰林待詔供奉。與集賢院學士分掌制誥。其職始重。後又改爲學士。別置學士院。謂之東翰林院。於是舊翰林院。雖尙有以伎能入直。如德宗時術士桑道茂之類。而翰林之名實。盡歸於學士院。歷代相沿。遂爲儒臣定職。肇此書成於元和十四年。唐宋藝文志。皆著於錄。其記載賅備。本末燦然。於一代詞臣職掌。最爲詳晰。宋洪遵輯翰苑羣書。已經收入。今以言翰林独故者。莫古於是書。故仍錄專本。以存其朔焉。

【麟臺故事五卷】永樂大典本。宋程俱撰。俱字致道。衢州開化人。舉進士。試南宮第一。廷試中甲科。歷

官徽猷閣待制。封新安縣伯。事蹟具宋史文苑傳。玉海載元祐中。宋匪躬作館閣錄。紹興元年。程俱上麟臺故事。淳熙四年。陳騷續爲館閣錄。蓋一代翰林故實。具是三書。今宋錄已亡。陳錄僅存。而亦稍譌闕。是書則自明以來。惟說郛載有數條。別無傳本。今考永樂大典。徵引是書者特多。排比其文。猶可成帙。其書多記宋初之事。典章文物。燦然可觀。蓋紹興元年初復祕書省。首以俱爲少監。故俱爲是書。得諸官府。舊

章最爲詳備。如東都事略邢昺傳。載由侍讀學士遷工部侍郎。不著加中散大夫。宋綬傳。載召試中書。不著遷大理評事。宋史韓琦傳。載由通判淄州入直集賢院。不著爲太常寺丞及太子中允。王陶傳。載爲太子中允。不著編校昭文館書籍。孫洙傳。亦不著洙嘗爲於潛令及編校祕閣書籍。而皆見於是書。又如玉海。引謝泌傳。泌上言請分四庫書籍。人掌一庫。事在端拱初。而其一百六十八卷。又載此事於天聖五年。前後自相刺謬。據此書所載。則在咸平之初。又續通鑑長編。載咸平二年七月甲寅。幸國子監。還幸崇文院。而此日之後。又有癸丑。則是月之內。不容先有甲寅。顯然牴牾。據是書。乃是七月甲辰。如此之類。凡百餘條。皆足以考證異同。補綴疎略。於掌故深爲有裨。原書文獻通考作五卷。今所哀錄。仍符此數。疑當時全部收之。通考又稱凡十二篇。而不詳其篇目。其見於永樂大典者。有官聯職掌廩祿三門。皆與陳騭書標題相合。疑騭書卽因俱舊目修之。今卽以騭之篇目分隸諸條。莫不一一條貫。無所齟齬。亦可謂神明煥然。頓還舊觀矣。騭錄載曝書會餞會及大宴學士院三條。俱云出麟臺故事。然引其事不載其詞。殆姚廣孝等排纂之時。刊除重複。誤削前而存後。當時編輯無緒。卽此可見一端。今亦無從補入。惟俱北山集中。載有後序一篇。竝附錄之。以存其舊焉。

【翰苑羣書二卷】浙江巡撫採進本

宋洪遵編。遵字景嚴。鄱陽人。皓之仲子也。與兄适。同中紹興十二

年博學鴻詞科。賜進士出身。歷官徽猷閣直學士。出知平江府。孝宗時。召除翰林學士承旨。拜同知樞密院事。江東安撫使。資政殿學士。提舉洞霄宮。卒。諡文安。事蹟具宋史本傳。是書後有乾道九年遵題記曰。翰苑秩清地禁。泐唐迄今。爲薦紳榮。遵世蒙國恩。父子兄弟。接武而進。實爲千載幸遇。曩嘗稔遺事。一編

揭來建業。以家舊藏李肇元稹韋處厚韋執誼楊鉅丁居晦。洎我宋數公。凡有紀於此者。竝槩之。木仍以國朝年表。中興題名附。陳振孫書錄解題曰。自李肇而下十一家。及年表中興後題名。共爲一書。此本上卷爲李肇翰林志。元稹承旨學士院記。韋處厚翰林學士記。韋執誼翰林院故事。楊鉅翰林學士院舊規。丁居晦重修承旨學士壁記。李昉禁林讌會集。凡七家。下卷爲蘇易簡續翰林志。蘇耆次續翰林志。學士年表。翰苑題名。翰苑遺事。凡五種。其遺事爲遵所續。不在其數。實止四家。除年表題名外。所收不過九家。與振孫所記不合。考宋史藝文志。載是書本三卷。此本止上下二卷。又文獻通考。所載尙有唐張著翰林盛事一卷。宋李宗諤翰苑雜記一卷。若合此二家。正足十一家之數。豈原本有之。而今本佚其一卷耶。

【南宋館閣錄十卷續錄十卷】永樂大典本

南宋館閣錄十卷。宋陳騭撰。續錄十卷。無撰人名氏。騭字

叔進。台州臨海人。紹興二十四年進士第一。慶元初。官至知樞密院事。兼參知政事。忤韓侂胄。提舉洞霄宮。卒。諡文簡。事蹟具宋史本傳。陳氏書錄解題。謂淳熙中。騭長蓬山。與同僚錄建炎以來事。爲此書。李燾爲之序。續錄者。後人因舊文而增附之。今考是錄所載。自建炎元年。至淳熙四年。續錄所載。自淳熙五年。至咸淳五年。皆分沿革。省舍。儲藏。修纂。撰述。故實。官秩。廩祿。職掌。九門。典故。條格。纖悉畢備。亦一代文獻之藪也。世所傳本。譌闕殆不可讀。惟永樂大典所載。差爲完具。今互相考訂。補其脫漏者。三十一條。正其舛錯者。一十六條。而其紀載諸人爵里。有與宋史互異者。竝爲臚註。以資參考。惟前錄中沿革一門。續錄中廩祿一門。永樂大典所載。亦全卷皆佚。無從補葺。蓋是書殘闕。已在明以前矣。今亦姑仍其舊焉。

【玉堂雜記三卷】浙江鮑士恭家藏本

宋周必大撰。必大。字子充。一字洪道。廬陵人。紹興二十一年進

士中宏詞科。權中書舍人。孝宗朝歷右丞相。拜少傅。進益國公。寧宗朝以少傅致仕。卒諡文忠。事蹟具宋史本傳。此書皆記翰林故事。後編入必大文集中。此乃其別行之本也。宋代掌制最號重職。往往由此致位二府。必大受知孝宗。兩入翰苑。自權直院至學士承旨。皆徧爲之。凡鑾坡制度沿革。及一時宣召奏對之事。隨筆記錄。集爲此編。所紀如奉表德壽署名。賜安南國王嗣子詔書之類。皆能援引古義。合於典禮。其他瑣聞遺事。亦多可資談柄。洪遵翰苑羣書所錄。皆唐代及汴都故帙。程俱麟臺故事。亦成於紹興間。其隆興以後。翰林故實。惟稍見於館閣續錄。及洪邁容齋隨筆中。得必大此書。互相稽考。南渡後玉堂舊典。亦庶幾乎釐然具矣。

【宋宰輔編年錄二十卷】兩淮鹽政探進本。宋徐自明撰。自明字誠甫。號慥堂。永嘉人。嘗官太常博士。終零陵郡守。初北宋時。神宗命陳繹爲拜罷圖一卷。樞府拜罷錄一卷。元豐開司馬光復作百官公卿拜罷年表十五卷。其後曾鞏譚世勣蔡幼學李燾各有撰述。而不能無所闕略。自明因摭拾舊事。補其遺漏。續作此書。以宋世官制中書樞密爲二府。俱宰輔之職。故自平章事參知政事樞密使知樞密院事。同知簽書樞密院事。皆著其名位。而詳其除罷黜陟之由。編年系日起建隆戊午迄嘉定乙亥。大都本之通鑑長編繫年要錄丁未錄東都事略而又旁採他書以附益之。本末賅具。最爲詳核。又據宋朝大詔令玉堂制革備錄其鎖院制詞。更有裨於文獻。以宋史宰輔年表互相考校。如建隆元年趙普拜樞副。此錄在八月甲申。而年表在戊子。太平興國四年石熙載拜簽樞。此錄在正月庚寅。而年表在癸巳。太平興國八年宋琪拜參政。此錄在三月庚申。而年表在癸亥。雍熙三年辛仲甫拜參政。此錄在六月戊戌。而年表在甲

辰。此類極多。亦足爲讀史者考異之助。至宋世所降麻制。例載某人所行之詞。此錄間存姓名。亦可備掌故。其中如熙寧四年陳升之起復入相制。乃元絳之詞。載於宋文鑑中。以升之力辭不拜。其事未行。竝其制詞不錄。是也。至如端拱元年呂蒙正拜相制。爲李沆之詞。治平二年文彥博除樞密使制。熙寧二年陳升之拜相制。皆爲王珪之詞。元符三年曾布拜相制。爲曾肇之詞。亦竝見於宋文鑑。而此反闕註。皆不免有所挂漏。然二百五十年間。賢姦進退。畢具是編。於以考國政而備官箴。亦可云諳習典故者矣。寶祐間自明子居誼。宰永福。嘗刻之縣學。後漸亡佚。明嘉靖間。大興呂邦燿始得鈔本於焦竑家。而闕其兩卷。後周藩宗室勤美。以所藏殘本補足。復梓以傳。蓋亦僅存之本也。

【祕書監志十一卷】編修汪如藻家藏本。元王士點商企翁同撰。士點有禁扁。已著錄。企翁字繼伯。曹州人。官著作佐郎。其書成於順帝至正中。凡至元以來。建置遷除典章故事。無不具載。司天監亦附錄焉。蓋元制司天監隸祕書省。猶漢制以太史令兼職天官之義也。後列職官題名。與南宋館閣錄例同。其兼及直長令史。皆纖悉詳錄。則以金源以後。以掾吏爲士人登進之階。往往由此起家。洊至卿相。其職重於前代耳。其所紀錄。多可以資考核。朱彝尊嘗據以辨吳鄺卽張應珍。以大德九年改名。歷仕祕書少監。非宋遺民。證吉安府志之誤。則於史學亦多所裨矣。

【翰林記二十卷】浙江汪啓淑家藏本。不著撰人名氏。案明史藝文志。載黃佐翰林記二十卷。而廖道南殿閣詞林記序。有與泰泉黃佐纂翰林雜記六冊之語。則是書自當出於佐手。佐卽撰泰泉鄉禮。著錄於經部禮類者也。所載皆明一代翰林掌故。始自洪武。迄於正德嘉靖間。每事各有標目。凡二百二十六

條。本末賅具。首尾貫串。敘次頗爲詳悉。如所記殿閣卿寺轉銜。與明會典諸書。互有同異。又會議繕寫諸條。制度甚詳。均足以備考核。其七十八兩卷。具列館閣題名。尤足以見一代人材升降之概。廖道南撰殿閣詞林記。自九卷以後。多採佐書。以足成之。今以此本互相檢核。其文不盡相合。蓋道南又有所點竄。以歸一家之體例。此則佐之原本耳。其文與道南之書。互有詳略。可以參考證明。以繼李肇程俱陳騏王士點諸人所作。唐宋元明以來詞林故事。亦大略具備矣。

【禮部志彙一百十卷】浙江巡撫採進本。明泰昌元年官修。首列纂修姓氏。自禮部尙書林堯俞。至司

務顧民晏等四十人。次列批委纂修。自東閣大學士前禮部尙書孫如游。至儀制司員外郎張光房等六人。次列巡按直隸蘇松等處御史。據松江府知府揭薦生員俞汝楫纂修禮部志書公移。竝禮部准聘赴書局批文。則此書實出汝楫之手。明史藝文志有俞汝楫禮儀志一百卷。當卽此書。此題曰禮部志彙。蓋其草創初成。尙未定名之本也。卷首汝楫名。後竝列上海生員俞廷教名。爲薦舉公移所無。殆入局以後。續招協修。故初揭不載歟。其書首爲聖訓六卷。爲洪武至隆慶詔諭。次建官建署一卷。次總職掌一卷。次儀司職掌十六卷。次祠司職掌十卷。次客司職掌十卷。次膳司職掌。及司務職掌共二卷。次歷官表四卷。次奏疏五卷。次列傳八卷。次儀司事例二十一卷。次祠司事例九卷。次客司事例九卷。次膳司事例一卷。次總事例七卷。共爲一百一十卷。前列凡例三則。其溯初制一則。稱研討典故。要在沿流溯源。其理條貫一則。稱典故之編。不急於蒼萃。而急於貫通。其慎稽考一則。稱網羅舊聞。匪獨挂漏是懼。而考正謬誤。亦編摩第一義。其言皆深得纂輯要領。故其書敘述詳贍。首尾該貫。頗有可觀。如釋菜薦舉諸詔。爲明實錄



所不載。祈雪建宮諸論。爲嘉靖祀典所未錄。王妃冠服。百官常服。及大宴樂章。較明史禮樂志爲詳。貢舉起送之額。誥敕表章之式。較明會典爲備。經筵傳班員額。拾明集禮之所遺。朝覲賞賚諸制。補星槎勝覽西域行程之闕。雖案牘之文。稍傷冗雜。而取備掌故。體例與著書稍殊。固不能以是病之也。

【太常續考八卷】江蘇巡撫採進本。不著撰人名氏。考書中所錄。蓋明崇禎時。太常寺官屬所輯也。凡

祭祀典禮。皆詳悉具載。雖不免爲案牘簿籍之文。而沿革損益之由。名物度數之細。條分縷晰。多明史禮志明會典明集禮及嘉靖祀典之所未載。蓋總括一代之掌故。則體貴簡要。專錄一官之職守。則義取博賅。言各有當。故詳略迴不同也。況集禮作於洪武。會典作於成化。嘉靖祀典。惟載一時更張之事。自世宗以後。百餘年之典制。記載闕如。此書職官題名。終於崇禎十六年。則一代儀章。始末尤爲完具。固數典者所不可廢矣。

【土官底簿二卷】浙江汪啟淑家藏本。不著撰人名氏。朱彝尊曝書亭集。有是書跋。但云鈔之海鹽鄭

氏。亦不言作者爲誰。其書備載明正德以前諸土司官爵世系承襲削除。觀其命名與繕寫之式。疑當時案牘之文。而好事者錄存之也。所載雲南土司百五十一家。廣西土司百六十七家。四川土司二十家。貴州土司一十五家。湖廣土司五家。廣東土司一家。共三百五十九家。其官雖世及。而請襲之時。必以竝無世襲之文上請。所奉進止。亦必以姑准任事。仍不世襲爲詞。蓋其相沿體式如此。欲以示駕馭之權。不容其據譜而索故物也。然明自中葉後。撫綏失宜。威柄日弛。諸土司叛服不常。僅能羈縻。勿絕而已。我國家聲靈赫濯。逆命者必誅。舊籍所載。大半皆已改土歸流。其存者亦無不革心順化。比於郡縣。此書中所列

皆前代一時苟且之制。本不足道。以明史土司列傳。祇記其征伐刑政之大端。而於支派本末。未能具晰。是編詞雖俚淺。而建置原委。一一可徵。存之亦足資考證焉。其地雖在中外之間。與郡縣牧守稍殊。而受敕印。襲爵祿。納租賦。供力役。隨征調。實與官吏不殊。故明史不與外國同傳。今亦附載於明代職官之末焉。

【詞林典故八卷】 乾隆九年。重修翰林院落成。賜宴賦詩。因聖駕臨幸。命掌院學士鄂爾泰。張廷玉等。纂輯是書。乾隆十二年。告成奏進。御製序文刊行。凡八門。一曰臨幸盛典。二曰官制。三曰職掌。四曰恩遇。五曰藝文。六曰儀式。七曰廨署。八曰題名。臨幸盛典。卽述乾隆甲子燕飲廣歌諸禮。以爲是書所緣起。故弁冕於前。官制職掌。皆由西漢以至國朝。以待詔之選。寫書之官。皆自漢肇其端也。恩遇斷自唐代。以專官自唐代始也。於列聖及我皇上寵渥之典。別分優眷。遷擢。侍宴。賚予。詞科考試。議敍。贈卹。八子目。著聖代右文。遠逾前古也。藝文。惟收唐以來御製及應制諸作。而詞館唱和不與焉。美不勝收也。儀式。廨署。亦皆斷自唐代。與恩遇門同例。題名。則惟載國朝。近有徵而遠難詳也。考翰林有志自唐李肇始。洪遵輯而錄之。凡十一家。然皆雜記之類也。其分條列目。彙爲一編者。自程俱麟臺故事始。陳騏以下。作者相仍。然皆僅記一代之事。朱彝尊作瀛洲道古錄。又於今制弗詳。故張廷玉等進書表稱。槐廳芸署。不少前聞。劉井柯亭。獨饒故事。但記載非無散見。而蒼萃罕有全書。今仰稟聖裁。始成巨帙。元元本本。上下二千載。始末釐然。稽古崇儒之盛。洵前代之所未有矣。

【欽定國子監志六十一卷】 乾隆四十三年奉敕撰。先是國子祭酒陸宗楷等。輯太學志進呈。而所述

沿革故實濫載及唐宋以前殊失限斷。乃詔重爲改定。斷自元明。蓋本朝國子監及文廟皆因前代遺址。其締構實始於元初也。首爲聖諭二卷。以記褒崇先聖訓示儒林之大法。次御製詩文七卷。備錄列朝聖文。皇上宸翰。次詣學二卷。紀親祀臨雍之禮。次廟制二卷。前列圖說。後志建葺年月規制。次祀位二卷。詳載殿廡及崇聖祠諸位號。次禮七卷。分記釋奠釋菜釋褐獻功告祭諸儀。及祭器圖說。次樂六卷。分記樂制樂章律呂舞節二表。及禮樂諸器圖說。次監制一卷。詳述條規。次官師五卷。載設官典守儀制銓除題名表。次生徒七卷。載員額考校甄用及外藩之入學者。次經費四卷。恩賚歲支俸給備載焉。次金石五卷。冠以欽頒彝器圖說。御製諸碑。併元以來進士題名碑。而殿以石鼓圖說。次經籍二卷。具載賜書及版刻之目。次藝文二卷。則列諸臣章奏詩文及諸論著。識餘二卷。曰紀事。曰綴聞。竝摺摭雜記。以備考核。識大識小。罔弗詳賅。於以誌國家重道崇儒。作人訓俗之盛。較諸監臣之初編。如葦籥土鼓。改而爲韶鈞之奏矣。

【欽定歷代職官表六十三卷】 乾隆四十五年奉敕撰。粵自龍鳥水火肇建官名。然夏商以前。書闕有間。遺制不盡可考。其可考者。惟周禮爲最詳。迨秦漢內設九卿。外置列郡。而官制一變。東京以後。事歸臺閣。雖分置尚書六部。而政在中書。其權獨重。漢魏之制。至唐宋而又一變。明太祖廢中書省。罷丞相。盡歸其職於六部。永樂間復設內閣。而參以七卿。唐宋之制。至是而又一變矣。其間名號品數。改革紛繁。大抵勢足以相維。則乾綱不失。權有所偏屬。則魁柄必移。故官制之得失。可以知朝政之盛衰也。我國家稽古建官。循名核實。因革損益。時措咸宜。我皇上朗照無私。權衡獨秉。舉直錯枉。宮府肅清。尤從來史冊所未

有。復念歷朝官制典籍具存。宜備溯源流。明其利弊。庶前規可鑑。法戒益昭。乃特命四庫全書館總纂官內閣學士。今陞兵部右侍郎臣紀昀。光祿寺卿。今陞大理寺卿臣陸大理。寺卿臣陸錫熊。翰林院編修。今陞山東布政使臣孫士毅。總校官詹事府少詹事。今陞內閣學士臣陸費墀等。考證排次。輯綴是編。分目悉準今制。凡長貳僚屬具列焉。明綱紀也。其兼官無正員。而所掌綦重。如軍機處之類。亦別有專表。崇職守也。八旗及新疆爵秩。前所未有者。竝詳加臚考。著聖代之勳建。遠邁邃古也。或古有而今無。或先置而後廢。竝爲採掇。別附於篇。備參訂也。每門各冠以表。表後詳敘建置。首列國朝。略如唐六典之例。次以歷代。則節引諸書。各附案語。以疏證其異同。上下數千年。分職率屬之制。元元本本。罔弗具焉。考將相及百官公卿之有表。始自馬班二史。後如唐書之宰相表。宋史之宰相表。明史之內閣七卿表。俱沿其例。然所紀僅拜罷年月。與官制無關。且斷代爲書。不相通貫。尋檢頗難。至鈔撮故實。如孫逢吉職官分紀之類。又但供詞藻。於實政無裨。是書發凡起例。悉稟睿裁。包括古今。貫串始末。旁行斜上。援古證今。經緯分明。參稽詳密。不獨昭垂奕禩。爲董正之鴻模。卽百爾臣工。各明厥職。用以顧名而思義。亦益當知所做勛矣。

右職官類官制之屬十五部三百六十五卷皆文淵閣著錄

【州縣提綱四卷】永樂大典本 不著撰人名氏。楊士奇文淵閣書目題陳古靈撰。古靈者。宋陳襄別號也。襄字述古。侯官人。慶歷二年進士。官至右司郎中樞密直學士。事蹟具宋史本傳。史稱其莅官所至。必講求民間利病。沒後。友人劉彝視其篋。得手書數十幅。皆言民事。則此書似當出於襄。然襄所著古靈集。尙傳於世。無一字及此書。又所著易講義。郊廟奉祀禮文。校定夢書等。見宋史藝文志。福建通志說鄂中。

不言更有此書。晁陳二家書目亦皆不著錄。書內有紹興二十八年語。又有昔呂惠卿。昔劉公安世語。考襄卒於元豐三年。距南渡尙遠。不應載及紹興。且劉呂皆其後進。不應稱昔。其非襄撰。明甚。今永樂大典所載本。蓋據元初所刻。前有吳澄序。止言前修所撰。不著其名氏。蓋澄亦疑而未定。知文淵閣書目所題。當出譌傳。不足據矣。其書論州縣莅民之方。極爲詳備。雖古今事勢未必盡同。然於防姦釐弊之道。抉摘最明。而首卷推本正己省身。凡數十事。尤爲知要。亦可爲司牧之指南。雖不出於襄手。要非究心吏事。洞悉民情者。不能作也。

【官箴一卷】浙江鮑士恭家藏本。宋呂本中撰。本中有春秋集解。已著錄。此乃其所著居官格言。凡三十三則。宋史本中列傳。備列其著作之目。不載是書。然藝文志雜家類中。乃著錄一卷。此本載左圭百川學海中。後有寶祐丁亥永嘉陳昉跋。蓋卽昉所刊行。或當日偶然題記。如歐陽修試筆之類。本非有意於著書。後人得其手稿。傳寫鐫刻。始加標目。故本傳不載。歟。本中以工詩名家。然所作童蒙訓。於修己治人之道。具有條理。蓋亦頗留心經世者。故此書多閱歷有得之言。可以見諸實事。書首卽揭清慎勤三字。以爲當官之法。其言千古不可易。王士禎古夫於亭雜錄曰。上嘗御書清慎勤三大字。刻石賜內外諸臣。案此三字。呂本中官箴中語也。是數百年後。尙蒙聖天子採擇其說。訓示百官。則所言中理可知矣。至其論不欺之道。明白深切。亦足以資儆戒。雖篇幅無多。而詞簡義精。固有官者之龜鑑也。

【百官箴六卷】內府藏本。宋許月卿撰。月卿字太空。後更字宋士。婺源人。始以軍功補校尉。理宗時換文資就舉。以易魁江東。廷對賜進士及第。官至浙江西運幹。賈似道當國。召試館職。語不合。罷去。閉門著

書自號泉田子。宋亡不仕。遁蹟十年乃卒。亦志節之士也。是書仿揚雄官箴。分曹列職。各申規戒。考宋史百官志。經筵乃言路兼官。二府掾乃樞密中書屬吏。參知政事以門下中書侍郎爲之。登聞院隸諫議。進奏院隸給事中。俱轄於門下省。軍器監文思院。俱轄於工部。是書皆各自爲箴。蓋以所掌之事區分。故旣列本職。又及其兼官。旣列總司。又及其所分掌。非複出也。又考永樂大典所載宋何異中與百官題名。雖殘闕不完。而所標官署職掌。與此書頗有異同。蓋自元豐變制以後。品目至爲淆雜。南渡以後。分析併省。益以靡恆。此書據一時之制言之。故互有出入也。前有月卿進表。稱百官箴。竝發凡言例。共七帙。而今止六卷。校以次第。實無遺漏。殆原本凡例自爲一卷。傳錄者合併之歟。虞人之箴。遠見左傳。繩闕匡違。其風自古。月卿效法其體。雖申明職守。僅託空言。而具列官邪。風戒有位。指陳善敗。觸目驚心。亦未嘗無百一之裨焉。

【畫簾緒論一卷】浙江鮑士恭家藏本。宋胡太初撰。太初天台人。端平乙未。其外舅陶某。出宰香溪。太

初因論次縣令居官之道。凡十五篇以貽之。後十七年。爲瀆祐壬子。太初出守處州。越明年復得是稿於其戚陶雲翔。遂鈔諸版。以授屬縣。其目。首曰盡己。次曰臨民。曰事上。曰察案。曰御史。曰聽訟。曰治獄。曰催科。曰理財。曰差役。曰賑恤。曰行刑。曰期限。曰勢利。而終之以遠嫌。條目詳盡。區畫分明。蓋亦州縣提綱之類也。書中臚列事宜。雖多涉宋代條格。與後來職制。不盡相合。然其大旨。以潔己清心。愛民勤政。爲急務。言之似乎平近。而反覆推闡。實無不切中事情。世說新語載傅氏有理縣譜。其書不傳。牧民者能得是編之意。而變通之。則此一卷書亦足以補其闕矣。

【二事忠告四卷】桂林府同知李文藻刊本。元張養浩撰。養浩字希孟，號雲莊，濟南人。官至禮部尚書。參議中書省事。天歷中拜陝西行臺中丞。卒諡文忠。事蹟具元史本傳。養浩爲縣令時，著牧民忠告二卷。凡十綱七十二子目。爲御史時，著風憲忠告一卷。凡十篇。入中書時，著廟堂忠告一卷。亦十篇。其言皆切實近理，而不涉於迂闊。蓋養浩留心實政，舉所閱歷者著之，非講學家務爲高論，可坐言而不可起行者也。明張綸、林泉隨筆曰：張文忠公三事忠告，誠有位者之良規，觀其在守令則有守令之式，居臺憲則有臺憲之箴，爲宰相則有宰相之謨，醇深明粹，真有德者之言也。考其爲人，能竭忠徇國，正大光明，無一行不踐其言云云。其推挹可謂至矣。三書非一時所著，本各自爲編。明洪武二十二年，廣西按察司僉事揚州黃士宏合爲一卷刻之。總題曰爲政忠告。陳璉爲序。案此本序文中稱爲政忠告，而其標題亦稱三事忠告。序蓋重刻所追改。宣德六年，河南府知府李驥重刻，改名三事忠告。考書稱任人準夫，牧作三事，詩稱三事大夫，皆在王左右之尊階，施於廟堂忠告，猶爲近之。御史縣尹不在是列，如曰以三職所治爲三事，則自我作古，轉不及爲政之名。爲該括一切矣。蓋明人書帕之本，好立新名，而不計其合於古義否也。相沿已數百年，不可復正。今姑以通行之名著錄，而附訂其乖舛如右。

【御製人臣儆心錄一卷】順治十二年，世祖章皇帝御撰。凡八篇。一曰植黨，二曰好名，三曰營私，四曰徇利，五曰驕志，六曰作僞，七曰附勢，八曰曠官。前有御製序，蓋因勳臣譚泰、石漢、大學士陳名夏等先後以驕怙伏法，因推論古今來姦臣惡迹，訓誡羣臣，俾其知炯鑑也。夫一氣流行，化生萬品，鸞臯竝育，穀稗同滋，實理數之不得不然。故有君子必有小人，雖唐虞盛時，四凶亦廁名於朝列，無論秦漢以下，也不幸

而遇昏亂之世。則匪人得志。其禍遂中於國家。前明諸權倖是也。幸而遇綱紀修明之時。則翔陽所照。物無匿形。雖百計彌縫。終歸敗露。則陳名夏諸人是也。在我世祖章皇帝。聖裁果斷。睿鑒英明。足以駕馭羣材。照臨萬象。雷霆一震。鬼域潛蹤。雖有僉壬。諒不敢復蹈覆轍。而聖人慮周先事。杜漸防微。恐小人惟利是營。多昏其智。於陳名夏等。不以為積愆已稔。自取誅夷。反以為操術未工。別圖揜蓋。因特頒宸翰。普示班聯。曲推其未發之謀。明繪其欲施之策。俾共知所聚黨而私議者。已畢在洞照之中。如九金鑄鼎。先圖魍魎之形。儻逢不若。皆可以指而目之。名而呼之。山鬼之伎倆。自窮而無所逞也。國家重熙累洽。百有餘年。列聖相承。竝乾剛獨斷。從無如前代姦臣。得以盜竊魁柄者。豈非祖宗貽謀。有以垂萬年之家法哉。

右職官類官箴之屬。六部十七卷。皆文淵閣著錄。

卷八十

史部三十六

職官類存目

【歷代銓政要略一卷】編修程晉芳家藏本 舊本題宋楊億撰。億字大年。浦城人。雍熙初。年十一。召試

詩賦。授祕書省正字。淳化中。命試翰林。賜進士第。天禧中。官至工部侍郎。翰林學士兼史館修撰。卒諡曰文事蹟具宋史本傳。此書宋史藝文志不著錄。億本傳亦不載。惟曹溶學海類編收之。細核其文。乃冊府元龜銓政一門總序也。已為割裂作偽。又億雖預修冊府元龜。而據晁氏讀書志。總其事者。尚有王欽若。



同修者更有錢惟演等十五人。作序者亦有李維等五人。億於諸序。不過奉敕點竄。何所見而此序出億手。此真隨意支配者矣。

【太常沿革二卷】永樂大典本。元任栻撰。栻始末未詳。此書乃其爲太常博士時所修。前有危素序。素時亦爲太常博士故也。上卷志沿革。下卷皆職官題名。始自中統。迄於至正。所載當時奏牘文移。皆從國語譯出。未經修潤。又案元太常集禮一書。中載官屬職掌。曰都監。曰祭祠局。曰鑾儀局。曰法物庫。曰神廚局。皆有事於太廟之官。而以署令一人。丞一人。統之。此上下兩卷中。俱未載及。轉以典書附於卷末。義例殊不可解。危素序云。寺升院。院有正。從二品之異。其增損官吏。祿秩弗同。具載此書。然大要已具於元史矣。

【南臺備要二卷】永樂大典本。元劉孟保等撰。前有江南行御史臺都事索元偕序。稱至元十四年。立行臺於維揚。以式三省。以統諸道。卽今江南諸道行臺御史之在集慶者也。中臺嘗併其官屬除拜。合爲一書。刊布中外。所謂憲臺通紀是已。至正癸未。蕞城董公守簡授湖廣行省中丞。欲別爲載籍。以便觀覽。迺命掾屬劉孟保等。歷披案牘。稽覈故實。裒集成編。則此書乃補憲臺通紀之遺者也。考憲臺通紀。久已散佚。永樂大典。亦僅存其卷首。故不著於錄。而惟存此書之目焉。

【官職會通二卷】安徽巡撫探進本。明魏校撰。校有周禮沿革傳。已著錄。此書又敷衍其說。以明之六部。配周之六官。其所屬官。因以附焉。僅有天官地官春官夏官四篇。蓋亦未成之稿。每述一官。必曰。今欲正某官之職云云。然言之則成理。行之則必窒。自漢以來。未有以周禮致太平者也。

【南廳志二十四卷】浙江汪啓淑家藏本 明黃佐撰。佐有泰泉鄉禮。已著錄。南都太學。建於明太祖吳元年。景泰中祭酒吳節嘗撰志一十八卷。嘉靖初祭酒崔銑重纂未就。佐得其遺牘。因復加修訂。以吳志爲本。而增損成之。凡事紀四職官表二。雜考十二。列傳六。書法一。準史例。頗爲詳備。惟音樂考一門。多泛論古樂。皆佐一己之見。於太學制度無涉。殊失限斷。其第十八卷經籍考。當時以委助教梅鶯成之。鶯學問淹貫。故敘述亦具有本末。書成於嘉靖二十二年。而中有萬歷中事。蓋後人隨時續添者也。

【虔臺志十二卷】浙江范懋柱家天一閣藏本 明蕭根等撰。根爵里未詳。宏治甲寅汀漳盜起。楚粵之不逞者和之。於是設巡撫都御史。治贛州。以控制諸省。至甲子罷置。正德庚午盜攻武平縣。乃復建焉。嘉靖壬寅巡撫虞守愚命根等編纂虔臺始末爲此書。序次草創。略備故事而已。贛州在陳以前曰南康。至隋改爲虔州。宋紹興二十二年校書董德元上言。虔州號虎頭城。非佳名。廷議以虔有虔劉之意。因改名贛州。後人詞翰兼用古名。然施於詩賦則可。此記明代職官。而用南宋以前之地名。殊於體例未安。且名虔州時無御史臺。於文義亦爲杜撰。明人著述。往往如斯。糾之不可勝糾也。

【呂梁洪志一卷】戶部尙書王際華家藏本 明馮世雍撰。世雍江夏人。嘉靖癸未進士。官工部主事。明時運道自徐州沂呂梁洪入濟。設洪夫以牽纜。歲命工部屬官一員董其事。謂之呂梁分司。世雍嘗領其職。因述前後建置始末。及官署祠廟。歷任姓氏。以成斯志。凡八篇。篇首各有序。末復繫以贊語。

【鄖臺志略九卷】浙江范懋柱家天一閣藏本 明徐桂撰。桂潛山人。嘉靖乙未進士。官鄖陽府知府。先是成化初。原傑撫定荆襄流民。置鄖陽府。設提督撫治一員鎮之。嘉靖二十五年。慈谿葉照以右副都御

史領其任。桂等輯比事略爲此書。前二卷載建置輿地公廨官職。後七卷爲劄奏政賦兵防著述。此本有嘉靖以後事。則金臺于湛等繼爲撫治。又附益之也。

【虔臺續志五卷】浙江范懋柱家天一閣藏本。明陳燦撰。燦里貫未詳。官贛州府教諭。此書乃嘉靖中巡撫南贛等處右副都御史談愷屬燦等所輯。紀宏治以後設官沿革及分地統轄之制。以續蕭根之書。首一卷爲輿圖考。後四卷則編年紀事。據其凡例。稱於虔臺志悉仍其舊。凡所損益。別爲一編。蓋視舊志又稍變其例矣。

【南京太常寺志十二卷】浙江巡撫採進本。明汪宗元撰。宗元號春谷。崇陽人。嘉靖己丑進士。官至總理河道右副都御史。是書乃宗元爲南京太常寺卿時所輯。分謨訓規制職官禮書樂書舊制薦獻祭告祭器祿食夫役列傳爲十二門。所記各祀祝文陳設及樂章樂器。皆較明會典集禮諸書爲備。至於薦獻品物應祀宮觀及署中藏經字號。存貯什器。皆條列不遺焉。

【南京太僕寺志十一卷】浙江巡撫採進本。明雷禮撰。禮有明六朝索隱。已著錄。是書乃其官南京太僕寺少卿時所作。據其凡例。稱首載洪武以後歷朝諭旨。次以事例。官司轄屬規制。官田種馬草場冊籍。俸徭九志。而列傳遺文終焉。茲本祇十一卷。草場以下全佚。非完書矣。

【太僕寺志十四卷】浙江巡撫採進本。明顧存仁撰。存仁字伯剛。太倉人。嘉靖壬辰進士。官至太僕寺卿。是書分官職題名馬政事例蠲貸苑馬祠祀官署庫藏點調軍馬圖文錄十一門。然脫略太多。如馬政一門。上沿歷代。而漢以後各史所載。如梁之南牧。左右牧。北齊之乘黃。左右龍各署。皆闕而不敘。文錄一

門載漢之天馬歌。唐杜甫之驄馬行。是類何預太僕事。詩集充棟。又烏可勝收乎。

【浙省分署紀事本末六卷】兩淮鹽政探進本 明茅坤撰。坤有徐海本末。已著錄。是書之作。蓋以湖州

烏戍一鎮。界連六縣。跨帶兩省。姦盜易於窟穴。郡人致仕副使施儒。以嘉靖十七年疏於朝。請設縣不果。議置通判。後因通判權輕。不足以彈制諸屬。旋亦汰除。萬歷元年始設同知。以統之。因作是書。以紀其始末。

【留臺雜記八卷】兩淮鹽政探進本 明符驗撰。驗有革除遺事。已著錄。是編乃其爲巡按南直隸御史時所作。專記南京御史臺故事。因以上溯列朝設官命職之由。分爲十類。曰天文。曰院址。曰院臺。曰官制。曰職守。曰俸秩。曰廨宇。曰職官表。曰宸翰。曰碑記。驗自爲序。述其凡例。然輿地之書。動陳星野。已屬影響之談。一官一署。而首志天文。其亦迂而鮮要矣。

【南京吏部志十五卷】浙江巡撫探進本 明汪宗伊撰。宗伊字子衡。崇陽人。嘉靖戊戌進士。官至南京吏部尚書。是編乃其爲文選郎中時所作。首聖訓。次建官。次公署。次職掌。次歷官表傳。次藝文。前有宗伊所作志引。謂白之尚書吳嶽。創爲部志。又諮之曾官吏部者。侍郎李棠。大理卿杜拯。太僕卿殷邁。鴻臚卿孫鑑。應天府丞邱有巖。郎中顧闕。鄒國儒。袁尊尼。傅良諫。主事蔡悉。聶廷璧。網羅散失。以成此編。頗爲詳悉。黃氏千頃堂書目載宗伊尚有留銓志餘二卷。蓋卽補志中所遺者。今其書未見云。

【吏部職掌】無卷數 兩淮馬裕家藏本 明黃養蒙撰。方九功王篆續修。養蒙南安人。嘉靖辛丑進士。官至戶部右侍郎。九功南陽人。嘉靖丙辰進士。官至南京工部右侍郎。篆有江防考。已著錄。是編於明嘉

隆以前吏部制度沿革載之最悉。蓋排纂案牘而爲之。猶今之六部則例也。

【念初堂集十一卷】江西巡撫探進本。不著撰人名氏。首題念初堂集。其書則志太學之略也。案鄧元

錫兩史下編載嘉靖間王祭酒材官司業時考稽典訓作太學志六編編爲之序。序各有志。竝鈔撮其略云云。蓋卽是書也。書列典制謨訓禮樂政事論議人材六門。門各分上下二卷。材江西新城人。嘉靖辛丑進士官至太常寺卿。掌國子監祭酒事。元錫竟稱爲祭酒。非也。

【公侯簿三卷】浙江范懋柱家天一閣藏本。不著撰人名氏。前有嘉靖九年公牘一篇。又有嘉靖二十六年公牘一篇。蓋吏部驗封司所存冊籍。相續編纂者也。鄭汝璧明功臣封爵考稱舊有底簿。殆卽指是書矣。

【詞林典故一卷附翰苑須知一卷】浙江巡撫探進本。明張位撰。位有問奇集。已著錄。此乃其官翰林學士時所輯詞館通行典例。自經筵日講。以迄輿從服色。凡分三十二門。翰苑須知則庶常館規及俸祿錢糧數目。當時刊版置院中。入館者人給一冊。然率據案牘原文。不加潤飾。往往鄙俚可笑。不足以繼翰林志翰苑羣書後也。乾隆十有二年。我皇上嘉惠詞垣。徵求文獻。特命輯詞林典故一書。本末源流。粲然具備。木天佳話。榮冠古今。是編殘闕之餘。蓋不足以爲典據。今姑附存其目焉。

【明功臣封爵考八卷】浙江范懋柱家天一閣藏本。明鄭汝璧撰。汝璧有明帝后紀略。已著錄。是編成於萬歷丙子。乃其爲吏部驗封郎中時所輯。紀明代諸臣封爵。凡分類二十。曰開國。曰靖難。曰征西。曰征交趾。曰征南。曰征北。曰征蠻。曰征番。曰禦寇。曰捕反。曰備倭。曰戰勝。曰戰歿。曰歸附。曰推戴。曰海運。曰營

建曰迎立曰奪門曰外戚。其以恩澤恩幸方術及追贈封者。竝附錄之。分世封除封爲二類。而採秀文宗圖及鄭曉吾學編本傳附入。間以所見聞補其闕略。起於洪武。迄於隆慶。據其自序。蓋以驗封司舊有功臣底簿。病其弗全。因續爲補綴。成此帙云。

【節閣漫錄】無卷數

浙江范懋柱家天一閣藏本

不著撰人名氏。據焦竑國史經籍志。載是書十卷。

題張元忭撰。二人相去不遠。必有據也。元忭有紹興府志。已著錄。是書所錄。皆明成祖至武宗時翰林除授遷改之事。編年紀載。亦間有論斷。首題洪武三十五年者。成祖革除建文四年年號。仍稱洪武三十五年故也。

【掖垣人鑑十七卷附錄一卷】兩淮鹽政採進本

明蕭彥撰。彥字思學。涇縣人。隆慶辛未進士。官至湖

廣總督。是書乃萬歷二十年。彥爲兵科給事中時。與同官王致祥等同輯。明代六科名姓鄉貫出處始末。共爲一編。以天順以前爲前集。成化以後。迄萬歷爲後集。首冠以官制沿革。及兩朝謨訓各一卷。而以題名碑記諸篇附於其末。

【職官志一卷附后紀妃嬪傳外戚傳二篇】副都御史黃登賢家藏本

不著撰人名氏。所紀惟部院寺

監諸司職掌。不及武臣及外官。蓋非足本也。其敍歷朝官制。至穆宗而止。間有稱今上云者。蓋書成於萬歷中。記載寥寥。不足以存掌故。末附后紀。稱史官楊繼禮撰。此書殆卽繼禮史局殘本。偶留於世。歟。繼禮華亭人。萬歷壬辰進士。

【楚臺記事七卷】浙江汪啓淑家藏本

明李天麟撰。天麟字公振。武定人。萬歷庚辰進士。由牧馬千戶

所軍籍中式。故自稱燕人。官至監察御史。巡按湖廣。是書即在湖廣所作。分地理圖說爲四卷。兵糧圖說爲三卷。又雜載章奏禮儀堂規。供應等舊例。猥雜煩瑣。與書吏簿籍無異。其載贖餽賀儀銀數多寡。以官階大小爲準。可見當時苞苴陋習。而公然載之簡牘。毫無顧憚。尤足徵明政之不綱也。

【符司紀六卷】副都御史黃登賢家藏本

明劉日升撰。日升廬陵人。萬歷庚辰進士。官至應天府尹。是

編。乃其官尙寶司卿時所輯。具載典壘事規。及各官牙牌。各府衛金牌令牌之制。後有附錄一卷。爲秦嘉楨所續輯。嘉楨德清人。續此書時。官尙寶司丞。其始末未詳。

【舊京詞林志六卷】內府藏本

明周應賓撰。應賓有九經考異。已著錄。應賓嘗以左諭德少詹事。兩掌

南京翰林院事。故著此書專記南院故事。永樂以後。定都北京。事有關於南院者亦錄之。分紀事紀典紀官三門。洪武初。建翰林國史院於皇城內。賜扁曰詞林。洪武十四年。改翰林國史院爲翰林院。又別建廡舍。非故地矣。獨詞林之稱。自洪武以後皆沿之。故應賓取以爲名焉。

【南京鴻臚寺志四卷】江蘇周厚培家藏本

明桑學夔撰。學夔濮州人。萬歷壬辰進士。官光祿寺少卿。

攝鴻臚寺事。明初置侍儀司。洪武九年。改殿廷儀禮司。三十年始改爲鴻臚寺。永樂北遷。乃以故署之在

留都者。加南京二字。而禮儀亦因之有繁簡隆殺。其後竟習簡易。故學夔創爲寺志。以復典章之舊。然昧於取裁。不諳體例。屬官考語。備載於冊。而卿丞諸人之傳。率全錄焦竑獻徵錄舊文。漫無刪節。至以王守仁會官此職。遂以良知講學語。書之累牘。尤支蔓之甚矣。

【官制備攷二卷】浙江汪啓淑家藏本

舊本題明李日華撰。日華有梅墟先生別錄。已著錄。是書因明

代官制而上溯歷代之沿革。大抵取備書啓之用。舛漏頗多。不足以備考證。未附文武爵秩數條。竝著京外官之稱呼。尤未免於舛陋。疑日華未必至此。殆坊賈託名也。

【續宋宰輔編年錄二十六卷】安徽巡撫探進本 明呂邦燿撰。邦燿字元韜。錦衣衛籍。順天人。萬曆辛

丑進士官至通政司右參議。邦燿既刊行宋徐自明宰輔編年錄。復作是編以續之。起寧宗嘉定九年。終衛王昺祥興二年。其體例皆仿原書。而詳略失宜。遠不及自明之精核。蓋此書大旨。在紀拜罷歲月。以備考證。至其人行事本末。則史家自在專傳。原無庸複引繁稱。自明於每人略述梗概。最爲得體。邦燿乃并朝廷之事。廣爲摭錄。正史以外。竝據諸說以附益之。泛濫殊甚。又自明每人具載命官及罷免制詞。足徵一典故。嘉定以後。雖無專書可考。而見於南宋文集者。尚有流傳。邦燿不能蒐輯增補。而反斥其有無不足。重輕尤爲寡識。至如元順帝爲瀛國公子。不獨說本荒唐。亦與宰輔編年全無關涉。乃亦累牘連篇。詞繁不殺。真可謂漫無體要者矣。

【南京工部志十八卷】兩淮鹽政探進本 明朱長芳撰。長芳上海人。南京國子監生。天啓初編修神宗

光宗兩朝實錄。博採志乘。諸部寺舊無志者。咸創爲之。南京工部尙書何熊祥。因使長芳輯舊牘爲此編。

【南京都察院志四十卷】兩淮馬裕家藏本 明施沛撰。沛始末未詳。其修此書時。則爲南京國子監生。

時董其事者。爲操江副都御史徐必達。亦天啓初因修兩朝實錄而作也。

【南京行人司志十六卷】浙江巡撫探進本 明翁逢春撰。逢春吳縣人。南京國子監生。分詔命建官公

署儀注奏疏年表列傳藝文八門。董其事者。爲南京行人司左司副彭維成。前有維成序。序末私印作萬



歷給諫四字。考維成字元性。廬陵人。萬曆辛丑進士。以刑科給事中。請是官。故自標此目。然既志行人。宜以行人爲斷。是書乃載維成爲給事中。時奏疏是六科志。非行人科志矣。又載維成一切來往書牘。居藝文十之五六。是維成之別集。非官書矣。殆全不知體例爲何事也。

【留都武學志五卷】兩淮鹽政探進本。明徐伯徵撰。伯徵字孺臺。海寧人。萬曆己未進士。官至揚州府知府。明之武學。建於正統壬戌。因御史彭勛之請。選教授訓導等官。以專教京衛武官之子。有南京國子監祭酒陳敬宗所撰碑。備載始末。是編乃天啓三年。伯徵官南京武學教授時所著。分建置典禮制令職官選舉人物藝文七門。

【明文武諸司衙門官制五卷】江西巡撫探進本。不著撰人名氏。前有題詞。稱官制舊有成書。久而多譌。近兩淮運司翻刻者。彼善於此。而未嘗訂正。亦非善本。因照會典一統志。及現行事宜。採輯成編。以廣其傳。未署新喻縣丞陶承慶校正。廬陵縣末學葉時用增補。乃江西書賈刊行之本也。所列官制。大抵以萬曆初年爲斷。第五卷內附載上任選擇日期。而竝列天體赤口日等圖。彌爲猥雜。殆不足譏。

【官爵志三卷】浙江吳玉堦家藏本。明徐石麒撰。石麒字寶摩。嘉興人。天啓壬戌進士。授工部主事。忤魏忠賢削籍。崇禎中。官至吏部尙書。南都破後。不食死。事蹟具明史本傳。是志述有明一代官制。歷引前代沿革。互相參證。引據頗爲詳核。然大抵爲通典文獻通考所已具。

【古今官制沿革圖】無卷數。兩江總督探進本。明王光魯撰。光魯有閱史約書。已著錄。是書載秦漢迄於宋元。凡官制之升降沿革。頗詳悉。而限於尺幅。考據亦多所未備。明宜興路進。校刊金履祥通鑑前

編首列古今官制未著撰人姓名今校之悉與此合蓋卽光魯本也。

【明官制五卷】浙江巡撫探進本 不著撰人名氏備錄明代直省各府州縣文武官員品秩暨道里遠

近編戶多寡到任期限皆採之明會典及一統志諸書蓋坊間所刊以便仕宦之檢閱不足以言著書也。

【歷代銓選志一卷】編修程晉芳家藏本 國朝袁定遠撰定遠里貫未詳此書其官吏部文選司郎中

時作也歷敍各朝銓政選舉之法略而寡當如敍魏晉九品官人之制而失載漢志限年之沿革宋分四

郡餘郡之歲舉梁代中正之廢置後魏之中正與吏部竝銓皆歷朝銓選之制悉略而不敍金元銓政載

於史志甚詳亦概略之至謂明興立制入仕之途有三進士監生吏員不知明初三途竝用乃科舉薦能

吏員三途其時應薦者或以賢良方正或以儒士或以秀才或以人才皆官至卿輔非盡在監之監生也

【歷代宰輔彙考八卷】浙江巡撫探進本 國朝萬斯同撰斯同有聲韻源流考已著錄是編取秦漢以

迄元明宰輔分職繫名以便檢核其於官制增損異同之處亦間附案語頗爲簡明然不著拜罷年月視

諸史表例頗爲簡略又如唐代使相以其爲藩鎮加官俱不載錄是也然如李克用朱全忠王智興李載

義韓建等之位冠三師亦祇屬優以空銜竝未嘗入輔左右而顧一概列之則義例亦未能盡歸畫一也

【銓政論略一卷】江蘇巡撫探進本 國朝蔡方炳撰方炳有增訂廣輿記已著錄是書專論唐宋二代

銓政頗爲淺略如謂侍郎起於隋不知梁天監三年已有侍郎之設謂唐選官必試於吏部不知五品以

上之不試至承接他姓以應調乃五代時弊政唐時鮮有宋時科目甚多專舉經明行修賢良方正二科

更見挂漏唯所議明末專拘進士資格之弊立論頗確云。

【文武金鏡律例指南十六卷】內府藏本 國朝凌銘麟撰。銘麟字天石，杭州人。是書成於康熙辛酉，自文武儀注品級以及莅任居官事宜，無不備載。又發律例大旨，而以相傳之案牘爲之證據。蓋亦爲初仕者設也。

【南臺舊聞十六卷】浙江巡撫探進本 國朝黃叔瓚撰。叔瓚有南征記程，已著錄。是書詳述御史典故，凡十三門，每事各註所出之書，頗爲詳備。其曰南臺者，據王士禎分甘餘話，今都察院可稱南臺，不可稱西臺語也。

右職官類官制之屬四十二部，三百五十四卷，內三部無卷數，皆附存目。

【牧民忠告一卷】直隸總督探進本 元張養浩撰。養浩有三事忠告，已著錄。此卽三事中的一種。魏裔介摘出別行，非完書也。

【官箴一卷】左都御史張若淮家藏本 明宣宗章皇帝御製。自都督府至儒學，凡三十五篇。前有宣德七年六月諭旨一道，稱取古人箴儆之義，凡中外諸司各著一篇，使揭諸廳事，朝夕覽觀。庶幾君臣交儆之道。蓋當時嘗以頒行者嘉靖戊戌，南京國子監祭酒倫以訓復刊布之。後載宣宗御製廣寒殿記一首。玉簪花賦一首。詩二十七首。詞曲二首。不知何人所附，叢雜不倫，殊乖編錄之體。

【牧津四十四卷】浙江巡撫探進本 明祁承燦撰。承燦字爾光，山陰人。萬曆甲辰進士。官至江西布政司參政。其書採輯歷代循吏事實，分類編次，首列緝概一卷，分爲五目：一考名，二稽制，三述意，四論世，五辨類。以下凡四十四卷，分經濟消弭匡定節義當機惠愛化導勸節集事政才政術真誠清德砥躬風力。

守正嚴肅敦厚忠信明決得情察姦矜慎平恕執持識見崇體任人治賦救荒詰盜儒治三十二類。每類前各有小序。徵采既廣。不無煩碎叢雜之病。

【明職一卷】浙江巡撫採進本。明呂坤撰。坤有四禮翼。已著錄。坤於萬歷壬辰。以僉都御史巡撫山右。

作此篇以申飭屬吏。自弟子員之職。至督撫之職。統十八篇。於省府州縣職官利弊得失。言之甚悉。

【仕學全書三十五卷】江西巡撫採進本。明魯論撰。論有四書通議。已著錄。是書初名聞見錄。以明代

官制法令。仿周禮六官分類編載。各附論斷。蓋亦備場屋對策之用者。分上下二編。上編爲六部大政。下篇則自京朝直省各官職守。終於掖庭宗藩。

【政學錄五卷】直隸總督採進本。國朝鄭端撰。端字司直。棗強人。順治己亥進士。官至江南巡撫。是編

原本呂坤余自強兩家之書。而參酌之內。而閣部科道。外而督撫司道守令。應行事宜。咸載利弊。

【爲政第一編八卷】內府藏本。國朝孫鉉撰。鉉字可菴。錢塘人。其書所載。皆州縣職事。分時宜刑名錢

穀文治四類。條目瑣碎。議論亦鄙。蓋幕客之兔園冊。不足資以爲治也。

【百僚金鑑十二卷】內府藏本。國朝牛天宿撰。天宿字觀薇。章邱人。康熙中。官瓊州府知府。是編前爲

總論七卷。以中外職官爲次。取古之稱職者。略載事蹟。而以歷代官制沿革。弁諸條之首。八卷至十卷。別

列廉潔度量用人刑賞恬退忠烈武功七門。亦略摭事實。挂一漏萬。十一卷則載古來箴銘訓頌之類。而

以己作參錯其中。至十二卷。則自敝其粵中政績。而以去思碑終焉。未免近於自炫矣。

右職官類。官箴之屬。八部。一百七卷。皆附存目。

卷八十一

史部三十七

政書類一

志藝文者。有故事一類。其間祖宗創法。奕葉慎守。是爲一朝之故事。後鑒前師。與時損益者。是爲前代之故事。史家著錄。大抵前代事也。隋志載漢武故事。濫及稗官。唐志載魏文貞故事。橫牽家傳。循名誤列。義例殊乖。今總核遺文。惟以國政朝章六官所職者。入於斯類。以符周官故府之遺。至儀注條格。舊皆別出。然均爲成憲。義可同歸。惟我皇上制作日新。垂謨冊府。業已恭登新笈。未可仍襲舊名。考錢溥祕閣書目。有政書一類。謹據以標目。見綜括古今之意焉。

【通典二百卷】內府藏本。唐杜佑撰。佑字君卿。京兆萬年人。以蔭補濟南參軍事。歷官至檢校司徒同中書門下平章事。加太保致仕。諡安簡。事蹟具唐書本傳。先是劉秩做周官之法。摭拾百家。分門詮次。作政典三十五卷。佑以爲未備。因廣其所闕。參益新禮。勒爲此書。凡分八門。曰食貨。曰選舉。曰職官。曰禮。曰樂。曰兵刑。曰州郡。曰邊防。每門又各分子目。自序謂既富而教。故先食貨。行教化在設官。任官在審才。審才在精選舉。故選舉職官次焉。人才得而治以理。乃興禮樂。故次禮次樂。教化墮則用刑罰。故次兵次刑。設州郡分領。故次州郡。而終之以邊防。所載上溯黃虞。訖於唐之天寶。肅代以後。間有沿革。亦附載註中。其中如食貨門之賦稅。載周官貢賦。而太宰所掌九貢之法。失載。載北齊租調之法。河清三年。令民十八

受田輸租調而露田之數失載。錢幣不載。陳永定元年制四柱錢法。權酷不載。後周權酒坊法。選舉門不載。齊明帝時制士人品第有九品之科。小人之官復有五等法。考績不載。宋齊開治民之官以三年六年爲小滿遷換法。職官門如周禮地官有舍人上士二人。掌平宮中之政。乃云中書舍人魏置。又隋書大業時改內史監爲內書監。乃僅云改內史侍郎爲內書侍郎。又集賢殿書院載梁有文德殿藏書。不知宋已有總明觀藏書之所。似此之類。未免閒有挂漏。兵門所列諸子目。如分引退取之。引退佯敗取之。爲二門。分出其不意。擊其不備。攻其不整。爲三門。未免稍涉繁冗。而火獸火鳥之類。尤近於戲劇。州郡門分九州以敘沿革。而信都郡冀州當屬堯而誤屬冀。又極詆水經。及酈道元水經注爲僻書。詭誕不經。未免過當。邊防門所載多數萬里外重譯。乃通之國。亦有僅傳其名。不通朝貢者。既不臨邊。亦無事於防。題曰邊防。名實亦舛。然其博取五經羣史及漢魏六朝人文集奏疏之有裨得失者。每事以類相從。凡歷代沿革悉爲記載。詳而不煩。簡而有要。元元本本。皆爲有用之實學。非徒資記問者可比。考唐以前之掌故者。茲編其淵海矣。至其各門徵引尙書周官諸條。多存舊詁。如食貨門引尙書下土墳壚注。謂壚疎也。與孔疏所引說文黑剛土也互異。又瑤琨篠簜注。篠竹箭。簜大竹。亦傳疏所未備。職官門引周官太宰之屬。有司會逆羣吏之治而聽其會計。註云逆謂受也。受而鉤考之。可知得失多少。較賈公彥疏頗爲明晰。似此之類尤頗有補於經訓。宋鄭樵作通志。與馬端臨作文獻通考。悉以是書爲藍本。然鄭多泛雜無歸。馬或詳略失當。均不及是書之精核也。

【唐會要一百卷】浙江汪啓淑家藏本

宋王溥撰。溥字齊物。并州祁人。漢乾祐中登進士第一。周廣順

初拜端明殿學士。恭帝嗣位。官右僕射。入宋仍故官。進司空同平章事。監修國史。加太子太師。封祁國公。卒諡康定。事蹟具宋史本傳。初唐蘇冕嘗次高祖至德宗九朝之事。爲會要四十卷。宣宗大中七年。又詔楊紹復等。次德宗以來事。爲續會要四十卷。以崔鉉監修。段公路北戶錄。所稱會要卽冕等之書也。惟宣宗以後。記載尙闕。溥因復探宣宗至唐末事。續之。爲新編唐會要一百卷。建隆二年正月奏御。詔藏史館。書凡分目五百十有四。於唐代沿革損益之制。極其詳核。官號內有識量忠諫舉賢委任崇獎諸條。亦頗載事蹟。其細瑣典故。不能概以定目者。則別爲雜錄。附於各條之後。又間載蘇冕駁議義例該備。有裨考證。今僅傳鈔本。脫誤頗多。八卷題曰郊儀。而所載乃南唐事。九卷題曰雜郊儀。而所載乃唐初奏疏。皆與目錄不相應。七卷十卷亦多錯入他文。蓋原書殘闕。而後人妄摭竄入。以盈卷帙。又一別本。所闕四卷亦同。而有補亡四卷。採摭諸書所載唐事。依原目編類。雖未必合溥之舊本。而宏綱細目。約略粗具。猶可以見其大凡。今據以錄入。仍各註補字於標目之下。以示區別焉。

【五代會要二十卷】兩江總督採進本 宋王溥撰。五代干戈倏攘。百度陵夷。故府遺規。多未暇修舉。然

五十年閒。法制典章。尙略具於累朝實錄。溥因檢尋舊史。條分件繫。類輯成編。於建隆二年。與唐會要並進。詔藏史館。後歐陽修作五代史。僅列司天職方二考。其他均未之及。如晉段颺劉昫等之議廟制。周王朴之議樂。皆學關鉅典。亦略而不詳。又如經籍鏤版。昉自長興。千古官書肇端。於是崇文善政。豈宜削而不書。乃一概刊除。尤爲漏略。賴溥是編。得以收放失之舊聞。厥功甚偉。至於租稅類中。載周世宗讀長慶集。見元微之所上均田表。因令製素成圖。頒賜諸道。而歐史乃云。世宗見元微之均田圖。是直以圖爲元

微之作，乖舛尤甚。微溥是編，亦無由訂歐史之謬也。蓋歐史務談褒貶，爲春秋之遺法。是編務核典章，爲周官之舊例，各明一義，相輔而行。讀五代史者，又何可無此一書哉。

【宋朝事實二十卷】永樂大典本。宋李攸撰。文獻通考作李伋。按攸字好德，義從洪範。若作伋字，與好德之義不符。宋史藝文志亦作李攸。通考傳寫誤也。陳振孫書錄解題稱其官爲承議郎，而不詳其里貫。江陽譜稱政和初編輯西山圖經九域志等書。瀘帥孫義叟招原注：下有闕文。書上轉三官。張浚入朝約與俱，以家事辭。考西山屬成都府，瀘州屬潼川路，則攸當爲蜀人。其曰張浚入朝，蓋紹興四年浚自川陝宣撫使召還時也。其書據江陽譜，蓋上起建隆，下迄宣和，凡六十卷。其三十卷先聞於時，後以餘三十卷上之，因語觸秦檜，寢其書不報。故晁陳二家書目俱作三十卷，與譜相合。而趙希弁讀書附志、宋史藝文志，乃俱作三十五卷。今書中有高孝兩朝登極赦詔，及紹興閒南郊赦詔，而紀元亦迄於紹興，殆又有所附益。兼及南宋之初歟。攸熟於掌故，經靖康兵燹之後，圖籍散佚，獨汲汲搜輯舊聞，使一代典章粲然具備。其用力頗爲勤摯。所載歷朝登極南郊大赦詔令，太宗親製趙普碑銘，西京崇福宮記，景靈西宮記，大晟樂記，往往爲宋文鑑名臣碑傳、琬琰集、播芳大全諸書所闕漏。他如宗室換官之制，不見於宋史職官志。郊祀勘箭之儀，不詳於禮志。太廟崇寧廟圖、紫宸殿集英殿上壽賜宴再坐立班起居諸圖，宮架鼓吹十二案圖，尤爲記宋代掌故者所未備。至其事蹟之異同，年月之先後，記載之詳略，尤多可與東都事略續通鑑長編及宋史互相參訂。又如石晉路契丹十六州，分代北山前山後，足訂薛歐五代史稱山後十六州之誤。周世宗兵下三關，並載淤口關，亦足補薛歐二史祇載瓦橋益津二關之闕。當時如江少虞事



實類苑。錦繡萬花谷。多引用之。宋使亦多採用其文。第原本久佚。惟散見於永樂大典各韻下者。尙存梗概。而割裂瑣碎。莫由考見其體例。惟趙希弁讀書附志。稱祖宗世次。登極紀元。詔書聖學。御製郊廟道釋玉牒。公主官職爵邑。勳臣配享。宰執拜罷。科目儀注。兵刑律歷籍田財用。削平僭僞。陞降州縣。經略幽燕之類。具載本末云云。蓋卽當日之門目。今據以分類編次。釐爲二十卷。雖未悉復原書之舊。而綱舉目從。咸歸條貫。亦得其十之七八矣。攸別有通今集二十卷。宋史藝文志入故事類。今佚不傳。又嘗上書秦檜。戒以居寵思危。尤爲侃侃不阿。則其人亦足重。不獨以博洽見長云。

【建炎以來朝野雜記四十卷】兩淮鹽政探進本 宋李心傳撰。心傳有建炎以來繫年要錄。已著錄。心傳長於史學。凡朝章國典。多所諳悉。是書取南渡以後事蹟。分門編類。甲集二十卷。分上德郊廟典禮制。作朝事時事故事雜事官制取士財賦兵馬邊防十三門。乙集二十卷。少郊廟一門。而未卷別出邊事。亦十三門。每門各分子目。雖以雜記爲名。其體例實同會要。蓋與建炎以來繫年要錄。互相經緯者也。甲集成於嘉泰二年。乙集成於嘉定九年。書前各自有序。周密齊東野語。嘗論所載趙師彝犬吠。乃鄭斗所造。以報撻武學生之憤。許及之屈膝。費士要狗竇。亦皆不得志報私讎者。撰造醜詆。所謂韓侂胄僭逆之類。悉無其實云云。蓋掇拾羣言。失真者固亦不免。然於高孝光寧四朝。禮樂刑政之大。以及職官科舉兵農食貨。無不該具。首尾完贍。多有馬端臨文獻通考。章俊卿山堂考索。及宋史諸志所未載。故通考稱爲南渡以來野史之最詳者。王士禎居易錄。亦稱其大綱細目。粲然悉備。爲史家之巨擘。言宋事者。當必於是。有徵焉。其書在宋有成都辛氏刊本。並冠以國史本傳。暨宣取繫年要錄指揮數通。今惟寫本僅存。案張

端義貴耳三集序。稱心傳告以朝野雜記丁戊二集將成。則是書尙不止於甲乙二集。而書錄解題及宋史本傳均未之及。殆以晚年所輯書雖成而未出。故世不得見歟。

【西漢會要七十卷】浙江汪啓淑家藏本。宋徐天麟撰。天麟字仲祥。臨江人。開禧元年進士。調撫州教授。歷武學博士。通判惠潭二州。權知英德府。事蹟附見宋史。徐夢莘傳。傳稱天麟爲通直郎。得之之子。夢莘之從子。晁公武讀書志。則稱爲夢莘之子。考樓鑰攻媿集。有西漢會要序。曰徐思叔爲左氏國紀。其兄祕閣商老。爲北盟錄。已而思叔之子孟堅。著漢官考。次子仲祥。又作漢會要。商老。夢莘之字。思叔得之之字也。然則史不誤而晁氏誤矣。其書仿唐會要之體。取漢書所載制度典章。見於紀志表傳者。以類相從。分門編載。其無可隸者。亦依蘇冕舊例。以雜錄附之。凡分十有五門。共三百六十七事。嘉定四年。具表進之於朝。有旨付尙書省藏之。祕閣班固書最稱博瞻。於一代禮樂刑政。悉綜括其大端。而理密文繁。驟難得其體要。天麟爲之區分別白。經緯本末。一一犁然。其詮次極爲精審。惟所採祇據本史。故於漢制之見於他書者。概不採掇。未免失之於隘。又如輿服門中。於司馬相如揚雄諸賦。鋪張揚厲之語。一概摘入。殊非事實。亦爲有乖義例。然其貫串詳洽。實未有能過之者。昔人稱顏師古爲漢書功臣。若天麟者。固亦無媿斯目矣。

【東漢會要四十卷】浙江范懋柱家天一閣藏本。宋徐天麟撰。天麟官撫州教授時。既奏進西漢會要。後官武學博士。時續成此書。於寶慶二年。復奏進之。其體例皆與前書相合。所列亦十五門。分三百八十四事。惟西漢會要不加論斷。而此書則間附以案語。及雜引他人論說。蓋亦用蘇冕駁議之例也。東漢自

光武中興。明章嗣軌。皆汲汲以修舉廢墜爲事。典章文物。視西京爲盛。而當時載筆之士。如東觀紀及華嶠。司馬彪。袁宏之類。遺編斷簡。亦閒有留傳。他若漢官儀。漢雜事。漢舊儀諸書。爲傳注所徵引者。亦頗犖然可考。故東漢一代故事。較西漢差爲詳備。天麟據范書爲本。而旁貫諸家。悉加哀次。其分門區目。排比整齊。實深有裨於考證。中間如獻帝子濟陰王熙。山陽王懿。濟北王邈。東海王敦。雖爲曹氏所置。旋即降爲列侯。然旣以封建立國。自當著之帝系。皇子條下。以表其實。乃因范書無傳。遂削而不書。未免闕漏。又天麟自序。中稱劉昭因范氏遺緒。註補八志。而不知其爲司馬彪續漢書志。實非范書。晁公武已譏之。則亦偶然失檢。然其大體詳密。卽稍有踳駁。固不足以爲累也。其書世所傳者。皆據宋本傳鈔。第三十七三十八兩卷全闕。三十六三十九兩卷亦各佚其半。無可考補。今亦並仍之焉。

【漢制考四卷】兩江總督採進本。宋王應麟撰。應麟有周易鄭康成註。已著錄。是編因漢書續漢書諸

志。於當日制度。多詳於大端。略於細目。因摭采諸家經註。及說文諸書所載。鉤稽排纂。以補其遺。頗足以資考證。又以唐時賈孔諸疏。去古已遠。方言土俗。時異名殊。所謂某物如今某物。某事如今某事者。往往循文箋釋。於舊文不必悉符。亦一一詳爲訂辨。如周禮疏。不知步搖假紒及五夜儀禮疏。不知偃領之類。不一而足。應麟皆爲旁引證明。又周禮太史職。註云太史抱式。疏曰占文謂之式。應麟則別引藝文志。羨門式法以解之。考式者候時之儀器。史記日者列傳。旋式正棊。漢書王莽傳。天文郎案式於前。日時加某。皆指此器所引。亦較舊義爲長。其中偶失考定者。如鄉士。鄭註云三公出城。郡督郵盜賊道。蓋漢時郡掾。分部屬縣爲督郵。其分治各曹者。亦名督郵。故朱博傳云爲督郵書掾。此督郵盜賊。蓋掾主捕盜賊者。其

不加掾字。猶巴郡太守張納碑陰書督盜賊枳李街也。此職又主爲三公導行。故云督郵盜賊道。導字古通用也。賈公彥疏。乃謂使舊爲盜賊之人。督察郵行往來。於義爲誤。應麟沿用其說。未免千慮之一失。要其大致精核。具有依據。較南宋末年諸人。侈空談而鮮實徵者。其分量相去遠矣。

【文獻通考三百四十八卷】內府藏本 元馬端臨撰。端臨字貴與。江西樂平人。宋宰相廷鸞之子也。咸

淳中。漕試第一。會廷鸞忤賈似道去國。端臨因留侍養。不與計偕。元初起爲柯山書院山長。後終於台州儒學教授。是書凡田賦考七卷。錢幣考二卷。戶口考二卷。職役考二卷。征權考六卷。市糴考二卷。土貢考一卷。國用考五卷。選舉考十二卷。學校考七卷。職官考二十一卷。郊社考二十三卷。宗廟考十五卷。王禮考二十二卷。樂考二十一卷。兵考十三卷。刑考十二卷。經籍考七十六卷。帝系考十卷。封建考十八卷。象緯考十七卷。物異考二十卷。輿地考九卷。四裔考二十五卷。其書以杜佑通典爲藍本。田賦等十九門。皆因通典而離析之。經籍帝系封建象緯物異五門。則廣通典所未及也。自序謂引古經史謂之文。參以唐宋以來諸臣之奏疏。諸儒之議論。謂之獻。故名曰文獻通考。中如田賦考。載唐租庸調之制。而據唐會要。則自開元十六年以後。其法屢改。載五代田賦之制。而據五代會要。尙有天成四年戶部奏定三京諸府夏秋稅法一事。乃一概略之。楊炎定兩稅法奏疏。最關沿革。亦佚不載。職役考載口算之制。而漢書永建四年除三輔三年逋租過更口算芻橐詔書不載。征權考詳載鹽鐵。而五代會要後唐長興四年諸道鹽鐵轉運使奏定鹽鐵條例不載。又雜稅載菓菜之稅。而漢書永元六年流民販賣勿出租稅詔不載。國用門載漕運興廢。而後漢書建武七年罷護漕都尉。建初三年罷常山諸處河漕不載。其載唐代東都及鄭

州諸處漕運措置亦不及唐會要之詳。歷代賑恤於漢既載本始四年之詔而略三年郡國傷旱甚者民毋出租賦之詔選舉考詳載兩漢之選舉而漢書元封四年詔舉茂才異等始元元年遣廷尉持節行郡國舉賢良永光元年詔舉樸質敦厚遜讓有行者光祿歲以此科第郎從官俱不載學校考辨先聖先師之分而唐會要貞觀二十一年詔以孔子爲先聖顏回等爲先師之制不載至職官考則全錄杜佑通典五代建置尤敘述寥寥核以王溥五代會要孫逢吉職官分紀僅得其十之一二郊社考多引經典而尙書之肆類于上帝不載逸周書白虎通三輔黃圖所載周明堂之制最詳亦不及徵引又載歷代明堂之制而梁武帝改作明堂詳於隋書禮儀志者不載地祇之祭祇引周官及禮記郊特牲而禮運祭地瘞繪及考工記玉人兩圭五寸祀地之文不載漢祀后土之制祇載漢舊儀祭地河東而漢官儀北郊壇在城西北諸制不載又雩祭引左傳周禮註疏而禮記祭法雩宗祭水旱也爾雅舞雩也皆不載祭日月祇引禮記周禮而大戴禮天子春朝朝日秋暮夕月及尙書大傳古者帝王以正月朝迎日子東郊皆不載於漢制既載宣帝時成山祠日萊山祠月而建始時罷此祠復立於長安城事又不載社稷門引各經註疏所論社制而周書作雒篇建社之制及蔡邕獨斷所載天子大社之制皆不載祀山川亦引經傳而儀禮覲禮祭山丘陵升祭川沈爾雅祭山曰廋縣祭川曰浮沈皆不載又分代詳載而獨略北齊天保元年分遣使人致祭於五獄四瀆宗廟考載後魏七廟之制祇引禮志改七廟之詔不知興建沿革詳於孫惠蔚本傳又唐初建七廟新唐書禮樂志多略而不參用舊唐書禮儀志王禮考載周之朝儀而不引周書王會解又詳載歷代朝儀而不載史記秦本紀始皇三十五年營作朝宮載漢代朝儀而不載續漢書禮

儀志所載常朝之制。又輿服之載於史志者。必詳敍卿士大夫。如漢制二千石車朱兩轡之類。所以明差等也。而一概從略。樂考載五代廟樂。不如五代會要之詳。兵考載晉兵制。至悼公四年而止。其後治兵。邾南甲車四千乘不載。載魯兵制。自昭公蒐紅始。而成公元年作丘甲。襄公十一年作三軍。昭公五年舍中軍。俱不載。經籍考卷帙雖繁。然但據晁陳二家之目。參以諸家著錄。遺漏宏多。輿地考亦本歐陽忞輿地廣記。罕所訂補。大抵門類既多。卷繁帙重。未免取彼失此。然其條分縷析。使稽古者可以案類而考。又其所載宋制最詳。多宋史各志所未備。案語亦多能貫穿古今。折衷至當。雖稍遜通典之簡嚴。而詳瞻實爲過之。非鄭樵通志所及也。

【明會典一百八十卷】江蘇巡撫採進本 明宏治十年奉敕撰。十五年書成。正德四年重校刊行。故卷

端有孝宗武宗兩序。其總裁官爲大學士李東陽。焦芳。楊廷和。副總裁官爲吏部尚書梁儲。纂修官爲翰林院學士毛紀。侍講學士傅珪。侍讀毛澄。朱希周。編修潘辰。並列銜卷首。然皆武宗時重校諸臣。其原修之大學士徐溥等。竟不列名。未詳當日何意也。其體例以六部爲綱。吏禮兵工四部。諸司各有事例者。則以司分。戶刑二部。諸司但分省而治。共一事例者。則以科分。故一百八十卷中。宗人府自爲一卷。弁首外。餘第二卷至一百六十三卷。皆六部之掌故。一百六十四卷。至一百七十八卷。爲諸文職。末二卷爲諸武職。特附見其職守沿革而已。南京諸曹。則分附北京諸曹。末不別立條目。惟體例與北京異者。乃別出焉。其官制前後不同者。如太常司改爲太常寺之類。則書其舊名。而註曰後改爲某官。其別開公署者。如鴻臚寺本爲儀禮司之類。則書其新名。而註曰本爲某官。其戶口貢賦之盈縮。制度科條之改易。亦相連併。

載以見變通。建之由。大抵以洪武二十六年諸司職掌爲主。而參以祖訓大誥。大明令。大明集禮。洪武禮制。禮儀定式。稽古定制。孝慈錄。教民榜文。大明律。軍法。定律。憲綱十二書。於一代典章。最爲賅備。凡史志之所未詳。此皆具有始末。足以備後來之考證。其後嘉靖八年。復命閣臣續修會典五十三卷。萬歷四年。又續修會典二百二十八卷。今皆未見。其本莫知存佚。殆以嘉靖時祀典太濫。萬歷時稅政孔多。不足爲訓。故世不甚傳歟。

【七國考十四卷】兩淮馬裕家藏本

明董說撰。說有易發。已著錄。是編載秦齊楚趙韓魏燕七國制度。

分職官食貨郡邑宮室國名羣禮音樂器服雜記喪制兵制刑法災異瑣徵十四門。皆採掇諸書。以相佐證。略如會要之體。大致以戰國策史記爲本。而以諸子雜史補其遺闕。其所援引。如劉向列仙傳。張華感應類從志。子華子。符子。王嘉拾遺記之類。或文士之寓言。或小說之雜記。皆據爲典要。而月令所載太尉大會之屬。註者明曰。秦官。乃反遺漏。未免去取不倫。又旣以七國爲名。自應始自分晉以後。而秦之寺人。上引車鄰。楚之兩廣。遠徵左傳。則於斷限有乖。新序載魏王欲爲中天之臺。許瑄諫止。未必實有其事。卽有之。亦議而未行。而魏宮室門中。乃出一中天臺。莊子載無盛鶴列於麗譙。蓋城闕之通名。非魏所獨有。乃於魏宮室中。標一目曰麗譙。琴操載韓殺聶政之父。乃古來之常制。非韓所創。乃於韓刑法中。標一目曰殺。亦嫌於苟盈卷帙。至於秦水心劍事。本見續齊諧記。乃云白帖。秦舍晉侯於靈臺。本見左傳。乃云列女傳。亦往往不得其出典。觀其前後無序跋。而齊職官門。註封君后妃附。乃祇有封君。而無后妃。殆說未成之稟。偶爲後人傳錄歟。然春秋以前之制度。有經傳可稽。秦漢以下之故事。有史志可考。惟七雄雲擾。

策士縱橫中閒一二百年典章制作實蕩然不可復徵說能參考諸書排比鉤貫尙一一各得其崖略俾考古者有徵焉雖閒傷蕪漫固不妨過而存之矣。

【欽定大清會典一百卷】乾隆二十九年奉敕撰伏考國朝會典初修於康熙三十三年續修於雍正五年至是凡三經釐定典章彌備條目彌詳考昔成周之制百度分治以六官六官統彙於周禮聖人經世之樞要於是乎在雖越數千載時勢異宜政令不能不增法制不能不改職守亦不能不分難復拘限以六官而其以官統事以事隸官則實萬古之大經莫能易也故歷代所傳如唐六典元典章明會典遞有損益而宏綱鉅目不甚相遠然其書之善否則不盡繫編纂之工拙而繫乎政令之得失蓋一朝之會典卽記一朝之故事故事之所有不能刪而不書故事之所無亦不能飾而虛載故事有善有不善亦不能有所點竄變易如唐六典先頒祥瑞之名目分爲三等以待天下之奏報殆於上下相罔然當時有此制乘筆者不能不載也又如至正條格中偏駁不公之令經御題指摘者人人咸喻其非然亦當時有此制乘筆者不能不載也國多秕政安怪書多駁文乎至於周禮一經朱子稱其盛水不漏亦其時體國經野事事爲萬世開太平故其書亦傳之萬世尊爲法守非周公有所塗飾於其間也我國家列聖相承文謨武烈垂裕無疆規畫旣皆盡善我皇上執兩用中隨時損益又張弛皆衷於道增刪悉合其宜則是書之體裁精密條理分明足以方駕周禮者實聖主鴻猷上軼豐鎬也夫豈歷代規條所能望見涯涘乎

【欽定大清會典則例一百八十卷】乾隆二十九年奉敕撰與大清會典同時告成會典原本以則例散附各條下蓋沿歷代之舊體至是乃各爲編錄使一具政令之大綱一備沿革之細目互相經緯條理



益明考周禮爲一代之典制。而六官所職。其文頗略。其見於諸書者。如都城之廣狹。左傳稱先王之制。大都不過參國之一。中五之一。小九之一。逸周書作雒解。稱大縣城方王城三之一。小縣城方王城九之一。其文相合。當爲周之舊典。而周禮無之。又太子生之禮。左傳稱接以太牢。卜士負之。士妻食之。禮記內則所載。文雖稍詳。其事並同。當亦爲周之舊典。而周禮亦無之。知周禮舉其要。而度數節次之詳。則故府別有其記載。與六典相輔。又左傳載王以鞶伯宴而私賄之。使相告之曰。非禮也。勿籍。知當日王室之禮。或改於舊。必籍而記之。以爲故事。其書雖不傳。其文則旁見側出。散在古籍者。尙灼然可考也。然則會典之外。別爲則例。正三代之古義矣。其間隨時損益之迹。悉出聖人之化裁。蓋帝王剏制顯庸。有百世不變之大經。詩所謂不愆不忘。率由舊章是也。有因時制宜之大用。記所謂一張一弛。文武之道是也。卽政典之因革。以仰窺皇心之運量。精一執中。具昭於是。豈徒備掌故而已哉。

【欽定續文獻通考二百五十二卷】 乾隆十二年奉敕撰。馬端臨文獻通考。斷自宋寧宗嘉定以前。採摭宏富。體例詳賅。元以來無能繼作。明王圻始摭拾補綴。爲續文獻通考二百五十四卷。體例糅雜。顛舛叢生。遂使數典之書。變爲兔園之策。論者病焉。然終明之世。亦無能改修。豈非以包括歷朝。委曲繁重。難於蒐羅。而條貫之哉。我皇上化洽觀文。道隆稽古。特命博徵舊籍。綜述斯編。黜上海之野文。補鄱陽之巨帙。採宋遼金元明五朝事蹟。議論彙爲是書。初議於馬氏原目之外。增朔閏河渠氏族六書四門。嗣奉敕修續通志。以天文略可該朔閏。地理略原首河渠。氏族六書更鄭樵之舊部。旣一時並撰。卽無容兩筴複陳。故二十四門。仍從馬氏之原目。其中如錢幣考之載鈔銀。象緯考之詳推步。於所必增者。乃增物異考。

之不言徵應。經籍考之不錄佚亡。於所當減者乃減。亦不似王氏之橫生枝節。多出贅疣。大抵事蹟先徵正史。而參以說部雜編。議論博取文集。而佐以史評語錄。其王圻舊本間有一長可取者。沙中金屑。亦不廢搜求。然所存者十分不及其一矣。至於考證異同。辨訂疑似。王本固爲疎陋。卽馬本亦略而未詳。茲皆本本元元。各附案語。一折衷於聖裁。典核精密。纖悉不遺。尤二書所不逮焉。蓋王圻著述。務以炫博。故所續通考。及稗史彙編。三才圖會之類。動盈二三百卷。而無所取材。此書則每成類。卽先呈御覽。隨事指示。務使旣博且精。故非惟可廢王氏之書。卽馬氏之書。歷來推爲絕作。亦陶鑄之而有餘也。

【欽定皇朝文獻通考二百六十六卷】 乾隆十二年奉敕撰。初與五朝續文獻通考共爲一編。乾隆二十六年以前朝舊事。例用平書。而述昭代之典章。錄列朝之詔諭。尊稱鴻號。於禮當出格。跳行。體例迴殊。難於畫一。遂命自開國以後。別自爲書。後續通典。續通志。皆古今分帙。卽用此書之例也。其二十四門。初亦仍馬氏之目。嗣以宗廟考中。用馬氏舊例。附錄羣廟。因而載入。敕建諸祠。仰蒙睿鑒。周詳。繪音訓示。申明禮制。釐定典章。載筆諸臣。始共知尊卑有分。名實難淆。恍然於踵謬沿譌之失。乃恪遵聖諭。別立羣廟一門。增原目爲二十五。其中子曰。田賦增八旗。田制錢幣增銀色銀直。及回部普兒。戶口增八旗壯丁。土貢增外藩。學校增八旗官學。宗廟增崇奉聖容之禮。封建增蒙古王公。皆以今制所有而加。市糴刪均輸。和買和糴。選舉刪童子科。兵考刪車戰。皆以今制所無而省。至象緯增推步。物異刪洪範五行。國用分爲九目。尊號冊封之典。自帝系移入王禮。則斟酌而小變其例者也。考馬氏所敘宋事。雖以世家遺蔭。多識舊聞。然計其編摩。實在入元以後。故典章放失。疎略不詳。理宗以下三朝。以國史北移。更闕無一字。案理

宗以後國史元兵載以北歸。事見宋季三朝致要序。今則聖聖相承。功成文煥。實錄記注。具錄於史官公牘奏章。全掌於籍氏。每事皆尋源竟委。賅括無遺。故卷帙繁富。與馬氏原本相埒。夫尙書兼陳四代。而周書爲多。禮記亦兼述三王。而周禮尤備。蓋監殷監夏。百度修明。文獻足徵。蒐羅自廣。有不必求博而自博者矣。

【欽定續通典一百四十四卷】乾隆三十二年奉敕撰。杜佑通典。終於天寶之末。是書所續。自唐肅宗至德元年。訖明崇禎末年。凡選舉六卷。職官二十二卷。禮四十一卷。樂七卷。兵十二卷。刑十六卷。州郡十八卷。邊防四卷。食貨十八卷。篇目一仍杜氏之舊。惟杜氏以兵制附刑後。今則兵刑各爲一篇。稍有不同。考古者虞廷九官。有士而無司馬。凡蠻夷寇賊。一隸於士。魯語臧文仲稱大刑用甲兵。其次用斧鉞。中刑用刀鋸。其次用鑽笮。薄刑用鞭朴。則兵刑可以爲一。又左傳紀少昊以祝鳩爲司馬。爽鳩爲司寇。而秋官夏官。周禮亦分兩職。則兵刑亦可爲二。以事蹟多寡。卷帙繁簡。酌爲門目之分合。其宏旨仍不異也。至於編纂之例。唐代年祀稍遠。舊典多亡。五代及遼。文獻靡徵。史書太略。則旁搜圖籍。以求詳明。明代見聞最近。雜記實繁。宋金及元著作本多。遺編亦夥。則嚴核異同。以傳信。總期於既精既博。不濫不遺。案宋史藝文志。有宋白續通典二百卷。今其書已亡。陳振孫書錄解題。載其咸平三年奉詔。四年九月書成。起唐至德初。迄周顯德末。又載王欽若言。杜佑通典上下數千載。爲二百卷。而其中四十卷爲開元禮。今之所載二百餘年。亦如前書卷數。時論非其複重。茲編仰稟聖裁。酌乎繁簡之中。而九百七十八年內。典制之源流。政治之得失。條分件繫。綱舉目張。誠所謂記事提要。纂言鉤元。較諸杜氏原書。實有過之無不及。宋白所

續更區區不足道矣。

【欽定皇朝通典一百卷】乾隆三十二年奉敕撰。以八門隸事。一如杜佑之舊。其中條例。則或革或因。如錢幣附於食貨。馬政附於軍禮。兵制附於刑法。於理相近。於義有取者。今亦無所更易。至於古今異制。不可強同。如食貨典之權酤算緡禮典之封禪。前朝弊法。久已爲聖代所除。卽一例從刪。不復更存虛目。又地理典。以統包歷代。分併靡常。疆界參差。名稱舛互。故推原本始。以九州提其大綱。今旣專述本朝。自宜敬遵今制。況乎威弧震疊。式廓販章。東屆出日之邦。西括無雷之國。山河兩戒。並隸職方。近復戡定。冉駝開屯。列戍皇輿。廣闊更非九州舊界所能包。故均以大清一統志爲斷。不更以禹貢州域。秦昭代之黃圖。至杜氏述唐朝掌故。與歷代共爲一書。故皆分綴篇終。其文簡略。亦體裁所限。不得不然。今則專勒一編。式昭國典。當法制修明之世。鴻猷善政。史不勝書。故卷目加繁。溢於舊笈。且杜氏所採者。惟開元禮爲詳。今則謨烈昭垂。各成完帙。禮有大清通禮。皇朝禮器圖式。樂有聖祖御製律呂正義。皇上御製律呂正義。後編刑有大清律例。兵有中樞政考。地理有皇輿表。大清一統志。欽定日下舊聞考。盛京通志。熱河志。滿洲源流考。皇輿西域圖志。又有大清會典及則例。總其綱領。八旗及六部則例。具其條目。故縷分條繫。端委詳明。用以昭示萬年。誠足媲美乎官禮。又豈杜氏之掇拾殘文。裒合成帙。所可同日語哉。

【欽定皇朝通志二百卷】乾隆三十二年奉敕撰。二十略之目。亦與鄭樵原本同。而紀傳年譜。則省而不作。蓋實錄國史。尊藏金匱。與考求前代。刪述舊文。義例固不侔也。至於二十略中。有原本繁而今汰者。三都邑略中。樵兼載四裔所居。非但約略傳聞。地多無據。且外邦與帝京並列。義亦未安。今惟恭錄興京。

盛京師城闕之制。以統於尊。諡略中樵分三等二百十品。多所臆定。今惟恭錄賜諡。以昭其慎。金石略中樵所採頗雜。今惟恭錄列聖寶墨。皇上奎章。兼及御定西清古鑑。三希堂帖。淳化軒帖。蘭亭八柱帖。諸刻。餘悉不登。以滌其濫。有原本疎而今補者二。天文略中樵惟載步天歌。今則敬遵聖祖仁皇帝御製儀象考成靈臺儀象志。皇上御製儀象考成後編。會通中西之法。以究象緯之運行。地理略中樵以四瀆統諸水。而州縣郡道。以水爲別。今則於其不入四瀆者。大河以北。如盛京京畿諸水。大江以南。如浙閩甌粵諸水。以及滇南漠北諸水。自入南北海者。並一一補載。而河有重源。今底定西域。而始知者。亦恭錄聖製。以昭示來茲。有原本冗瑣。而今刪併者三。藝文略中樵所列既多舛譌。校讎略中樵所舉亦未精確。圖譜略中樵分記有記無二類。而記無多。至二十六門。既多虛設。如擊桐試馬。鬪羊對雉。諸圖。尤猥雜無取。今竝以欽定四庫全書總目爲斷。以折其中。有原本之所未聞者三。六書略中。以國書十二字頭括形聲之變化。併以欽定西域同文志。臚列蒙古西番托忒回部諸字。絲牽珠貫。音義畢該。非樵之穿鑿偏旁所知也。七音略中。以國書合聲之法。爲翻切之總鑰。而兩合三合之中。有上下連書。有左右並書。有重聲大書。輕聲細書。以欽定同文韻統爲華梵之通津。以天竺五十字母。配合成一千二百十二音。又以西番三十字母。別配合成四百三十四音。而各釋以漢音。漢音不具。則取以合聲。非樵株守等韻所知也。昆蟲草木略中。樵分八類。五朝續通志。己爲補漏訂譌。至於中國所無。而產於遐方。前代所無。而出於今日。如金蓮花。夜亮木之類。見於欽定廣羣芳譜。普盤櫻額。堪達罕。秦達罕之類。見於聖祖仁皇帝幾暇格物編。北天竺烏沙爾器。火雞。箬。漠鮮。知時草之類。見於御製詩集。如奇石。密食。鸞。鸞爾之類。見於欽定西域圖志。尤

非樵之抱殘守匱所知矣。蓋剏始之作。考校易疎。論定之餘。體裁益密。生於衰微之世。則耳目難周。生於明備之朝。則編輯易富。樵當宋之南渡。局於見聞。又草創成書。無所質證。故踳駁至於如斯。以視遭遇昌期。仰蒙聖訓。得以蒐羅宏富。辨證精詳。以成一代巨觀者。其瞠乎莫逮。亦良有由矣。謹案鄭樵通志入別史。欽定續通志亦入別史。均以兼有紀傳故也。至皇朝通志。惟有二十略。則名爲通志。實與通典通考爲類。故恭錄於政書之中。

【元朝典故編年考十卷】內府藏本 國朝孫承澤撰。承澤有尚書集解。已著錄。原本不著名氏。今知爲承澤作者。大興志載承澤所著。有元朝典故編年考。與此本合也。其書取元代朝廷事實。分代編輯。正史以外。更採元人文集。以附益之。共爲八卷。元史冗複漏略。殊乏體裁。此雖不能詳悉釐正。而削繁增簡。具有首尾。差易省覽。其第九卷爲元朝祕史。第十卷附遼金遺事。小序謂元有祕史十卷。續祕史二卷。前卷載沙漠始起之事。續卷載下燕京滅金之事。蓋其國人所編記。書藏禁中。不傳。偶從故家見之。錄續卷末。以補史所不載。云云。考其所引。並載永樂大典元字韻中。互相檢勘。一一相同。疑本元時祕冊。明初修書者。或嘗錄副。以出流傳在外。故承澤得而見之耳。所記大都瑣屑細事。且間涉荒誕。蓋亦傳聞之辭。輾轉失真。未足盡以爲據。然究屬元代舊文。世所罕覩。自永樂大典以外。惟見於此書。與正史頗有異同。存之亦足以資參訂也。

右政書類通制之屬。十九部。二千二百九十八卷。皆文淵閣著錄。

案纂述掌故。門目多端。其間以一代之書。而兼六職之全者。不可分屬。今總而匯之。謂之通制。

卷八十二

史部三十八

政書類二

【漢官舊儀一卷補遺一卷】永樂大典本 案永樂大典載漢官舊儀一卷。不著撰人名氏。考梁劉昭注續漢書百官志。引用漢官儀。則曰應劭。引用漢舊儀。則不著其名。隋書經籍志。唐書藝文志。作四卷。宋史藝文志。作三卷。書錄解題。始作漢官舊儀。注曰衛宏撰。或云胡廣宏本傳作漢舊儀四篇。以載西京雜事。不名漢官。今惟此三卷。而又有漢官之目。未知果當時本書否。今案永樂大典。此卷雖以漢官標題。而篇目自皇帝起居。皇后親蠶。以及璽綬之等。爵級之差。靡不條繫。件舉與宏傳所云西京雜事相合。又前後漢書注中。凡引用漢舊儀者。並與此卷所載相同。則其爲衛氏本書。更無疑義。或後人以其多載官制。增題官字歟。原本轉相傳寫。節目淆亂。字句舛譌。殆不可讀。茲據班范正史。綜覈參訂。以讎其疑。其原有注者。略仿劉昭注百官志之例。通爲大書。稱本注以別之。又考前後漢書紀志注中。別有徵引舊儀數條。並屬郊天禘祭。耕籍。飲酎諸大典。此卷俱未採入。蓋流傳既久。脫佚者多。謹復蒐擇甄錄。別爲一篇。附諸卷尾。以補本書之未備云。

【大唐開元禮一百五十卷】兩淮鹽政採進本 唐太子太師同中書門下三品兼中書令蕭嵩等奉敕撰。杜佑通典及新舊唐書禮志。稱唐初禮司無定制。遇有大事。輒制一儀。臨時專定。開元中。通事舍人王

巖上疏請刪削禮記舊文益以今事集賢學士張說奏禮記不刊之書難以改易請取貞觀顯慶禮書折衷異同以爲唐禮乃詔右散騎常侍徐堅左拾遺李銳太常博士施敬本撰述歷年未就至蕭嵩爲學士復奏起居舍人王仲邱等撰次成書由是唐之五禮始備卽此書也其書卷一至卷三爲序例卷四至七十八爲吉禮卷七十九至八十爲賓禮卷八十一至九十爲軍禮卷九十一至一百三十爲嘉禮卷一百三十一至一百五十爲凶禮凶禮古居第二而退居第五者用貞觀顯慶舊制也貞元中詔以其書設科取士習者先授太常官以備講討則唐時已列之學官矣新舊唐書禮志皆取材是書而所存僅十之三杜佑撰通典別載開元禮纂類三十五卷比唐志差詳而節目亦多未備其討論古今斟酌損益首末完具粲然勒一代典制者終不及原書之賅洽故周必大序稱朝廷有大疑稽是書而可定國家有盛舉卽是書而可行誠考禮者之圭臬也新唐書藝文志載修開元禮者尙有張烜陸善經洪孝昌諸人名而通典纂類中所載五獄四瀆名號及衣服一門間有與此書相出入者蓋傳寫異文不能畫一旣未詳其孰是今亦並仍原本錄之不復竄改庶幾不失闕疑之義焉

【諡法四卷】內府藏本

宋蘇洵撰洵字明允眉山人官祕書省校書郎以霸州文定縣主簿修太常因

革禮書成而卒事蹟具宋史本傳自周公諡法以後歷代言諡者有劉熙來與沈約賀琛王彥威蘇冕屬蒙之書然皆雜糅附益不爲典要至洵奉詔編定六家諡法乃取春秋廣諡及諸家之本刪訂考證以成是書凡所取一百六十八諡三百一十一條新改者二十三條新補者十七條別有七去八類於舊文所有者刊削甚多其閒如堯舜禹湯桀紂乃古帝王之名並非諡號而沿襲前譌概行載入亦不免疎失然較



之諸家義例要爲嚴整。後鄭樵通志諡略大都因此書而增補之。且稱其斷然有所去取。善惡有一定之論。實前人所不及。蓋其斟酌損益。審定字義。皆確有根據。故爲禮家所宗。雖其中間收僻字。今或不能盡見。諸施行。而歷代相傳之舊典。猶可以備參考焉。曾鞏作洵墓志。載此書作三卷。而此本實四卷。殆後人所分析歟。

【政和五禮新儀二百二十卷】兩淮馬裕家藏本。宋議禮局官知樞密院鄭居中等奉敕撰。徽宗御製序文。題政和新元三月一日。蓋政和改元之年。錢曾讀書敏求記。誤以新元爲心元。遂以爲不知何解。謬也。前列局官隨時酌議科條。及逐事御筆指揮。次列御製冠禮。蓋當時頒此十卷爲格式。故以冠諸篇。次爲目錄六卷。次爲序例二十四卷。禮之綱也。次爲吉禮一百一十一卷。次爲賓禮二十一卷。次爲軍禮八卷。次爲嘉禮四十二卷。升婚儀於冠儀前。徽宗所定也。次爲凶禮十四卷。惟官民之制特詳焉。是書頗爲朱子所不取。自中興禮書既出。遂格不行。故流傳絕少。今本第七十四卷。第八十八卷至九十卷。第一百八卷至一百十二卷。第一百二十八卷至一百三十七卷。第二百零卷。皆有錄無書。第七十五卷。九十一卷。九十二卷。亦佚其半。然北宋一代典章。如開寶禮。太常因革禮。禮閣新儀。今俱不傳。中興禮書。散見永樂大典中。亦無完本。惟是書僅存。亦論掌故者所宜參考矣。

【紹熙州縣釋奠儀圖一卷】兩淮鹽政探進本。宋朱子撰。考朱子年譜。紹興二十五年乙亥。官同安主簿。以縣學釋奠。舊例止以人吏行事。求政和五禮新儀于縣。無之。乃取周禮儀禮。唐開元禮。紹興祀令。更相參考。畫成禮儀器用衣服等圖。訓釋辨明。纖微必備。此釋奠禮之初槩也。淳熙六年己亥。差知南康軍。

奏請頒降禮書。又請增修禮書事未施行。紹熙元年庚戌。改知漳州。復列上釋奠禮儀數事。且移書禮官。乃得頗爲討論。時淳熙所鏤之版。已不復存。後乃得于老吏之家。又以議論不一。越再歲始能定議。而主其事者適徙他官。遂格不下。此釋奠禮之再修也。紹熙五年甲寅。除知潭州。會前太常博士詹元善還爲太常少卿。始復取往年所被敕命下之本郡。吏文繁複。幾不可讀。且曰屬有大典禮。未遑徧下諸州。時朱子方召還。奏事。又適病。目乃力疾鉤校。刪剔猥雜。定爲四條。以附州案。俾移學官。是爲最後之定稿。卽此本也。書首載淳熙六年禮部指揮一通。尙書省指揮一通。次紹熙五年牒潭州州學備准指揮一通。皆具錄原文。次州縣釋奠文宣王儀。次禮器十九圖。其所行儀節。大抵採自杜氏通典。及五禮新儀。而折衷之。後來二丁行事。雖儀注少有損益。而所據率本是書。惟所列兩廡從祀位次。有呂祖謙張栻。則其事在理宗以後。又有咸淳三年改定位次之文。檢勘宋史禮志。載咸淳詔書。其先儒名數。及東西次序。與此書一脗合。與朱子益不相及。蓋後人隨時附益。又非其原本矣。

【大金集禮四十卷】兩淮馬裕家藏本。不著撰人名氏。亦不著成書年月。據黃虞稷千頃堂書目。蓋明

昌六年禮部尙書張瑋等所進。今考書中紀事。斷至大定。知爲章宗時書。虞稷所載。當不誤也。其書分類排纂。具有條理。自尊號册諡。以及祠祀朝會燕饗諸儀。燦然悉備。以金史諸志相校。其藍本全出於此。而志文援引舛漏。失其本意者頗多。若祭方丘儀。是書有前祭二日。太尉告廟之儀。而金史遺落不載。又金史云。設饌幕于內墻。東門之外。道北南向。考之此書。則陳設饌幕。乃有東門西門二處。蓋壇上及神州東方南方之饌。陳於東門外。西方北方之饌。陳於西門外。金史獨載設於東門外者。于禮爲舛。如斯之類。不

一而足。非得此書。無以知史志之疎謬也。則數金源之掌故者。此爲總匯矣。惟第十卷載夏至日祭方丘儀。而園丘郊天儀獨闕。考金史自天德以後。並祀南北郊。大定明昌。其制漸備。編書者既載北郊儀注。不應反遺南郊。蓋傳寫脫佚。非原書有所不備也。

【大金德運圖說一卷】永樂大典本

金尙書省會官集議德運所存案牘之文也。案金史本紀。金初色

尙白。章宗泰和二年十一月。更定德運爲土臘月辰。詔告中外。至宣宗貞祐二年正月。命有司復議本朝德運。是書所載。蓋卽其事。書前爲尙書省判次。爲省劄。列集議官二十二人。其中獨上議狀者六人。合具議狀者八人。連署者四人。其集議有名而無議狀者。太子太傅張行簡。太子太保富察烏葉。案富察烏葉。原作蒲察畏也。今改正。修撰富珠哩阿拉。案富珠哩阿拉。原作李朮魯阿拉。今改正。費灑諳達登案。費諳諳達登。原作裴滿案帶丁。今改正。四人疑原書尙有所脫佚。其所議言應爲土德者四人。言應爲金德者十四人。中如諫議大夫張行信。力主金德之議。而金史行信本傳。稱貞祐四年。以參議官王澮言當爲火德。詔問有司。行信謂當定爲土德。而斥澮所言爲狂妄。其立說先後自相矛盾。殊不可解。又書中但有諸臣議狀。而尙書省臣無所可否。考史載興定元年十二月庚辰臘。享太廟。是終金之世。仍從泰和所定土德。而未嘗重改。疑是歲元兵深入。宣宗南遷汴梁。此議遂罷。故尙書省亦未經奏覆也。五德之運。不見六經。惟家語始有之。而其書出於王肅僞撰。不可據爲典要。後代泥於其說。多侈陳五行傳序之由。而牽合遷就。附會支離。亦終無一當。仰蒙我皇上折衷垂訓。斥妄祛疑。本宅中圖大之隆規。破讖緯休祥之謬說。闡發明切。立千古不易之定論。是編不能具其始末。存此一帙。尙可以補掌故之遺。並所議識見。皆爲偏

陋本不足錄。然此事史文簡略。恭錄聖製。弁諸簡首。俾天下後世曉然知騶衍以下皆妄生臆解。用以祛曲說之惑焉。

【廟學典禮六卷】永樂大典本 不著撰人名氏。諸家書目皆不著錄。核其所載。始于元太宗丁酉。而終于成宗大德間。蓋元人所錄也。其書雜鈔案牘。排綴成編。未經文士之修飾。故詞多樵樸。又原序原目。散佚無考。亦無從得其門類。幸其年月先後。皆有可稽。尚可排比成帙。謹釐析其文。勒爲六卷。雖繁複之失。在所未免。而一代廟學之制。措置規畫。梗概具存。頗可與元史相參考。如至元六年。設舉學校官一條。稱儒學提舉司。秩從六品。而百官志作從五品。各路儒學教授秩八品。而百官志作九品。至元十九年。郡縣學院官職員數一條。稱總管府設教授二員。學錄學正各二員。散府設教授二員。學錄學正各一員。而百官志作總管府教授一員。學正一員。學錄一員。散府上中州教授一員。下州學正一員。俱不相合。蓋宋濂等修史之時。據其末年之制。而大德以前之舊典。則未及詳考也。又選舉志稱至元二十八年。令江南諸路學及各縣學內。設立小學。選老成之士教之。其他先儒過化之地。名賢經行之所。與好事之家。出錢粟贍學者。並立爲書院。是明言小學書院。設於世祖之時。而此書載所立小學書塾。乃在大德四年。以成宗時人記成宗時事。不應譌異如是。或至元時雖有此議。實未及施行。至成宗乃補定其規制。而史未及詳與元史一書。自開局至告成。僅閱八月。其間潦草闕略。不一而足。諸志尤不賅備。留此一編。猶足以見一朝養士之典。固考古者所必稽矣。其中有當日文書程式。後人不能盡解。以致傳寫譌脫者。並詳核釐正。無可考者則闕之。人名地名官名譯語對音。尤多舛異。今皆一一核定。俾不失其真。以糾向來流傳之誤。

焉。

【明集禮五十三卷】浙江范懋柱家天一閣藏本。明徐一夔梁寅劉于周於諒胡行簡劉宗弼董彝蔡

琛滕公瑛曾魯同奉敕撰。考明典彙載洪武二年八月詔儒臣修纂禮書。三年九月書成。名大明集禮。其書以吉凶軍賓嘉冠服車輅儀仗鹵簿字學樂爲綱。所列子目。吉禮十四。曰祀天。曰祀地。曰宗廟。曰社稷。曰朝日。曰夕月。曰先農。曰太歲。風雲雷雨師。曰岳鎮海瀆。天下山川城隍。曰旗纛。曰馬祖先牧社馬步。曰祭厲。曰祀典。神。曰三皇孔子嘉禮五。曰朝會。曰冊封。曰冠禮。曰婚。曰鄉飲酒。賓禮二。曰朝貢。曰遣使。軍禮三。曰親征。曰遣將。曰大射。凶禮二。曰弔賻。曰喪儀。又冠服車輅儀仗鹵簿字學各一。樂三。曰鍾律。曰雅樂。曰俗樂。明史藝文志及昭代典則均作五十卷。今書乃五十三卷。考明典彙載嘉靖八年禮部尙書李時請刊大明集禮。九年六月梓成。禮部言是書舊無善錄。故多殘闕。臣等以次詮補。因爲傳注。乞令史臣纂入。以成全書云云。則所稱五十卷者。或洪武原本。而今所存五十三卷。乃嘉靖中刊本。取諸臣傳注及所詮補者。纂入原書。故多三卷耳。如明禮志載洪武三年。圜丘從祀。益以風雲雷雨。而是書卷一總序曰。國朝圜丘從祀。惟以大明夜明星辰太歲。又所載圜丘從祀壇位及牲幣尊彝均止。及大明夜明星辰太歲。不及風雲雷雨。是益祀風雲雷雨。從祀圜丘。在十一月。而是書成於九月。故未及纂入。實有明據。而卷一序神位版。乃曰風伯之神。雲師之神。雷師之神。雨師之神。並赤質金字。不應一卷之內。自相矛盾。若此。則其爲增入可知。又明史禮志載洪武元年冬至祀昊天上帝儀注。無先期告諸神祇及祖廟之文。至洪武四年始規此制。而是書儀注則有之。知亦嘉靖諸臣詮補纂入者矣。序爲世宗御製。題爲嘉靖九年六月

望日。而世宗實錄載九年六月庚午刻大明集禮成。上親製序文。是月己未朔。則庚午乃十二日。與實錄小有異同。疑十二日進書。望日製序。記載者併書於進書日也。

【明臣諡彙考二卷】浙江巡撫採進本。明鮑應鼈撰。應鼈字山父。歙縣人。萬歷乙未進士。官至禮部祠祭司郎中。是書載明代文武諸臣贈諡。與欽定明史各傳。具相符合。首載各諡釋義。爲當時禮官體例。而所列諸諡。如某人諡某字。皆分注當日定諡取義之文于下。使觀者具知所以然。較他家所記。獨有根據。其前代諸臣。如謝枋得之諡忠節。紀信文天祥之諡忠烈。鄧文進之諡忠襄。蘇緘之諡忠壯。史或不載。世所罕知。亦頗賴此書以存。卷末附萬歷三十一年至三十七年擬諡者二十九人。又三十八年至四十年擬諡者四人。皆二諡並列。蓋神宗荒怠。奏章率不批答。莫知進止。故兩存也。最後列考誤一篇。凡五十七人。皆據官冊以正野史文集之譌。其中多有無諡而冒稱諡某者。亦有字相同異。美惡頓殊者。或詭詞假借。或傳寫舛謬。外人無從而知。非應鼈身爲禮官。親檢故籍。不能一一釐正也。其於一代易名之典。可云精核矣。

【頻宮禮樂疏十卷】浙江巡撫採進本。明李之藻撰。之藻字振之。仁和人。萬歷戊戌進士。官至太僕寺

少卿。是編首列頻宮祀典。次列儀注。次列名物器數。共成八卷。第九卷爲啟聖祠。及名宦鄉賢祠。附以鄉飲酒禮。第十卷附以鄉射禮。其中如釋奠儀之散齋演樂滌牲諸禮。及時祭儀注。皆明會典及南雍志諸書所未載。又迎神樂章。謂明制本宋舊。一成三成。相沿不易。其樂章諸譜。配以六律者。唯填工尺一字。頗能得其源流。蓋樂律自宋仁宗時始省去坐立二部。及堂上堂下之分。南宋諸儒。又以舊樂加平減之制。

無高上高尺之律。於是所用者。惟中和韶樂。明代實沿其制。之藻所譜。又注明時俗之一。几清凡諸調。與舊調相合者。分毫不爽。又於琴瑟操縵之法。別成一譜。其琴譜不越松風閣之舊規。以數音譜出一字。少用鈎剔。蓋欲近於和緩。以和韶樂。瑟譜則以六律爲主。行遲其聲。以應節。又與元熊朋來瑟譜之一聲一字者迥殊。蓋歷律皆根於數。之藻嫻於算法。世所行天學初函。卽其所刻。故因數制律。足自爲一家之學。其末卷載鄉飲酒禮。兼及鄉射禮者。明初之制。猶行射禮於頻宮。迨其中葉。此禮遂廢。故明會典及南雍志諸書。載之不詳。之藻稽古證今。考辨頗爲賅悉。唯褒崇一門。僅採史傳。不及馬端臨學校考之備。又儀器圖內。儀尊諸制。既不本於三禮圖。又不以考古博古諸圖證其異同。僅以時俗陳設者爲準。未免稍略。然禮以時王所制爲定。是亦自有其義焉。未可盡非也。

【明諡記彙編二十五卷】江蘇巡撫探進本。明郭良翰撰。良翰有周禮古本訂注。已著錄。茲編輯有明

一代諡法。最爲詳備。首曰功令。凡子目二。曰會典事例。曰近日事例。次曰諡法。無子目。次曰尊諡。凡子目九。曰帝后。曰皇妃。諡六字。曰皇妃。諡四字。曰皇妃。諡二字。曰東宮。曰公主。曰親王。曰郡王。曰王妃。次曰臣諡。凡子目九。曰文臣。曰武臣。曰異流。曰夫人。淑人。曰追贈前朝臣。曰外夷。曰近題准諡諸文臣。曰議論。曰考誤。其近題准諡一條。卽當代文臣。所以不散入各類者。蓋卽鮑應鰲書所載之二十九人。不予不奪。莫知所定者也。其議論一門。則雜探明人諸說。如李東陽以有黨諡文正。彭韶以孤立諡惠安之類。持論頗公。其考誤一門。以閣籍正野史異同。尤爲可據。亦考典故者所宜取證也。

【明宮史五卷】內府藏本。舊本題蘆城赤隱呂毖校次。毖始末未詳。蓋明季宦官也。其書敘述當時宮

殿樓臺服食宴樂。及宮闈諸雜事。大抵冗碎猥鄙。不足據爲典要。至於內監職掌條內。稱司禮監掌印乘筆。秩尊視元輔。權重視總憲云云。尤爲悖妄。蓋歷代奄寺之權。惟明爲最重。歷代奄寺之禍。亦惟明爲最深。二百餘年之中。盜持魁柄。濁亂朝綱。卒至於宗社邱墟。生靈塗炭。實爲漢唐宋元所未有。迨其末造。久假不歸。視威福自專。如其固有。遂肆無忌憚。筆之於書。故迹其致亡之道。雖亦多端。要以寵任貂璫。爲病本之所在也。然其人可誅。其事乃足爲炯鑑。家語稱周明堂之四門。有桀紂之象。儀禮鄉射禮。司射適堂西。命弟子設豐陳。祥道禮書。稱舊圖刻人形。謂豐國之君。嗜酒亡國。因狀之以爲戒也。漢書敘傳。載乘輿幄座。張畫屏風。畫紂醉踞妲己。作長夜之樂。班伯亦以爲警沈湎焉。豈非借彼前車。示其覆轍。俾後來以此思懼乎。我朝自列聖以來。家法森嚴。內豎不過供灑掃。或違律令。必正刑章。不待於遠引周官。委權冢宰。而乾綱獨握。宮掖肅清。已足垂法於萬世。乃猶防微杜漸。慮遠思深。特命繕錄斯編。登諸冊府。著前代亂亡之所自。以昭示無窮。伏考尙書有曰。殷鑒不遠。在夏后之世。詩大雅有曰。儀監于殷。亦越漢之高帝。使陸賈作新語。亦曰。著秦之所以失。與我之所以得。蓋時代彌近。資考鏡者彌切也。皇上於內殿叢編。檢逢是帙。闢其謬而仍存之。聖人之所見者大矣。謹恭錄諭旨。弁冕簡端。仰見衡鑒親操。折衷衆論。勒千古未有之鴻編。皆義主勸懲。言資法戒。非徒以雕華浮艷。爲藏弄之富也。

【幸魯盛典四十卷】 國朝襲封衍聖公孔毓圻等撰進。先是康熙二十三年。聖祖仁皇帝臨幸闕里。親

祀孔廟。行九拜之禮。特命留曲柄轍於廟庭。復親製碑文。遣官勒石於孔廟大成門左。周公孟子諸廟。咸蒙製文刊石。並錄聖賢後裔。給世官以奉祠祀。鉅典喬皇。薄海忻舞。毓圻以聖天子尊師隆軌。超邁古今。



宜勸爲成書。垂示來葉。二十四年。疏請纂修。并舉進士金居敬等八人司其事。得旨允。至二十七年。成書十八卷。奏進。蒙指示應改正者二十八條。及臣工詩文。尙有應遴選錄入者。諭毓圻等覆加校定。會詔發帑金。重建廟庭。御製奎章。摹鑄樂石。尊崇之典。視昔彌加。毓圻等乃續事編摩。增輯完備。凡修成事蹟。二十卷。藝文二十卷。刊刻表進。卽此本也。洪惟我聖祖仁皇帝。統接義軒。心源洙泗。褒崇聖教。典禮優隆。爲亙古所未有。非區區管闕蠡測。所可形容。然文物典章。毓圻等得諸見聞。頗能臚具。伏讀是編。大聖人崇儒重道之至意。猶可仰見其萬一。是固宜藏諸金匱。以昭示無極者矣。

【萬壽盛典一百二十卷】 康熙五十二年三月。恭逢聖祖仁皇帝六旬萬壽。內直諸臣所纂錄也。凡六門。一曰宸藻。分詔諭爲一卷。御製詩文賦頌爲一卷。二曰聖德。分孝德謙德保泰教化四目。三曰典禮。分朝賀鑾儀祭告頒詔養老大酺六目。四曰恩賚。分宗室外藩臣僚耆舊蠲賦開科賞兵恤刑八目。五曰慶祝。則有圖有記。以及名山祝釐諸臣朝貢之儀。備列焉。六曰歌頌。則內外祝釐之詞。靡不採錄焉。仰惟我聖祖仁皇帝德盛道隆。福祚悠久。其時臣民。泳涵醲化。敷天率土。普洽懽心。衢歌巷舞之盛。實爲從古所未有。而伏讀詔諭。每以萬姓安天下。福爲兢兢。是書之成。非徒以紀昇平之鉅典。正可以俾萬世臣民。仰見至聖持盈保泰之盛心。爲景命延洪之大本也。書中圖二卷。於遐邇臣庶。迎鑾呼祝之儀。纖悉具備。亦自有圖繪以來所罕觀。其橐本初爲宋駿業所創。後王原祁等重加修潤而成。一展卷而閭閻殷阜之象。童叟歡躍之忱。恍若目接而身遇之。今悉依原本鈎摹。故幅度視他卷稍贏焉。

【欽定大清通禮五十卷】 乾隆元年奉敕撰。越二十一年告成。首紀朝廟大典。及欽頒儀式。其餘五禮。

之序。悉準周官。而體例則依仿儀禮。惟載貴賤之等差。節目之先後。而不及其沿革。惟載器物之名數。陳設之方隅。而不及其形製。蓋沿革具於會典。則例形製具於禮器圖式。各有明文。足質考證。故不復述也。考儀禮古經殘闕。諸儒所說多自士禮上推於天子。且古今異制。後世斷不能行。其一朝令典。今有傳本者。惟開元禮。政和五禮新儀。大金集禮。明集禮。大抵意求詳悉。轉涉繁蕪。以備掌故。則有餘。不能盡見諸施行也。我皇上聲律身度。典制修明。特命酌定此編。懸爲令甲。自朝廷以迨於士庶。鴻綱細目。具有規程。事求其合宜。不拘泥於成迹。法求其可守。不夸飾以浮文。與前代禮書鋪陳掌故。不切實用者迥殊。記曰。禮從宜。又曰。大禮必簡。三代聖王。納民軌物。其本義不過如斯。賜名曰通禮。信乎酌於古今。而達於上下。爲億萬年治世之範矣。

【南巡盛典一百二十卷】 乾隆三十五年大學士管兩江總督高晉等恭撰進。欽惟我皇上法祖勤民。歲巡方岳。江浙東南都會。民物蕃庶。吏事殷繁。問俗省方。尤厪聖慮。是以六龍時御。清蹕屢經。凡行慶施。惠勸課耕桑。崇節儉。隆典祀。養耆年。卹庶獄。勵官方。振文教。飭武備者。無不具舉。而海塘防禦。湖河疏蓄之宜。皆因地制宜。親臨指授。永爲成法。至於名區勝蹟。容藻親題。則不獨黎庶蒙恩。而山川且望幸焉。晉等爰舉辛未以逮乙酉。鑾輿四幸之鉅典。門分部系。彙爲是編。復蒙賜製序文。允付剞劂。一展卷而我皇上諮詢之切。誥誡之殷。惠澤之覃布。如在瞻就。閒俾守土者有所遵循。而服疇者有所感發。非徒申歌頌。備典章而已也。書成於庚寅之冬。故所載以乙酉爲斷。邇者翠華六莅。典禮如初。而東南士庶。游被洪施。延跂望幸者。視前彌篤。臣等尤竊竊隆儀疊舉。續有排纂。用快先睹之望焉。

【欽定皇朝禮器圖式二十八卷】乾隆二十四年奉敕撰。乾隆三十一年。又命廷臣重加校補。勒爲此編。凡分六類。一曰祭器。二曰儀器。三曰冠服。四曰樂器。五曰鹵簿。六曰武備。每器皆列圖於右。系說於左。詳其廣狹長短圍徑之度。金玉璣貝錦段之質。刻鏤繪畫組繡之制。以及品數之多寡。章采之等差。無不縷析條分。一一臚載。考禮圖世稱始於鄭元。而鄭志不載。蓋傳其學者爲之也。阮謐以後踵而作者。凡五家。聶崇義匯合爲一。而諸本盡佚。然諸家追述古制。大抵皆約略傳注之文。揣摩形似。多不免於失真。是編所述。則皆昭代典章。事事得諸目驗。故毫釐畢肖。分判無譌。聖世規。燦然明備。其中儀器武備二類。舊皆別自爲書。今乃列之於禮器。與古例稍殊。然周代眡祿。保障章馮。相所職皆天象。而隸於春官。禮有五目。軍禮居三。而所謂前朱雀而後元武。左青龍而右白虎。招搖在上。急繕其怒者。戰陳之令。乃載於曲禮。蓋禮者理也。其義至大。其所包者亦至廣。故凡有制而不可越者。皆謂之禮。周官所述皆政典。而兼得周禮之名。蓋由於此。今以儀器武備併歸禮器。正三代之古義。未可以不類疑也。若夫酌古宜今之精意。奉天法祖之鴻規。具見御製序文之中。尤萬世臣民所宜遵道遵路者矣。

【國朝宮史三十六卷】乾隆七年奉敕撰。乾隆二十四年。以原書簡略。復命增修。越兩載而告成。凡六門。首曰訓諭。恭載列朝聖訓。皇上諭旨。以昭垂家法。次曰典禮。備著內廷儀節。規制冠服輿衛之度。其外朝諸大禮。詳於會典者。則略之。次曰宮殿。按次方位。詳列規模。凡御筆榜書楹帖。及諸題詠。並一一恭錄。次曰經費。凡獻寶禮宴服食器用之數。纖悉必載。次曰官制。具載內臣員品。及其職掌。與其功罪賞罰之等。次曰書籍。部分錄略。編目提要。皆窮理致治之作。而梵文具筴。皮藏淨域者。不與焉。伏讀諭旨申明編

輯是書之意。拳拳於立綱陳紀。聰聽明訓。爲萬萬世遵循之本。蓋修齊治平之道。並具於斯矣。

【欽定滿洲祭神祭天典禮六卷】 乾隆十二年奉敕撰。我國家肇迹東土。風淳俗厚。於崇德報功之禮。

歷久不渝。凡所以昭格天神。時修祀典者。著誠著愨。具有舊儀。迄今百有餘年。精禋致饗。夙夜維虔。惟是古制相沿。皆有口授。祝詞儀注。久而小有異同。我皇上道秉欽崇。敬深明察。慮年祀緜邈。或漸遠其初。乃命王公大臣。詳爲考證。以國語國書。定著一編。首爲祭儀二篇。次爲彙記故事一篇。次爲儀注祝詞贊詞四十一篇。殿以器用數目一篇。器用形式圖一篇。每一卷成。必親加釐正。至精至詳。祈報之義。對越之忱。皆足以昭垂萬世。乾隆四十二年。復詔依文音釋。譯爲此帙。與大清通禮相輔而行。用彰聖朝之令典。未有大學士阿桂等恭跋。具述致誠迓福之義。而於崇祀諸神。不知其緣起者。引禮記舍菜先師。鄭元注。不著先師名姓之例爲證。於祝詞贊詞。僅傳其聲者。引漢樂府鐸舞曲有音無義之例爲證。並以傳信闕疑。見聖心之敬慎。視漢儒議禮。附會緯書。宋儒議禮。紛更錯簡。強不知以爲知者。尤迴乎殊焉。

【八旬萬壽盛典一百二十卷】 乾隆五十四年正月。大學士阿桂等奏請纂修。五十七年十月告成。洪

惟我皇上。法天行健。無逸永年。久道化成。治躋三五。爲書契所未聞。而五世同堂。八旬延慶。洪範所謂身其康強。子孫其逢吉者。亦千古帝王所莫及。是以協氣翔洽。驩心溥浹。四海臣民。莫不踴躍鼓舞。祝眉壽而歌純嘏。雖聖懷冲挹。而敷天輻輳。衆志難違。慶典之隆。遂炳炳麟麟。照映萬禩。是編所載。皆聖壽七旬以後之事。凡分八門。首爲宸章。皆恭錄御製紀年之作。文自古稀說以下。詩自庚子元旦以下。俱按年編載。若隨時紀事之作。則各從本類。分載各門。次爲聖德。分八子目。曰敬德。曰孝德。曰勤德。曰健德。曰仁德。

曰文德。曰儉德。曰謙德。次爲聖功。分五子目。曰安南歸降。曰緬甸歸順。曰廓爾喀降順。曰附載平定臺灣。曰附載平定肅州。次爲盛事。分子目十一。曰慶得皇元孫。曰五世同堂。曰數世同居千叟宴。曰賜科第職銜。曰壽民壽婦。曰辟雎。曰班禪入覲。曰民數穀數。曰一產四男三男。曰收成分數。次爲典禮。分五子目。曰慶祝。曰朝會。曰祭告。曰鑾儀。曰樂章。次爲恩賚。分六子目。曰本年恩詔。曰本年蠲賦。曰本年恩科。曰本年東巡。曰恩宴。曰賞賚。次爲圖繪。附以圖說。次爲歌頌。則臣工祝釐之詞也。昔成周盛時。蒯詩緝頌。歌景福。稱菲祿者不一而足。然多虛擬之詞。不能言言有據也。茲編所載事皆徵實。蓋德盛而後化神。澤洽而後頌作。功成治定而後禮樂興。氣淑年和而後嘉祥集。其在詩曰。宜民宜人。受祿于天。保佑命之。自天申之。其在書曰。皇建其有極。敘時五福。用敷錫厥庶民。惟時厥庶民于汝極。錫汝保極。義均備於是焉。洵與聖祖仁皇帝萬壽盛典。祖武孫謀。後先焜燿。並萬代之隆軌矣。

【歷代建元考十卷】兩江總督採進本 國朝鍾淵映撰。淵映字廣漢。秀水人。自來紀元諸書多詳於正

統。惟國初吳肅公改元考同。及近時萬光泰紀元敘韻與淵映此書則併僞朝霸國以至草竊僭稱皆一一具載其例。以年號相同者列前。次以年號分韻排編。次列歷朝帝王及僭國始末。並外藩亦間及之。秩然有序。雖載籍浩博。蒐採難周。如蜀王衍。宋太祖年號。與輔公祐同。裘甫有維平之僭。成都爲西夏之稱。凡斯之類。不免間有闕漏。未可云毫髮無遺。然較吳萬二家足稱賅洽矣。

【北郊配位議一卷】浙江巡撫採進本 國朝毛奇齡撰。奇齡有仲氏易已著錄。康熙二十四年。太常寺卿徐元珙疏奏現行祀典。北郊既改北向。而三祖配位仍首東次西。同於南郊。請酌改所向。奇齡時官檢

討。因撰是書。其斥漢元始儀之誤。謂孟春合祀。天位在西。地位在東。皆因惑於曲禮。席南向北。向以西方爲上之文。其實曲禮據常坐言之。若禮坐之席。則儀禮射禮。皆筵賓席於戶西東上。自與曲禮異。考鄉射禮文。乃席賓南面東上。賈公彥疏云。言東上。因主人在東。故席端在東。不得以曲禮。席南向北。向西方爲上解之。奇齡本此。以折元始儀。實爲有據。至於元始儀配位西向。南向。亦相承曲禮。西向東向。以南方爲上之文。奇齡以後漢改從北上爲正。其論甚確。然考北上之義。亦本儀禮。大射儀曰。大夫繼而東上。若有東面者。則北上。燕禮曰。士既獻者。立於東方。西面北上。此北上之異於南上者。今奇齡知南向東上之本於儀禮。而獨未知西向北上之亦本於儀禮。則未免知一而不知二。奇齡又謂北郊既改從北向。則配位卽統於所向。地道尙右。配位當以東爲上。東乃北向之右也。今考儀禮大射儀曰。諸公阼階西。北面東上。燕禮曰。卿大夫皆入門右。北面東上。則北郊北向。配位以東爲上。與儀禮北面東上。義例全通。奇齡徒以地道尙右。定之亦爲未審。然全書考辨精核。援引博瞻。於宋明以來議禮之家。要爲特出矣。

【廟制圖考一卷】浙江巡撫探進本

國朝萬斯同撰。斯同字季野。鄞縣人。是書統會經史。折衷廟制。謂

廟不在雉門之外。考工記左祖右社。據王宮居中而言。是廟在寢東。蓋本蔡卞朱子易祓之說。又謂諸侯五廟。太祖居中。二昭居東。二穆居西。平行並列。蓋本賈公彥之說。又謂自虞夏商周。天子皆立七廟。惟周增文武二祧爲九廟。蓋本劉歆王舜諸家之說。又謂大傳小記祭法中庸詩序國語論語。所言禘皆據宗廟大祭。非圓丘。蓋本王肅之說。於是上溯秦漢。下迄元明。凡廟制沿革。悉爲之圖。以附於經圖之後。而綴以說。其用功頗勤。其義例亦頗明晰。視明季本之書。較爲賅備。其中所論。則得失互陳。如朱子謂羣昭皆

列北牖下而南向。羣穆皆列南牖下而北向。斯同則謂禮室中但有南牖無北牖。朱子爲誤。今考喪大記。寢東首于北牖下。註云。病者恆居北牖。或爲北墉。是室有北牖。明矣。詩塞向墜戶。經典釋文引韓詩云。向北向窗也。毛傳亦云。向北出牖也。孔疏云。爲備寒不塞南窗。故云北出牖。則是室有南牖。又有北牖。明矣。郊特牲云。薄社北牖。蓋但開北牖而塞其南。非凡屋本無北牖而特爲薄社開之也。荀子宥坐篇。子貢觀於魯廟之北堂。出而問孔子曰。鄉者賜觀於太廟之北堂。吾亦未輟還。復瞻被九蓋。註云。北堂神主所在也。九當爲北。蓋音盍。戶扇也。然則北堂既有北闔。何獨疑於北牖耶。明堂位。刮楹達鄉。註云。鄉牖屬。謂夾戶窗也。每室八窗爲四達。然則太廟之制。略似明堂。四面且皆有牖。又何獨於北牖而疑之耶。凡此之類。皆未深考者也。至如朱子祭圖。祖妣並列。斯同謂宗廟吉祭。一尸統二主。無女尸。何以知六廟之妣。盡入太廟。遂引曾子問。七廟五廟無虛主。惟祫祭爲無主。卽知妣主亦入太廟。凡此之類。則援證精確。爲前人所未發矣。雖大旨宗王黜鄭。固守一隅。然通貫古今。有條有理。不可謂非通經之學也。王士禎記斯同所著書目。有廟制圖考四卷。此本祇一卷。殆傳鈔者所合併歟。

右政書類。典禮之屬。二十四部。一千五十一卷。皆文淵閣著錄。

案六官之政。始於冢宰。茲職官已各自爲類。故不復及六官之序。司徒先於宗伯。今以春官所掌。帝制朝章悉在焉。取以託始。尊王之義也。

【救荒活民書二卷】浙江范懋柱家天一閣藏本。宋董燿撰。燿字季興。鄱陽人。紹熙五年進士。嘗知瑞安縣。是書前有自序。謂上卷考古以證今。中卷條陳救荒之策。下卷備述本朝名臣賢士之所議論。施行

可爲法戒者。書中所序。如以常平爲始。自隋義倉爲始。自唐太宗。皆不能遠考本原。然其載常平粟米之數。固隋書所未及。志也。其宋代蠲免優恤之典。載在宋史紀志。及文獻通考。續通鑑長編者。此撮其大要。不過得十之二三。而當時利弊。言之頗悉。實足補宋志之闕。勸分亦宋之政令。史失載。而此有焉。他若減租賃種。淳熙卹災令格。皆可爲史氏拾遺。而宋代名臣。救荒善政。亦多堪與本傳相參證。猶古書中之有裨實用者也。

【熬波圖一卷】永樂大典本 元陳椿撰。椿天台人。始末未詳。此書乃元統中。椿爲下砂場鹽司。因前提幹舊圖而補成者也。自各團竈座。至起運散鹽。爲圖四十有七。圖各有說。後繫以詩。凡晒灰打滷之方。運薪試運之細。織悉畢具。亦樓璫耕織圖。曾之謹農器譜之流亞也。序言地有瞿氏。唐氏爲鹽場提幹。又稱提幹諱守仁。而佚其姓。考雲間舊志。瞿氏實下砂望族。如瞿霆發。瞿震發。瞿電發。瞿時學。瞿時懋。瞿時佐。瞿先知輩。或爲提舉。或爲監稅。幾於世任鹽官。其地有瞿家港。瞿家路。瞿家園諸名。皆其舊迹。然創是圖者。不知爲誰。至唐氏則舊志不載。無可考見矣。諸圖繪畫頗工。永樂大典所載。已經傳摹。尙存矩度。惟原闕五圖。世無別本。不可復補。姚廣孝等編輯之時。雖校勘粗疎。不應漏落至此。蓋原本已佚脫也。

【錢通三十二卷】浙江巡撫採進本 明胡我琨撰。我琨字自玉。爵里未詳。據書中所記時事年月。是明

末人也。其書專論明代錢法。而因及於古制。首曰正朔一統。次曰原曰制。曰象曰用。曰才曰行。曰操曰節。曰分。曰異。曰弊。曰文。曰閏。凡十三門。每門之中。各爲小目。其載明制。起洪永。訖萬曆。徵引各史紀志列傳。以及古今說部文集。援據頗爲賅洽。於明代錢法沿革。條分縷析。言之尤詳。多明史食貨志及明會典明



典彙諸書所未備。其敘述古制。如引桂海虞衡志。記右江之銅。引宋會典。記利州諸監錢數。亦足補唐宋各史所未詳。他如錢象門之黃河錢。投河國錢諸品。又董道洪。遵李孝美。顧烜各家舊譜所未載。皆足以資考證。中如劉仁恭。九土爲錢之類。乃一時謬製。亦倣圖其式。未免稍雜。然義取賅備。不得不巨細兼收。亦未可以叢脞譏也。

【欽定康濟錄六卷】乾隆四年御定。初。仁和監生陸曾禹。作救饑譜。吏科給事中倪國璉。爲檢擇精要。釐爲四卷。會詔翰林科道輪奏經史講義。國璉因恭錄進呈。皇上嘉其有裨於實用。命內直諸臣。刪潤其詞。剗刪頒布。因賜今名。其書凡分四門。一曰前代救援之典。所錄故實。上起唐虞。下及元明。案朝代先後。編次。二曰先事之政。分子目六。三曰臨事之政。分子目二十四。四曰事後之政。分子目五。又附錄者四事。皆先引古事。後系論斷。案金穰木饑。天道恆然。堯水湯旱。聖朝不免。其挽回氣數。則在於人事之修舉。周禮荒政十有二。多主於省事。以節財。蓋預備之道。已散見於各職故也。我皇上宵衣旰食。軫念民依。或歲星偶沴。禾麥不登。賜蠲貸者。動輒數十百萬。賜賑卹者。亦動輒數十百萬。卽遇貪墨敗度。借拯災以蝕帑者。尙恐封疆大吏。因噎廢餐。杜侵冒之風。或靳撫綏之費。繪音宣諭。至再至三。含識之倫。罔弗共喻。仁宏博濟。實邁唐虞。是以國璉是編。特邀睿賞。臣等校錄之下。仰見勤求民瘼之心。與俯察邇言之意。均迥軼千古也。

【捕蝗考一卷】編修程晉芳家藏本。國朝陳芳生撰。芳生字漱六。仁和人。蝥蟻之害。春秋屢見於策書。詩大田篇。去其螟螣。及其蟊賊。無害我田穉。田祖有神。秉畀炎火。毛鄭之說。以炎火爲盛陽。謂田祖不受

此害持之付於炎火。使自銷亡。並非實火。是漢時尚未詳除蝗之制。故訓詁家有是說也。至唐姚崇作相。遣使捕蝗。引詩此語以爲證。朱子集傳亦從其說。於是捕蝗之法。始稍稍見於紀述。芳生此書取史冊所載事蹟議論彙爲一編。首備蝗事宜十條。次前代捕蝗法。而明末徐光啓奏疏最爲詳核。則全錄其文。附以陳龍正語及芳生自識二條。大旨在先事則預爲消弭。臨時則竭力剪除。而責成於地方官之實心經理。條分縷析。頗爲詳備。雖卷帙寥寥。然頗有裨於實用也。

【荒政叢書十卷】山西巡撫採進本。國朝俞森編。森號存齋。錢塘人。由貢生官至湖廣布政司參議。是書成於康熙庚午。輯古人救荒之法。於宋取董煟。於明取林希元。屠隆。周孔教。鍾化民。劉世教。於國朝取魏禧。凡七家之言。又自作常平義倉社倉三考。溯其源使知所法。復究其弊使知所戒。成書五冊。其官河南僉事時所撰也。末附鄖襄賑濟事宜及捕蝗集要。其官分守荆南道時所撰也。救荒之策。前人言之已詳。至積儲尤爲救荒之本。森既取昔人良規。班班具列。而於三考尤極詳晰。登之梨棗。俾司牧者便於簡閱。亦可云念切民瘼者矣。

右政書類邦計之屬。六部五十三卷。皆文淵閣著錄。

案古者司徒兼教養。後世則惟司錢穀。

以度支所掌。條目浩繁。然大抵邦計類也。故今統以邦計爲目。不復一一區別。

【歷代兵制八卷】浙江范懋柱家天一閣藏本。

宋陳傅良撰。傅良有春秋傳已著錄。是書上溯成周鄉

遂之法。及春秋秦漢唐以來歷代兵制之得失。於宋代言之尤詳。如太祖躬定軍制。親衛殿禁。戍守更迭。京師府畿內外相維。發兵轉餉捕盜之制。皆能撮舉其大旨。其總論之中。謂祖宗時兵雖少而至精。逮咸

平後邊境之兵增至六十萬。皇祐初，兵已一百四十一萬。謂之兵而不知戰，給漕輓，服工役，繕河防，供寢廟，養國馬者，皆兵也。疲老而坐食，前世之兵未有猥多如此。今日者，總戶口歲入之數，而以百萬之兵計之，無慮十戶而資一廂兵，十萬而給一散卒，其兵職衛士之給，又浮費數倍，何得而不大蹙云云。其言至爲深切。蓋傅良當南宋之時，目睹主弱兵驕之害，故著爲是書，追言致弊之本，可謂切於時務者矣。

【補漢兵志一卷】浙江巡撫採進本

宋錢文子撰。文子字文季，樂清人。紹熙三年，由上舍釋褐出身，以

吏部員外郎兼國史院編修官，歷宗正少卿，後退居白石山下，自號白石山人。宋初懲五代之弊，收天下甲兵，悉萃京師，謂之禁軍，輟轉增益，至於八十餘萬，而虛名冒濫，實無可用之兵。南渡以後，倉皇補苴，招聚彌多，而冗費亦彌甚。文子以漢承三代之後，去古未遠，猶有寓兵於農之意，而班史無志，因摭其本紀、列傳及諸志之中，載及兵制者，哀而編之，附以考證論斷，以成此書。卷首有其門人陳元粹序，述其作書之意甚詳。蓋爲宋事立議，非爲漢書補亡也。朱彝尊跋稱其言近而旨遠，詞約而義該，非低頭拱手高談性命之學者所能。然兵農既分以後，其勢不可復合，必欲強復古制，不約以軍律，則兵不足恃，必約以軍律，則兵未練而農先擾。故三代以下，但可以屯種之法，寓農於兵，不能以井田之制，寓兵於農。文子所論，所謂言之則成理，而試之則不可行者，卽以宋事而論，數十萬之衆，久已仰食於官，如一旦汰之，歸農，勢不能靖，惟有聚爲賊盜耳。如以漸而損之，則兵未能遽化爲農，農又未能遽化爲兵，倉卒有事，何以禦之。此又明知其弊而不能驟革者也。以所論切中宋制之弊，而又可補漢志之闕，故仍錄之，以備參考。文獻通考載此書，作補漢兵制，與此本不同。然文子明言班書無兵志，則作補兵志，審矣。通考蓋傳寫譌也。

【馬政紀十二卷】浙江巡撫探進本。明楊時喬撰。時喬有周易古今文全書。已著錄。是書紀明一代馬政。上起洪武元年。下至萬曆二十三年。分十有二門。一曰戶馬。二曰種馬。三曰俵馬。四曰寄養馬。五曰折糧。六曰鹽納贖戰功等馬。六曰兌馬。七曰擠乳。御用上陵出府并附給駟馬。八曰庫藏。九曰蠲卹。十曰政例。十一曰草場。十二曰各邊鎮行太僕寺苑馬寺茶馬司馬。於因革損益各悉原委。馬政莫詳於明。亦莫弊於明。時喬目擊其艱。身親其事。故雖哀集案牘之文。而所言深中時病。其條理悉具自序中。序末自署前太僕寺卿。而考明史本傳。惟載嘗爲太僕寺丞。是書時喬自刊。不應有誤。疑史或誤書也。

【八旗通志初集二百五十卷】雍正五年。世宗憲皇帝敕撰。乾隆四年告成。御製序文頒行。凡八旗分志十七卷。土田志五卷。營建志三卷。兵職志八卷。職官志十二卷。學校志四卷。典禮志十五卷。藝文志十卷。封爵世表八卷。世職表二十四卷。八旗大臣年表八卷。宗人府年表一卷。內閣大臣年表二卷。部院大臣年表二卷。直省大臣年表五卷。選舉表四卷。宗室王公列傳十二卷。名臣列傳六十卷。勳臣傳十九卷。忠烈傳十二卷。循吏傳四卷。儒林傳二卷。孝義傳一卷。列女傳十二卷。考天地自然之數。皆立體於九。而取用於八。故圓而布九宮。方而分九野。皆以四正四隅。拱乎中央。聖人法天地以立制。故井以公田居中。而家之數八。兵以中權爲主。而陣之數亦八。世傳風后之經。諸葛亮之圖。獨孤及之記。其法異世而同軌。我國家肇迹震維。寓兵於民。與古制符。太祖高皇帝初建四旗。後分爲八。亦與古制符。至於臂指之相維。奇正之相應。千變萬化。倏忽若神。則與陰陽往來。乾坤闔闢。同一至妙而不測。非古制所能盡矣。迨世祖章皇帝定鼎燕京。取五行相尅之用。以藍旗屬水。而居南。黃旗屬土。而居北。白旗屬金。而居東。紅旗屬火。

而居西以環衛紫垣百有餘年規模無改故此篇以兵制爲經而一切法令典章職官人物條分而爲緯鴻綱細目體例詳明案籍披圖足以見列聖開基貽謀遠大又以見生聚教養日熾日繁萬萬年磐石之業卜鞏固於無疆焉。

右政書類軍政之屬四部二百七十一卷皆文淵閣著錄。

案軍伍戰陳之事多備於子部兵家中此所錄者皆養兵之制非用兵之制也故所取不過數家。

【唐律疏義三十卷】兩淮鹽政探進本 唐太尉揚州都督趙國公長孫無忌等奉敕撰風俗通稱臯陶謨虞造律尙書大傳稱夏刑三千周刑二千五百是爲言律之始其後魏李悝著法經六篇一盜法二賊法三囚法四捕法五雜法六具法商鞅受之以相秦漢蕭何益戶興廢三篇爲九篇叔孫通又益旁章十八篇張湯越宮律二十七篇趙禹朝律六篇合六十篇馬融鄭康成皆嘗爲之章句魏世刪約漢律定增十九篇就故五篇合十八篇晉復增損爲二十篇南北朝互有更改漸近繁密隋文帝開皇三年敕蘇威牛宏等更制新律除死罪以下千餘條定留五百條凡十二卷一名例二衛禁三職制四戶婚五廩庫六擅興七盜賊八鬪訟九詐僞十雜律十一捕亡十二斷獄史稱其刑網簡要疎而不失唐太宗詔房元齡等增損隋律降大辟爲流者九十二流爲徒者七十一而大旨多仍其舊高宗卽位又命長孫無忌等偕律學之士撰爲義疏行之卽是書也論者謂唐律一準乎禮以爲出入得古今之平故宋世多採用之元時斷獄亦每引爲據明洪武初命儒臣同刑官進講唐律後命劉惟謙等詳定明律其篇目一準於唐至洪武二十二年刑部請編類頒行始分吏戶禮兵刑工六律而以名例冠於篇首本朝折衷往制垂憲萬

年欽定大清律例。明簡公平。實永爲協中。弼教之盛軌。臣等嘗伏讀而紬繹之。凡唐律篇目。今所沿用者。有名例。職制。賊盜。詐僞。雜犯。捕亡。斷獄。諸門。其唐律台而今分者。如戶婚。爲戶役。婚姻。廩庫。爲倉庫。廩牧。鬪訟。爲鬪毆。訴訟。諸門。其名稍異。而實同者。如衛禁。爲宮衛。擅興。爲軍政。諸門。其分析類附者。如關津。留難。諸條。唐律入衛禁。今析入關津。乘輿。服御。物事。應奏。不奏。駟使。稽程。以財行求。諸條。唐律俱入職制。今分析入禮律之儀制。吏律之公式。兵律之郵驛。刑律之受贓。謀殺人。諸條。唐律入賊盜。今析入人命。毆罵。祖父母。父母。諸條。唐律並入鬪訟。今析爲兩條。分入鬪毆。罵詈。又姦罪。市司。平物。價盜。決隄。防毀。大祀。丘壇。盜食。田園。瓜果。諸條。唐律俱入雜律。今分析入刑律之犯姦。戶律之市廛。田宅。工律之河防。禮律之祭祀。蓋斟酌畫一。權衡允當。迨今日而集其大成。而上稽歷代之制。其節目備具。足以沿波而討源者。要惟唐律爲最善。故著之於錄。以見監古立法之所自焉。其書爲元泰定間。江西儒學提舉柳贇所校刊。每卷末附以江西行省檢校官王元亮釋文及纂例。亦頗可以資參訂也。

【大清律例四十七卷】 乾隆五年奉敕撰。御製序文。頒行。凡律目一卷。諸圖一卷。服制一卷。名例律二卷。吏律二卷。戶律七卷。禮律二卷。兵律五卷。刑律十六卷。工律二卷。總類七卷。比引律條一卷。前列凡例十則。及順治初年以來奏議。而恭錄世祖章皇帝御製序一篇。聖祖仁皇帝諭旨一道。世宗憲皇帝御製序一篇。諭旨一道。冠於卷首。蓋我朝律文。自定鼎之初。卽詔刑部尚書吳達海等。詳考明律。參以國制。勒爲成書。頒布中外。康熙九年。大學士管刑部尚書事。對喀納等。復奉詔校正。旋又諭部臣。於定律之外。所有條例。或刪或存。詳爲考定。隨時增改。刊附律後。逮雍正元年。大學士朱軾。尚書查郎阿等。奉詔續成。我

皇上御極之初卽允尙書傅鼎之請簡命廷臣逐條考正以成是編纂入定例凡一千餘條而皇心欽恤道取協中凡讞牘奏陳皆辨析纖微衡量情法隨事訓示務準其平以昭世輕世重之義又每數載而一修各以新定之例分附於後在廷之臣恭聆玉音或略迹而原心或推見以至隱折以片言悉斟酌於天理人情之至信聖人留心庶獄爲千古帝王之所無而是編亦爲千古之玉律金科矣

右政書類法令之屬二部七十七卷皆文淵閣著錄

案法令與法家其事相近而實不同法家者私議其理法令者官著爲令者也刑爲盛世所不能廢而亦盛世所不尙茲所錄者略存梗概而已不求備也

【營造法式二十四卷】浙江范懋柱家天一閣藏本 宋通直郎試將作少監李誠奉敕撰初熙寧中敕將作監官編修營造法式至元祐六年成書紹聖四年以所修之本祇是料狀別無變造制度難以行用命誠別加撰輯誠乃考究羣書并與人匠講說分列類例以元符三年奏上之崇寧二年復請用小字鏤版頒行誠所作總看詳中稱今編修海行法式總釋總例共二卷制度十五卷功限十卷料例并工作等共三卷圖樣六卷目錄一卷總三十六卷計三百五十七篇內四十九篇係於經史等羣書中檢尋考究其三百八篇係自來工作相傳經久可用之法與諸作諳會工匠詳悉講究蓋其書所言雖止藝事而能考證經傳參會衆說以合於古者飭材庀事之義故陳振孫書錄解題以爲遠出喻皓木經之上考陸友仁硯北雜志誠所著尙有續山海經十卷古篆說文十卷續同姓名錄二卷琵琶錄三卷馬經三卷六博經三卷則誠本博洽之士故所撰述具有條理惟友仁稱誠字明仲而書其名作誠字然范氏天一閣

影鈔宋本。及宋史藝文志文獻通考俱作誠字。疑友仁誤也。此本前有誠所奏劄子及進書序各一篇。其第三十一卷當爲木作制度圖樣。上篇原本已闕。而以看詳一卷錯入其中。檢永樂大典內亦載有此書。其所闕二十餘圖。並在今據以補足。而仍移看詳於卷首。又看詳內稱書總三十六卷。而今本制度一門較原目少二卷。僅三十四卷。永樂大典所載不分卷數。無可參校。而核其前後篇目。又別無脫漏。疑爲後人所併省。今亦姑仍其舊云。

【欽定武英殿聚珍版程式一卷】乾隆四十一年戶部侍郎金簡恭撰進呈。初乾隆三十八年詔纂修四庫全書。復命擇其善本校正。剗以嘉惠藝林。金簡實司其事。因棗梨繁重。乃奏請以活字排印。力省功多。得旨俞允。併賜以嘉名。紀以睿藻。行之三載。印本衣被於天下。金簡因述其程式。以爲此書考沈括夢溪筆談稱慶歷中有布衣畢昇始爲活版。其法用膠泥刻字。薄如錢唇。每字爲一印。火燒令堅。先設一鐵版。其上以松脂蠟和紙灰之類。冒之。欲印則以一鐵範置鐵版上。乃密布字印。滿鐵範爲一版。持就火煬之。藥稍鎔。以一平板按其面。則字平如砥。若止印二三本。未爲簡易。若印數千百本。則極爲神速。云云。活字之法。斯其權輿。然泥字既不精整。又易破碎。松脂諸物亦繁重周章。故王楨農書所載活字之法。易以木版。其貯字之盤。則設以轉輪。較爲徑捷。而亦未詳備。至陸深金臺紀聞所云鉛字之法。則質柔易損。更爲費日損工矣。是編參酌舊制。而變通以新意。首載諸臣奏議。次載取材雕字之次第。以及皮置排類之法。凡爲圖十有六。爲說十有九。皆一一得諸試驗。故一一可見諸施行。乃知前明無錫人以活字印太平御覽。自隆慶元年至五年。僅得十之一二者。案事見黃正色太平御覽序。由於不得其法。此亦足見聖



朝制器利用。事事皆超前代也。

右政書類。考工之屬。二部。三十五卷。皆文淵閣著錄。

### 卷八十三

史部三十九

#### 政書類存目一

【杜氏通典詳節四十二卷】浙江巡撫採進本。不知何人所編。驗其版式。猶宋時麻沙刻本。所列引用諸儒姓氏。止於呂祖謙。陳傅良。葉適三人。皆註有文集見行字。則南宋人所爲也。於杜氏通典八門內。汰其兵制一門。於禮制門內。又刪去喪服之制。故六朝諸儒議禮之文。藉通典以傳者。多不見錄。又其去取多不可解。如通典卷一。載後漢田制。凡列荀悅。崔寔。仲長統三人之說。而是書獨存荀悅。蓋力求簡約。而略無義例者也。

【元典章前集六十卷】附新集。無卷數。內府藏本。不著撰人名氏。前集載世祖卽位至延祐七年。英宗初政。其綱凡十。曰詔令。曰聖政。曰朝綱。曰臺綱。曰吏部。曰戶部。曰禮部。曰兵部。曰刑部。曰工部。其目凡三百七十有三。每目之中。又各分條格。新集體例。略倣前集。皆續載英宗至治元二年事。不分卷數。似猶未竟之本也。此書始末。元史不載。惟載至治二年金帶御史李端言。世祖以來所定制度。宜著爲令。使吏不得爲姦。治獄有所遵守。英宗從之。書成名曰大元通制。頒行天下。凡二千五百三十九條。計其時代。正

與此書相同。而二千五百三十九條之數。則與此書不相應。卷首所載中書省劄。亦不相合。蓋各爲一編。非通制也。考元史以八月成書。諸志皆潦草殊甚。不足徵一代之法制。而元經世大典。又久已散佚。其散見永樂大典者。顛倒割裂。不可重編。遂使百年掌故。無成書之可考。此書於當年法令。分門臚載。採掇頗詳。固宜存備一朝之故事。然所載皆案牘之文。兼雜方言俗語。浮詞妨要者。十之七八。又體例贅亂。漫無端緒。觀省劄中有置簿編寫之語。知此乃吏胥鈔記之條格。不足以資考證。故初擬繕錄。而終存其目焉。

【明祖訓一卷】浙江巡撫採進本。明洪武二年。命中書編次。其目十有三。一祖訓首章。一持守。一嚴祭祀。一僅出入。一慎國政。一禮儀。一法律。一內令。一內官。一職制。一兵衛。一營繕。一供用。至六年五月書成。太祖自爲序。復命宋濂序之。此本佚濂序。惟太祖之序載篇首。序稱開導後人。立爲家法。大書揭於西廡。朝夕親覽。以求至當。首尾六年。凡七騰錄。藁至今方定。命翰林編輯成書。禮部刊印云云。然則諸詞臣僅繕錄排纂而已。其文詞悉太祖御撰也。其中多言親藩體制。大抵懲前代之失。欲兼用封建郡縣。以相牽制。故親王與方鎮各掌兵。王不得預民事。官吏亦不得預王府事。尤諄諄以姦臣壅蔽。離間爲慮。所以防之者甚至。如云若大臣行姦。不令王見天子。私下傳致其罪。而遇不幸者。其長史司併護衛。移文五軍都督府。索取姦臣族滅其家。又云如朝無正臣。內有姦惡。則親王訓兵待命。或領正兵討平。然則靖難之事。肇釁於此。高煦宸濠。遂接踵效尤。是亦矯枉過直。作法於涼之弊矣。皇甫錄明記略云。祖訓所以教戒後世者甚備。獨無委任閣人之禁。世以爲怪。或云本有此條。因版在司禮監削去耳。然永樂大典所載。亦與此本相同。則似非後來削去錄所云云。蓋以意揣之也。

【明朝典彙二百卷】浙江巡撫採進本

明徐學聚撰。學聚有歷朝璫鑑已著錄。是書採錄明代典故。自

洪武訖隆慶。分類編纂。上自實錄。下訖稗乘。條分類萃。凡二百門。卷一至三十三卷。爲朝政大端。三十四卷以下。則以六部分標。記載頗爲繁富。然分隸不無錯雜。如明制六部與卿寺院監。不相統攝。此書則以宗人府都察院以下。皆歸入吏部。又如廟號尊諡。陵寢巡幸。郊祀祈禱。祠醮。皆禮部職也。較閱兵部職也。耕蠶莊田勳戚田土。皆戶部職也。此書則一切歸入朝政大端中。於體例皆爲未協。又採摭浩博。而皆不著其出典。亦未免無徵不信。李燾續通鑑長編。凡所引證。必著書名。不如是之莫知所本也。

【經世實用編二十八卷】江蘇周厚堦家藏本

明馮應京撰。應京有六家詩名物疏。已著錄。是編乃萬

歷甲辰。應京下詔獄時所成。分乾元亨利貞五集。乾集十卷。元集二卷。亨集二卷。利集四卷。貞集九卷。首載明太祖心法祖訓。以迄取士任官重農經武禮樂射御書數。而終之以諸儒語錄。正學考。大都稟祖訓爲律令。而以歷朝沿革附之。其用意不無可取。至以乾元亨利貞分集。取姜里演易之義。則未免於僭矣。【明典章】無卷數 浙江巡撫採進本 不著撰人名氏。輯太祖吳元年以後。世宗嘉靖十五年以前。朝廷制誥典制。大抵從實錄鈔出。編次殊無體例。

【會典鈔略】無卷數

內府藏本

不著編輯者名氏。前有題詞。稱會典一書。卷逾二百。嚮之價多。攜之

囊重。士有自操槩。以至歷官。不獲一睹者。其在里巷齊民。尤可知已。但全書紀載雖夥。其當訓行者。概有大略。因手鈔略節。約十餘帙。間附註通紀一二事。以備參考云云。是其書在陳建通紀之後矣。右政書類。通制之屬。七部。三百三十一卷。內二部無卷數。皆附存目。

【別本漢舊儀二卷】兩江總督採進本。舊本題漢議郎東海衛宏敬仲撰。宏所撰漢官舊儀已於永樂大典內繕出著錄。語詳本條下。此本書名與後漢書宏本傳合。而四篇之數仍不合併。與書錄解題三卷之數亦不相應。其中多引胡廣語。廣爲安帝時人。宏爲議郎。則在光武帝時。先後相隔六十餘年。不應宏書之內先有廣名。又時時稱衛宏曰亦必非宏自著書之體。其註中并引及周禮註疏。註出鄭康成。疏出唐賈公彥。宏益不得見之矣。蓋原書久佚。後人從漢書註中摘錄而成。觀其中竹宮去壇三里一句。前後兩見。則爲雜鈔致複無疑矣。今宋代舊本猶存永樂大典中。業已校錄刊刻。重顯於世。此後人裒集之本固可置而不論矣。

【貢舉敍略一卷】編修程晉芳家藏本。舊本題宋陳彭年撰。載曹溶學海類編中實冊府元龜貢舉一門之總序。以彭年爲作序五人之一。遂題彭年之名。然原本不言此序出彭年也。

【通祀輯略二卷】兩淮鹽政採進本。不著撰人名氏。載歷代崇祀孔廟禮儀。起魯哀公。迄宋咸淳三年。疑爲元人作也。凡三卷。上卷分諡號廟祀殿額坐像冕服封爵位序配享八門。中卷分從祀鄉賢二門。下卷分釋奠樂章曲阜廟幸學謁廟告遷奉安五門。

【明堂或問一卷】左都御史張若淮家藏本。明世宗肅皇帝御撰。嘉靖十七年。致仕同知豐坊疏請復

古禮。建明堂。加興獻帝廟號。稱宗以配上帝。詔下禮部會議。尙書嚴嵩等皆以明堂爲應建。而於稱宗配享二事。則依違其詞。戶部侍郎唐胄抗疏言宜以太宗配享。帝怒。下胄獄。嵩乃再會廷臣議。請以興獻帝稱宗配食。帝以疏不言祈廟。留中不下。復設爲臣下問答之詞。作或問一篇。大略言文皇遠祖。不應嚴父

之義宜以父配稱宗。雖無定說。尊親崇上。義所當行。既稱宗。則當祔廟。豈有太廟中四親不具之禮。是年九月。遂尊興獻帝爲睿宗。祔太廟。又卽元極寶殿爲明堂。大享上帝。以睿宗配。皆如帝旨。此本前有帝所自作小序。後以配享詔書一通附之。

【正孔子祀典說一卷】左都御史張若淮家藏本。明世宗肅皇帝御撰。嘉靖九年。大學士張璠請正先師祀典。帝因言聖人尊天與尊親同。今全用祀天儀。非正禮。謚號章服。悉宜改正。璠遂請改孔子稱先師。不稱王。用木主。不用塑像。籩豆用十。樂用六佾。配位宜削公侯伯之號。止稱先賢先儒。帝命禮部集議。編修徐階。疏陳不可。帝怒。謫階官。因親製此文。宣付史館。大略謂孔子以魯僭王爲非。寧冒自僭天子之禮。尋以羣臣爭執者衆。復降諭曉示。命禮部與祀典說通行刊布。於是其議遂定。案明史禮志。尙有帝所製正孔子祀典申記一篇。此本所附敕諭中亦有朕著說記之語。而書中有說無記。疑爲傳寫者所脫也。

【存心錄十卷】浙江朱彝尊家曝書亭藏本。不著撰人名氏。皆記明初壇廟祭祀之制。而附以災祥物異。其前有序。稱臣等承命作此錄。以堅誠敬之心。是奉敕所撰。而其文多殘損不完。考明史藝文志。有吳沈等編集存心錄十八卷。精誠錄三卷。皆在故事類中。吳沈者。蘭溪人。元國子博士師道子。洪武時。官東閣大學士。嘗著辨言孔子封王之非禮。後嘉靖中。更定祀典。實祖其說。則其人嫻於說禮可知。而此書內所載禮節。皆洪武三年以前之事。則藝文志所謂存心錄者。卽此書也。惟此本止十卷。與十八卷之數不合。檢核書首有私印一。其文曰尙寶少卿袁氏忠徹印。蓋猶明初舊本。尙無脫佚。又黃佐南離志載嘉靖間存心錄版。存者五十八。而闕者三面。所列亦止十卷。與此本同。是史志誤衍一八字也。

【日本東夷朝貢考一卷】浙江范懋柱家天一閣藏本 明張迪撰。迪字文海，華亭人。所輯日本朝貢事，頗多闕略。如永樂二年封其國山爲壽安鎮國之山，兩遣使來貢等事，悉佚不載。書末全錄宋元二史外國列傳，以足其卷。似是議日本封貢時，偶爲考紀云。

【臨雍錄一卷】浙江范懋柱家天一閣藏本 明費闈撰。闈字廷言，丹徒人。成化己丑進士。官至禮部侍郎。宏治元年三月，孝宗舉行臨雍釋奠禮。闈時爲祭酒，因錄其禮儀奏議及官禮部時，乃編次成書。付淮安知府徐鏞刻之。至宏治九年，林瀚兼祭酒事，又刻於國子監。其書全錄吏牘之文，無一字之刪潤。詞不雅馴，不足以稱崇儒大典。考郊外農談曰：鳳翔之麟游有虎臣者，慷慨有節氣，成化末貢入太學。適聞萬歲山架櫻棚，以備登眺。臣上疏極諫，憲廟奇之。祭酒費闈不知也，懼其賈禍，乃會六堂鳴鼓聲罪，銀鐺鎖之以待。俄官校宣臣至左順門，中官傳溫旨勞之，曰：爾言是也。櫻棚好拆卸矣。命吏部予臣七品正官。闈大慚云云。則闈爲癸酒，本不愜於公論。其著作益可知矣。

【大禮集議五卷】浙江范懋柱家天一閣藏本 明席書編。書遂寧人。宏治庚戌進士。官至武英殿大學士。諡文襄。事蹟具明史本傳。嘉靖初，書爲南京兵部侍郎。大禮議起，書揣知帝意，方向張璁、桂萼乃上疏力主其說。帝大喜。時汪俊代毛澄爲禮部尚書，猶堅執如澄議。及俊以力爭建廟去位，帝特旨用書代之。此編卽其爲禮部尚書時所編刻以進者也。初，侍讀學士方獻夫請刊大禮奏議二卷，後吏部侍郎胡世寧復續增一卷。至廟議已定，書乃取原編定爲奏議一卷，會議一卷，續議一卷，復增廟議一卷。末又附諸臣私議一卷。私議者議而未奏者也。然皆不外璁、萼等附合時局之說耳。

【科場條貫一卷】江蘇巡撫探進本 明陸深撰。深有南巡日錄。已著錄。是書紀洪武至嘉靖間科舉條式於前後損益之制。臚列頗詳。

【保和冠服圖一卷】浙江范懋柱家天一閣藏本 明張璠撰。璠有諭對錄。已著錄。是書作於嘉靖七年。在璠未更名以前。故仍題原名。先是世宗命璠製燕弁冠服。爲燕居所御。又製忠靜冠服。以錫有位。會光澤王請宗室冠服式。命以燕弁爲準。定爲此圖。而敕璠爲之說。前有諭旨。及璠序。其冠親王九襖。世子八襖。郡王七襖。服用青身青緣。前後方龍補。襖用深衣玉色。帶用青表綠裏。綠緣。履用皂綠結。白韞。其鎮國將軍至奉國中尉。左右長史至伴讀。咸從忠靜冠服。以品官之制服之。其儀賓則不預焉。名曰保和。言各得其分則和也。其冠圖爲前後左右四面。服圖爲前後二面。較三禮諸圖繪一面者爲詳。可爲繪圖之式云。

【太廟敕議一卷】左都御史張若淮家藏本 明嘉靖中禮部頒行本也。成祖旣遷都北平。而南京太廟仍舊不廢。至嘉靖十三年。南京太廟災。禮部尙書湛若水疏請重建。世宗敕羣臣集議。尙書夏言及大學士張孚敬等。會疏稱國不當有二廟。請以南京太廟香火。歸併奉先殿。其太廟故址。仿古壇墠遺意。高築牆垣。令所司謹其啓閉。帝從其議。言因取所奉敕旨。及會議題彙。彙成此帙。奏請刊行。

【改元考一卷】兩江總督探進本 明宗室朱常澗撰。前有自序。載嘉靖壬午魯國常澗識。考明史諸王世表。不載其名。蓋魯荒王檀之元孫。而懷王常澗之從兄弟也。此書專考歷代年號。起漢建元。迄明嘉靖。自正統以及僭偽。偏安。無不具載。然其中譌謬之處。不一而足。如十六國春秋。載蜀李雄以晉永興元年。

僭稱成都王。改元建興。次年卽帝位。改元晏平。國號大成。乃華陽國志。偶譌大成爲大武。而晉書載記。遂刪晏平及國號四字。直曰改元大武。此書竟以大武與晏平並列。殊爲疎舛。又後秦姚萇。初稱秦王。改元白雀。三年僭帝號。又改建初。建初七年萇卒。子興立。卽改爲皇初。此書於白雀後。誤增皇初。而建初之號。又誤移之姚興之下。又西秦乞伏乾歸。僭號河南王。改元太初。後降於姚興。尋又倍之。自稱秦王。改元更始。此書於太初之後。更始之前。誤增一宏始。殊不知宏始乃姚興之年號。非乾歸之年號也。因乾歸降興時。史冊用興年紀事。而遂屬之乾歸。鹵莽甚矣。其他輾轉譌謬。如於乞伏熾磐。則脫永康之號。而於慕容皝。則多永壽之號。大抵沿襲別本之譌。而失於稽考。至於明太祖以下。至世宗。皆直書名某。而不避其諱。常泐原本。未必敢於如是。或傳寫者所追加歟。

【重輯祖陵紀略二卷】兩江總督採進本 明宗室朱自新撰。祖陵者。明高帝祖熙祖陵也。在泗上。初高帝未知熙祖葬所。有朱貴者。繪圖以獻。卽命貴充奉祀。其八世孫邦翰。因輯祖陵紀略一書。述修繕祭祀之事。嘉靖癸丑。自新又重輯。是編。自新邦翰孫也。

【諡法通考十八卷】浙江朱彝尊家曝書亭藏本 明王圻撰。圻有東吳水利考。已著錄。圻著續文獻通考。於禮考之末。增諡法一目。補馬端臨之闕。然於明代諡典。猶未之及。此書所載。上考列朝。下至萬曆。自君后妃主王公卿相。以逮百官。至於聖賢隱逸。旁及異端。官寺篡逆之黨。凡有諡者。皆備書。以資考證。其卷首冠以總紀釋義二目。猶續通考之例。又所以自補其闕也。有趙可懷序。稱就續通考中。抽出諡法一種。另梓。殆未詳閱其書歟。



【太常總覽】無卷數 兩淮馬裕家藏本 明金贊仁撰。贊仁嘉靖初道士以齋醮有寵。官太常寺少卿。是書嘗經奏進。於典禮分別圖註。條理頗詳。然大抵其時之黷祀也。

【明臣諡類鈔一卷】內府藏本 明鄭汝璧撰。汝璧有明帝后紀略。已著錄。是書專載明代臣僚之得諡者。始自劉基。終於李珍。凡六百六十一人。各以諡法區分門類。而不敍年代。末附蘇祿朝鮮淳泥日本諸國王。凡得諡者。咸編入焉。其不載親藩者。則以帝后紀略。已附藩封一門故也。汝璧此書。與功臣封爵考。乃其官禮部儀制司及吏部驗封司時所作。皆有案牘可考。故紀載較他家爲確云。

【明貢舉考九卷】浙江鮑士恭家藏本 明張朝瑞編。朝瑞有忠節錄。已著錄。是書專考明代科舉之制。首爲場屋事例一卷。於沿革之故。言之頗詳。附以貢舉紀略。不入卷數。二卷以下。則起洪武三年庚戌。迄萬曆十七年己丑。其目錄止於萬曆癸未。蓋丙戌以後。又以次而增也。每科載會試考官試題及所刻程文之目。殿試之榜。首尾全錄。會試之榜。則惟錄前五人。鄉試之榜。則惟錄各省第一人。其有名臣碩儒。足傳於後者。皆附記於制策之末。名姓籍貫之異同。亦附註焉。其考據頗爲詳核。惟貢舉紀略載狀元。老年少之類。類乎說部。於體例爲未安。第一卷事例之中。雜引諸儒之論。至於引桂有三種。紅爲狀元。黃爲榜眼。白爲探花。以證鼎甲三人名所自起。尤爲蕪雜矣。

【諡苑二卷】浙江范懋柱家天一閣藏本 明朱陸樺撰。陸樺有易學識遺。已著錄。是編上卷輯古諡法。十二家。曰史記諡法解。曰周書諡法。曰蔡邕獨斷諡法。曰蘇洵諡法。曰周公諡法。曰春秋諡法。曰廣諡法。曰沈約諡法。曰賀琛諡法。曰扈蒙諡法。曰鄭樵諡法。曰陳思諡法。其周公春秋廣諡。沈約賀琛扈蒙六家。

因王圻續文獻通考之舊。餘六家則陸樛增輯也。周亮工作書影。嘗疑漢蕭何諡曰文終。不知於諡法居何等。今考周公諡法下卷。乃有終字。則其傳已久。然其書最不可解。堯舜禹湯謂之諡。此猶相傳有說。帝王侯君公。亦列爲諡。設帝常諡帝。將曰帝帝。王當諡王。當曰王王乎。又設帝當諡王侯。當曰王帝侯帝。王侯當諡帝。當曰帝王帝侯乎。此等宜有所辨正。一概因其原文。不足以爲考證。王圻續文獻通考。舛漏百出。其與古書不合者。皆校刻之誤。乃據之以註異同。尤爲失考。唐會要亦有諡法篇。漏而不收。亦爲疎略。下卷列明代王侯以下。至於守令之諡。不及鮑應龍書之賅備。又頗舛誤。參以諸書。如徐溥諡文靖。而曰文穆。顧鼎臣諡文康。而曰文簡。喬宇諡莊簡。而曰端簡。馬昂諡恭襄。而曰忠襄。墨麟諡榮毅。而曰文毅。不一而足。則亦不盡可據矣。

【王國典禮八卷】江蘇周厚堦家藏本 明朱勤葵撰。勤葵字伯榮。開封人。鎮國中尉陸樛子。爲周藩宗正。以文學世其家。是書採輯宗藩成憲。勒爲一書。分聖訓。玉牒。講讀。冠禮。婚禮。爵秩。冠服。宮室。儀仗。祿米。田地。祀禮之國。錫命。慶祝。入覲。奏事。宴饗。喪禮。事例。管理。宗子。獎勸。懲戒。秩官。儀賓。兵衛。倉庾。支鹽。諱禁。凡三十類。每類又各有子目。

【孔廟禮樂考六卷】兩淮馬裕家藏本 明瞿九思撰。九思有春秋以俟錄。已著錄。是書於孔廟禮樂沿革同異。考證頗詳。勝他家鈔撮舊文。有同簿籍者。惟二卷以從祀諸弟子編爲歌括。殊乖體例。

【歷代貢舉志一卷】編修程晉芳家藏本 明馮夢禎撰。夢禎字開之。秀水人。萬歷丁丑進士。官至國子

監祭酒。是書敘歷代貢舉之制。如敘周官而於大司徒。鄉老。大宰。內史。選士之法。不詳。敘漢制而誤以董

仲舒之舉賢良。在建元之初。魏晉以降。中正九品之法盛行。遼金元亦有進士科。及薦舉制科。載於各史。志者甚悉。夢禎一概略之。未免過簡。不足以資考證也。

【明典禮志二十卷】浙江巡撫探進本。明郭正域撰。正域有批點考工記。已著錄。是書其官禮部尙書時所輯。第一卷爲登極儀。二卷爲朝儀。三卷爲宴享儀。四卷爲尊號。五卷至七卷爲冊封。八卷爲冠禮。九卷爲婚禮。十卷爲喪禮。十一卷爲耕藉。十二卷爲親蠶。十三卷爲經筵日講諸儀。十四卷爲出閣讀書諸儀。十五卷爲巡狩。十六卷爲監國。十七卷爲儀仗。十八卷爲冠服。十九卷爲宮室。其子目一百二十有七。二十卷爲雜典禮。其子目六十有六。敍次亦尙明簡。而體例頗叢脞。朝儀旣自爲卷。而外戚朝見。又入雜典禮中。進寶錄。進玉牒。受降。獻俘。宣捷。皆國之大事。亦入雜典禮中。至於郊祀宗廟。乃闕而不載。尤不喻其故也。

【學科考略一卷】編修程晉芳家藏本。明董其昌撰。其昌字元宰。華亭人。萬曆己丑進士。官至禮部尙書。諡文敏。事蹟具明史文苑傳。是書敍歷代立學之制。兼敍孔廟封贈配享之始。而貢舉之志兼及焉。如敍太公廟起於唐。而宋以後不載。敍明經起於漢。而唐宋明經之選亦不載。殿試親策。祇載漢唐及宋。而遼金元悉不載。殊爲疎略。此與馮夢禎歷代貢舉志。俱載於學海類編中。疑亦鈔撮割裂而成也。

【明諡考二十八卷】山東巡撫探進本。明葉秉敬撰。秉敬有字學。已著錄。是書採集有明一代諸臣之諡。創爲冠額之法。以上一字爲冠。下一字爲額。復依四聲次第分蔡。其例頗爲杜撰。而所載之諡亦多舛誤。如宋濂正德間追諡文憲。而作文惠。又載陶琰鄭世威俱諡恭介。而不及陳有年。有年得諡。在萬曆二

十六年書中載趙志昂諡文懿在二十九年則不可謂非考據之疎矣。末一卷所載祖父子孫得諡者亦多所遺漏未爲詳贖。

【儲堂考故一卷】浙江巡撫探進本 明張鼎撰。鼎有吳淞甲乙倭變志已著錄。此其官司業時所述明代國學典故兼及軼事。大旨主於端師範抑倖進。其言多切要中理。惟所載國學官陳言國事一條於義未允。師儒之官掌教化而已。必以與聞朝政爲美談。是未考宋季三學之弊者也。

案黃佐南雍志入職官。而此及辟離紀事別入政書者。佐所志者以太學官制職掌爲綱。二書則但述故事也。

【諡法纂十卷】浙江汪啓淑家藏本 明孫能傳撰。能傳字一之。寧波人。萬歷丙辰進士。官至工部員外郎。卽嘗與張萱同編內閣書目者。此書詳考易名之制。首功令。次諡法。次尊諡。次臣諡。而以議論終焉。大抵據內閣冊籍鈔錄成書。其例頗與葉秉敬諡考相同。而不及其精密。

【秦璽始末一卷】編修程晉芳家藏本 明沈德符撰。德符字景倩。一字虎臣。秀水人。萬歷戊午舉人。元世祖至元三十一年有獻傳國璽者。御史竟州楊桓考辨定爲秦物。見於輟耕錄。德符以爲不確。因歷引宋李心傳之說及五代會要并晉史通鑑等書以證元所得之非秦璽。然傳國一璽歷代傳聞紛如聚訟。恭讀我皇上御製國朝傳寶記折衷定論大哉王言。尤足垂訓儆禔。若德符之斷斷爭辨猶不揣其本而齊其末耳。

【年號韻編一卷】浙江汪啓淑家藏本 明陳懋仁撰。懋仁有泉南雜志已著錄。是書仿表譜之法。橫格

分正統偏閏僭僞叛亂蠻夷五等。直格下貫。則同一年號。年號前後之序。則依韻部編次。以便檢閱。體例頗亦詳密。其中凡前代年號。有與明同者。則削除不載。如張重華方臘。皆號永樂。則以成祖故去之。蓋不欲使僭亂之人。與祖宗同號。亦臣子之誼宜然。不得訾以遺漏。惟其所分之等。更始則列正統。隋文乃居偏閏。既已未安。又道經有龍漢中皇之類。羽流妄說。不載可也。列之僭僞。亦覺不倫。視鍾廣漢歷代建元考。不及遠矣。書成於天啓中。而中有崇禎年號。當爲刊版於崇禎。故隨時補入歟。

【明三元考十四卷】浙江汪啓淑家藏本。明張宏道張凝道同撰。宏道字成儒。凝道字明儒。武進人。其

書專紀明代鄉會殿試之元魁鼎甲。或非元魁而後至貴顯。及一門科名極盛者。亦咸載焉。始於洪武三年庚戌鄉試。終於萬歷四十七年己未會試。每科具詳京省主試官。大致與張朝瑞書互相出入。

【萬古法程一卷】浙江巡撫採進本。明袁應兆撰。應兆有大樂嘉成。已著錄。是書統載學宮從祀先賢

先儒名氏位次。而考證其是非。如所辨複姓。皆題一字之類。自是下邑之謬。不足以簡牘相爭。其他所辨字畫。則僉陋頗甚。若辨句井疆句字。謂當作勾。宋人避康王諱。始改勾爲句。不知說文句本從口。廣韻註句從口。不從人。具有明文也。

【辟雍紀事】無卷數。兩淮馬裕家藏本。明盧上銘撰。上銘字爾新。東莞人。崇禎中。官南京國子監典

簿。是編敘述明代太學典故。起洪武。訖崇禎十年。詳於南監。而北監亦附見焉。

【學典三十卷】副都御史黃登賢家藏本。國朝孫承澤撰。承澤有尚書集解。已著錄。是書所載。皆歷代

建學設官行禮講學科舉之事。自虞訖明。分年編載。惟前代僅居八卷。而明代之事。多至二十二卷。如釋

奠之禮。凡各史志紀所載者。皆未收入。既載國子監學典廢創置。而各朝學官之職。學宮之制。又皆闕焉。至泮宮習射。及各經列於學官者。如漢之石經。唐之寫經。石經後唐之鈔版。卷中皆未言及。而明代一切章疏。毫無關於學典者。乃一概濫入。蓋門戶之見既深。無往不用其標榜也。

【文廟從祀先賢先儒考一卷】編修程晉芳家藏本 國朝郎廷極撰。廷極字紫衡。鑲黃旗漢軍。此本題曰廣寧。其原籍也。官至江西總督。是編歷考從祀先賢先儒名氏之同異。如辨顏幸之作辛。而不知通典之作柳。咸淳臨安志之作章。辨南宮适之作韜。而不知一作縉。一作括。辨司馬耕之作黎耕。而不知一作子耕。未免考訂之疏。惟所辨文翁之圖。較家語多五人。家語較文翁之圖多九人。及正殿配享東西兩廡位數。引據頗爲典核。

【頒宮禮樂全書十六卷】兩淮馬裕家藏本 國朝張安茂撰。安茂字蓼匪。松江人。順治丁亥進士。官至浙江提學僉事。其書分學校。褒崇。廟制。釋奠。從祀。祀禮。釋詁。祀樂。樂律。樂譜。樂舞。釋菜。啓聖。祠名。宦鄉。賢祠。十四門。大抵祖李之藻。頒官禮樂疏。王煥如文廟禮樂書。少增損之。其凡例稱李博而富。其失也。滯王簡而通。其失也弱。然觀其所作。亦無以遠勝二書也。

【琉球入太學始末一卷】山東巡撫採進本 國朝王士禎撰。士禎有古懽錄。已著錄。先是康熙二十三年。翰林院檢討汪楫。中書舍人林麟焜。冊封琉球歸。奏中山王尙貞。請以陪臣子入國學。聖祖仁皇帝俯允所請。士禎因紀其始末。其中追敘明代琉球入國學事。於洪武二十五年。祇紀中山。而失載山南。又二十六年。中山復遣寨官子入國學。永樂八年。山南遣官生三人入國學。俱未及載。蓋沿舊本太學志之誤。

也。其書已見士禎帶經堂集中。此蓋初出別行之本。

【國朝諡法考一卷】山東巡撫採進本

國朝王士禎撰。始於國初。下迄康熙三十四年。大臣之賜諡者

咸錄焉。凡親王十八人。郡王十五人。貝勒十二人。貝子十二人。鎮國公十一人。輔國公十六人。鎮國將軍五人。輔國將軍七人。妃三人。公主二人。額駙二人。藩王七人。民公九人。侯伯十四人。大學士二十七人。學士四人。詹事一人。尚書二十七人。侍郎九人。都御史三人。八旗大臣一百六人。總督十七人。巡撫十七人。殉難監司三人。提督十七人。總兵官八人。前代君臣二十六人。外藩一人。

【辨定嘉靖大禮議二卷】浙江巡撫採進本

國朝毛奇齡撰。奇齡有仲氏易。已著錄。是書力斥楊廷和

之議。而又不屑與張桂相雷同。謂張桂較廷和議爲正。特不知根柢。經傳凡爲辨二十四篇。援據典確。亦可備一說。惟謂世宗旣嗣武宗。卽當以武宗爲父。引公羊傳爲人後者爲之子作證。然奇齡於所著春秋毛氏傳。及曾子問講錄。內論仲嬰齊卒一條。則又力闢公羊之誣。謂嬰齊不得以兄子家爲父。父仲遂爲祖。又於經說中力排汪琬誤信公羊傳爲人倫之禍。而此辨忽主此說。前後矛盾。殆不可解。又謂世宗並當爲所生持服三年。則雖當時張桂諸人。猶未敢創爲此論。奇齡乃忽發之。考儀禮喪服經曰。爲人後者。爲其父母報。傳曰。何以期也。不貳斬也。何以不貳斬也。特重於大宗者。降其小宗也。若世宗又爲所生斬。是貳斬矣。卽曰經文專爲宗子言之。不知宗子之尊。孰若天子。言宗子則通於天子矣。奇齡又謂經文明云。爲人後者。爲其父母報。則於所生父母。不改稱也。旣於父母不改稱。卽不得改三年服制。然儀禮雖不易父母之名。而仍降在齊衰期服章內。則終不得服以父母之服矣。奇齡所引。不足自證。適以自攻耳。考

通典徐邈答孔注曰。史皇孫皇考之名。特稱謂耳。未足以明服之輕重。其論可與喪服傳相發明。奇齡乃取徐邈已廢之說。改飭更張。實乖典制。其餘各條。間有可采。然不足救大本之乖謬也。

【制科雜錄一卷】浙江巡撫採進本 國朝毛奇齡撰。皆記康熙己未召試博學鴻詞始末。中多露才揚己之詞。且有恩怨是非之語。猶是前代門戶餘習。不盡足據也。

【彙征錄一卷】兵部侍郎紀陶家藏本 不著撰人名氏。記康熙十七年薦舉博學鴻詞名氏爵里。及御

試中選人數次第。謹案是年正月。聖祖仁皇帝諭吏部曰。自古一代之興。必有博學鴻儒。振起文運。闡發經史潤色詞章。以備顧問。著作之選。朕萬幾餘暇。游心文翰。思得博洽之士。用資典學。我朝定鼎以來。崇儒重道。培養人材。四海之廣。豈無奇才碩彥。學問淵通。文藻瑰麗。可以追蹤前喆者。凡有學行兼優。文詞卓越之人。不論已仕未仕。令在京三品以上。及科道官員。在外督撫布按。各舉所知。朕將親試錄用。其餘內外各官。果有真知灼見。在內開送吏部。在外開報督撫。代爲題薦。務令虛公延訪。期得真才。以副朕求賢右文之意。尋內外薦送一百八十六人。應詔至京者一百四十三人。十八年二月朔。於體仁閣賜宴。試璿璣玉衡賦。省耕詩。入選者一等二十人。二等三十人。皆授翰林。入館纂修明史。其餘現任者回任。候補者歸部。未仕者回籍。年老者命吏部議給職銜。文運昌明。人才蔚起。熙朝盛典。誠萬古爲昭。其間與選者。承明著作。及有流傳。卽未與選者。亦皆觀感奮興。不懈而及於古。其所選述。今著錄於四庫者。尙班班可考。此編雖案牘之文。然觀其所載。亦足以見棫樸菁莪之盛也。惟讀卷諸臣。如杜臻李蔚馮溥葉方霽俱不載。及年老賜職諸人。具有姓名。亦未臚列。則記錄之疎耳。



【國學禮樂錄二十四卷】浙江巡撫探進本 國朝李周望謝履忠同撰。周望字渭湄，蔚州人。康熙丁丑進士。履忠字方山，昆明人。康熙癸未進士。是編乃周望官祭酒，履忠官司業時所輯。自孔子世系及先賢先儒列傳，列朝祀典禮樂圖譜，并石鼓潘迪音調，而以祭酒司業題名終焉。所列頗多疎漏，如祀典中既載晉秦始七年，皇太子講經釋奠，而元康三年之講經釋奠，乃佚不錄。樂器之載於諸經註疏及歷代史志者甚詳，茲僅列史記漢書寥寥數則。至石鼓自唐以來，辨論甚多，如楊慎所偽，則字完於真本。周秦石刻釋音，則補以圍方，皆各有考據，是編概不徵引，而僅載音訓一篇，亦未免稍略矣。

【紀元彙考二十五卷】大學士程景伊家藏本 國朝黃琳撰。琳有經學淵源錄，已著錄。是書取歷代紀元之號，自漢至明，悉以朝代次第纂輯，分正統列國僭竊外夷四門。凡史鑑之外，稗官野史，有關考訂者，悉搜採補入。其例以所紀之元爲綱，以前後所同者，詮註于下。採輯亦頗該洽。然如後魏及遼金，俱載入列國條下，與西夏諸國相同，殊屬比擬不倫。又如紀遼太祖名爲耶律健德，考遼史及契丹國志，並無此名。又遼興宗之改元景福，次年卽改重熙，亦無崇興之號，頗不免於疎舛。

【聖門禮樂統二十四卷】山東巡撫探進本 國朝張行言撰。行言字躬先，江浦人。是書卷首爲綱領，不入卷數。一卷至五卷詳載歷代祀典，六卷載孔子世家及宗子世表，七卷至十五卷爲四配十哲先賢先儒列傳，十六卷爲從祀啓聖祠先賢先儒列傳，十七卷爲改祀罷祀諸儒列傳，十八卷至二十三卷爲樂經樂志樂器律品譜圖，二十四卷載孔子及四配林廟諸圖，其哀輯極繁，而證引諸書，仍不出尋常習見。【學宮備考十卷】浙江巡撫探進本 國朝彭其位撰。其位字素君，吳縣人。是書前八卷自孔子以及從

祀諸儒各爲之傳。九卷則載歷代禮樂典制。卷末附錄未從祀者。申黨孺悲公孫尼子公明子儀公明子宣樂正子春檀弓河間王德文翁孔氏孟皮凡十人。所考禮樂典制頗多掛漏。

【四譯館考十卷】浙江鮑士恭家藏本。國朝江蘩撰。蘩有奏議已著錄。是書略記外藩朝貢之目。恭載列祖敕諭及賜予物數。皆實錄會典之所有。其國俗土風則摺摭前代史傳爲之。多不確實。後系以集字詩二卷。皆蘩所自作。而以諸國字譯之。詩既無關於外藩。所譯之字又不能該諸國之字。則亦戲筆而已。不足以資掌故也。

【太常紀要十四卷】江西巡撫採進本。國朝江蘩撰。是編乃蘩爲太常寺卿時以太常寺考及太常續考所載止於明代。因考核近制。勒爲一書。分祀訓祀儀祀例祀禮祀官祀賦六門。其書成於康熙壬午。於時皇清禮書尙未纂修。故蘩有此著也。

【紀元要略二卷補遺一卷】江蘇巡撫採進本。國朝陳景雲撰。景雲有通鑑胡註舉正已著錄。是書紀漢迄明帝王建元及歷年。其子黃中又摭歷代僭僞之號。附以外國爲補遺一卷。景雲於分據諸朝各爲紀載。彼此互註。不分大書附書。體例最公。然皆史傳所習見。取便檢閱而已。

【歷代帝系年號二十卷】江西巡撫採進本。國朝劉宗魏撰。宗魏字友韓。號柚航。贛州人。乾隆戊辰進士官至監察御史。是書以歷代帝系年號爲名。乃兼及割據僭竊。下至李自成張獻忠亦入記載。而所列割據僭竊又不能詳備。體例頗爲冗碎。

右政書類典禮之屬四十七部三百十九卷。內二部無卷數。皆附存目。

